

序

荔波舊無志此何為而志乎為風教志也余去夏權攝斯邑下車之始欲纂志以端風化時以獄訟繁興未果也越明年政通人和百廢具舉旋奉文以將修黔省通志命各縣輯志以備采擇爰集邑人士而告之曰荔雖褊小其諸可無志乎邑人曰唯唯顧地屬邊隅漢夷錯處其風其俗皆鄙而陋志之恐不足為邑來光余曰否否泰山之高不擇土壤河海之大不涓細流氣朝定鼎二百年來聲教所訖海溼皆同況荔周五百餘里法

日繁其君臣父子之倫善惡刑賞之法治亂存亡之機順逆禍福之數凡有血氣各具秉彝豈無文獻足徵而志乘缺焉不修則向之安於鄙陋者不終於鄙陋哉明經李子肇同復進而言曰吾先人有志於斯亦已久矣惜成志引數十卷未及梓燬於兵荔之志遂滅先人之志未終肇同竊隱憾焉思欲一繼前志愧不敏又懼其文之鄙而陋也余曰不然天下無難為之事只難得有心之人陳詩觀風固以文為貴然務虛文而鮮實用如鬼磷螢火耀耀目前雖使窮巧極工為世人不恆有之物終與

草木同腐耳芝草醴泉無益百姓何如布帛菽粟能使人世不
飢不寒子誠有志則據事而直書之顯微闡幽在此一舉下里
巴人之曲猶有可傳鄙而近理陋不失真何嫌乎李子唯唯而
退第事經創始非一手足之力所能支爰進明經董子成烈同
司筆削之權鄧君瑞麟分司採訪之任而繁稱博引則明府邱
君育泉諸人與焉董孤之筆史魚之直吾於諸君期之並酌給
薪水設局以專其事公退之暇余亦謬為釐定依彙採輯六閱
月而志成其間天時之變遷建置之沿革政教之轉移民物之

聚散與夫名宦良將之勳績耆舊儒林之言行以及忠孝節義
選舉義文之眾皆舉而筆之於書至閭境山川形勝亦復繪圖
陳說源源本本燦然可觀余閱之喜諸君殷殷嚮序以弁其首
余既責膺守土又安敢以鄙陋辭而不勉附一言以自託於不
朽耶竊辛斯志之成後之人徵文考獻得所憑依必有觀感興
起而言曰為世道人心民生國計皆是志基之無所謂鄙亦
無所謂陋其於風教所關亦鉅嗚呼斯志之作顧不重哉
光緒元年歲次己亥六月知縣雲漢蘇志廷撰

荔波縣志目錄

卷首

宸翰 凡例

卷一

天文志

星野

氣候 占驗附

災祥 年歲豐歉附

卷二

地理志

建置沿革

疆域全圖名勝附

形勝八景附

山川古蹟附

關梁修路附

村寨

邱墓碑附

卷三

營建志

城池

公署

壇廟

寺觀

園亭

坊表

卷四

食貨志

戶口

田賦

經費

場市

物產

卷五

學校志

學宮

書院

主講附

學額

義塾

典禮

卷六

武備志

兵制 塘汛 程途 附

師旅

卷七

秩官志

名宦

職宦

土司

卷八
(實為三卷)

人物志

選舉

鄉賢

宦蹟

文學

忠義

節孝

貞烈

仙釋

流寓

方技

壽考

卷九

風土志

土俗

卷十一
詞 歲
雜記
補遺
跋

卷十
藝文志
碑記
傳
論
疏
詩
婚喪禮

凡例

一荔波向無志 國朝乾隆六年奉文行縣惟將在城塘碑記一篇抄錄應命道光中邑貢李國材志存邑乘採輯為書名曰荔波志引歷十餘年集二十卷未及付梓咸豐辛酉城陷其軼事十不存一歷年既久徵引維艱茲謹宗誌先賢訪誌遺老擇其信而可徵者登之並加搜羅以考其得失爰即分列各條謬為訂正繕裝成帙恭候
憲裁

一天文分野古書固屬可據因荔波屬黔粵之交地勢趨下與古州之上江等處獨山之漂洞等處廣西之思恩等處廣西之南丹州等處邊幅犬牙相錯在古揚州南境聊以矜翼之餘分之足否有當伏候

憲酌

一疆域界限最易混淆跬步不分動滋疑竇自乾隆六年經兩省委員踏勘南丹與荔波屬交界立石為記而荔波屬西北之界限乃明其與思恩等處未有界石不無進寸退尺之處令將

全邑轄境總繪為圖並分晰四正四隅以便觀覽

一荔波一十六里山川溪洞書不勝書茲擇其尤著者錄之其他不甚著名與夫未經題咏者更難僕數姑從畧以俟後補

一城署廟壇有舊存者有重修者其有碑可錄則備載其年月否則畧之但列名以俟稽考至文廟書院義塾緣由皆詳於學校志文教為一邑要務故特表以示崇

一荔波自有明改流以來明宦惟劉邦徵為最著王鳳喈續廣事類賦以之列於名宦今從之我

朝開國以來惟揚蔣二公曾經題奏其餘有政績尚多但未經題奏概彙於職官中以俟論定

一戶口村寨以時增減而田賦兵糧皆遵定例至於四時經費均有一成而不可變者特詳於食貨志以便省觀

一本縣向有西街養正義學荔波營義塾久已荒廢今復設養正義學於城內北街並添設從善義蒲周覃瑤慶等里義塾由善後入公送產絕業籌款延師其添設始末載入學校志中用垂永久

一荔波自建鄉賢祠以來未聞有人祀者今存一格以待其人俟後之協乎公論者祀之

一荔波藝文一類散失已多今只錄其存者其成書未梓而既失者亦備列其目庶不負作者之苦心其成書未梓而現存者皆繕專案附呈恭乞

憲鑒

一此次荔波縣志事係草創且限於功令不及廣詢博訪
惟將現在事蹟書之遺漏之譏實所不免所望後之君子

政其訛謬補其缺畧焉

宸翰

世宗憲皇帝上諭一部

欽定工程則例一部

御製平定回部碑文一道

御製鳳雛待哺圖墨一道

聖諭廣訓一部

欽定學政全書一部

欽定吏部銓選則例一部

督部則例一部

三流道里表一部

先賢位次一部

鄉飲酒禮儀注一部

戶部則例一部

軍需則例一部

西番驛語一部

大清律例校正各條一部

新改清語冊一部

五軍道里表一部

大清律纂修條例一部

上諭四道

欽定五經傳說彙傳一部

御纂春秋直解一部

禮記直解一部

欽定明史一部

以上各書籍並黔省志書一部均於咸豐十一年春三月
城陷燬於兵

欽定戶部則例一部

道光上諭一道

此二書及牧令全書一部皆新頒現存者

天文

儒者不言織緯而觀天文察時變著於彖經天固不易知亦未嘗無可知者在也黔在三代時荒服地也周禮保章氏掌天文以星辰辯九州之地而黔缺焉以荔邑之彈丸似更無星野之可言矣然而三代前幅輳未廣推求亦未周故凡遐荒僻壤之區皆從其畧夫三才之理本相通地度必根於天度安有縱橫百餘里而不可以分星言者況我

朝協紀辯方無遠弗屆最為詳賅乎則荔邑分星固亦為精曆

數者所能考也閱之徐氏圃臣之言星野也曰滇黔交緬皆屬翼軫其復古分野圖復分翼為雲南軫為貴州是凡屬黔者皆屬軫矣乃荔雖屬黔而分星獨與黔中誌殊異非以其逼近粵西之故哉至於氣候之不齊有關農事災祥之罕見足備省觀均不可以不志志天文

分三類

一星野

一氣候占驗附

一災祥 年歲豐歉附

星野

荔邑地鄰慶柳屬古揚州南境星分在軫翼之餘畫野控黔
粵之次

氣候

荔波較巽為暖較粵為寒而附城沿河一帶氣候和暖土地饒沃立夏後始播種秋初可登場地道最為斂樹各里不同播種必早或用谷雨或用清明

占驗

正月元日晴明主歲豐又於元旦汲取新水與除夕之水較稱輕重可卜來年豐歉 正月初旬雞犬日不掃地可免跳蚤 立春鞭春牛時嚼生蘿卜可健齒 正月初九謂之上

九俗傳此日喫素一日可當一年齋期 元宵取龍燈餘燭燃之謂可除邪剪龍鬚繫小兒手足謂可保長命取衣布與小兒為服謂之龍皮可免災疫 五月五日以五色絲繫小兒手足謂之長命索午時食大蒜可明目浴百草湯可除疥癩飲雄黃酒可去癘以酒洒牆壁根可祛蛇 六月六日家有鮮服皆取出晒諺云六月六晒龍骨 中秋占次年元宵晴雨諺曰中秋月不明兩打上元燈 九月九日飲茱萸酒可除疫癘造酒謂之重陽酒 白露前漂布易白 立冬後

聞雷諺云十月聞雷黃土成堆蓋聞雷多病也
除夕以斧斫菓木用口嚼飯喂之次年發實繁多

災祥

嘉慶二年玉屏山崩 十年地震 十五年慶雲現於東山

十七年彗見西方

道光二年地動又大飢 三年旱 五年大飢人相食 十

七年玉屏山崩 二十三年秋七月彗見南方七夕西南

单天開一道聲如裂帛 八月白虹見於西南 二十四

年春三月大疫 二十八年夏六月城北忠烈宮公像汗

出如雨數日乃止

咸豐七年夏六月雷震大成門右柱 八年春正月彗星見

西方 九月大火 九年秋八月有星墜於城北其聲若

雷 又十月火

同治三年冬十一月筍發如春大旱 四年大疫 秋九月

有大鷹羣飛蔽日自西而東 五年夏四月黑氣起城南

逾時始散大飢人相食 六年夏六月大疫 八年冬十

月大雨雹大風拔木屋瓦皆飛 十年夏五月大水 十

一年冬十一月大火虎斃人數百 十二年秋九月大風

雷大雨電大如雞卵草木皆折吹去民倉一個不知所
之 十三年瘕狗斃人畜不計其數

光緒元年春二月大雷電大雨雹大風拔木屋瓦皆飛蒙石
里水龍村壓死人民十餘口 夏五月五日卯刻地動二
次 二年秋七月兩雹傷稼自七月不雨至八月又飢
三年春二月大風雷大雨雹大雷傷麥

荔波縣志

地理志

荔邑地處邊隅形勢險固其山脉來自獨山州之月亮坡經恒豐之龍山度瑤台之雲嶺折而南聳玉屏結為縣其西北則水岩板堯諸山聚焉其東南則水角水春諸流匯焉淇江繞其北溶江界其南瑤慶特來為右翼也羊奉巴乃為左翼也若夫巴容恒豐據嶺表之上董界巴仄那縣治之規周覃三硯驛傳安隘我蒲從善藉作屏藩方村為



舊治花封羊安亦輔車連幅瑤台其中紐也有明建官設衛蓋欲守此土治此民使無知之俗而為禮義之鄉也已清朝文德覃敷漸臻王化二百年來城郭驛郵之廢興山川橋梁之險碕卡村寨之遠近風土物產之變易紀而存之可以見控制之宜識巡防之要俾為政者庶有以備覽於一時

貴州通志 天文星野 黔越在荒服保章氏所未載前人以地近荆梁分翼軫參井之餘考核最為精當


貴陽安順南籠都勻平越大定遵義參井分野之圖

參七星 七星皆明天下兵精

井八星 天井正明天下太平

謝東山志曰都勻府程番府今定番州永寧鎮寧安順普安四州俱

參井之餘



建置沿革

我邑僻處偏隅形勢險固其地脉自獨山州月亮坡登嶂而來綿亘一百餘里其中過恒豐龍山高聳度瑤台雲巖翹接逡巡而降南折而玉屏峙焉玉屏之下其地寬廣土沃田肥而邑城遂於此而建

荔波縣為古荒服地漢唐以前無考至宋始見於史冊置土州羈縻之元季明初為皮蒙雷三土司占據正統間改土為

流嘉靖間設縣屬廣西之慶遠府萬曆間知縣劉邦徵始詳請建縣治於時來里之刺軫村明末遂廢清順治十六年知縣王家珍詳請移縣治於方村里雍正十年改歸黔省隸都勻府乾隆二年王師平貴州總督部院張奏請移縣治於今

疆域

荔波縣城在府西南二百六十里西至廣西白蜡均九十里交南丹界北至廣西四亭界一百里南至廣西龔洞界一百

一十里北至獨山漂洞界八十里西北至獨山蠻蔥界九十里西南至廣西翁昂界三十里東南至古州定旦界一百二十里距京師七千四百六十里

形勝

荔波縣山郭孤懸苗夷錯處帶溪東注龍江方林北連爛土玉屏北峙天馬南騰文筆摩空凌霄潮生伏獅吼浪台巔控獨荔關津溶江為粵黔襟帶四時佳景令人憑眺而流連不置者正不獨風晴雨雪時已也

八景附

東郭曉烟

在城東南特來里官塘村秋夏之交雲氣橫亘山腰十餘里皎若匹練半空奇峯羅列如海上仙山從天外飛來真佳景也

西峯霽雪

城西十數里中界一河夾岸皆山起伏相連若浪滾濤奔值冬雪初晴萬派晶瑩光芒奪目

北郊落照

在北門外塚壘壘土阜相望每當暮鴉往還夕陽明滅登樓四顧令人興憑吊之感

南堰奔濤

在城南五里我江由東北而來南注於此水性悍疾驟人築石為埧鱗次櫛比水石相激雪花一片雲浪千重澎湃之聲震動數里

梨井春光

在城北五里石灰坳土地祠前清泉一派自石隙流出其味甘冽每歲春二三月井上梨花盛開樓台倒影草木增榮遊人士女雲集稱勝會焉祠樓今毀

樟江夜月

在城東舊龍王廟前古樹一株大可數圍前臨陡岸皎月當空樹影婆娑倒映水中枝柯交相掩映即小李將軍畫無以過也兼之漁歌唱晚野火明村當其境者無異洞庭秋夜云

洞天消暑

在城東七里許名龍王洞洞上石白如雪左右岩石陡絕遊者必操舟二里許始至洞口前臨大河入其中幽深宏敞涼氣逼人盛夏必披裘焉自丙寅苗匪攻陷荔城遺民避兵其間據險固守賴以全活者甚眾

沙市圍魚

在城東一里俗名洗布河清波激蕩細浪濛濛小舟載水若飛密網縱橫錦鱗奮躍不啻綠楊紅樹風景云

附八景詩另稿

山川

玉屏山

在城北二里縣之鎮山也端聳富厚萬山環拱如畫屏然

小玉屏

在玉屏山麓端整凝秀縣治之少祖山也

東山

在城東三里地屬時來舊縣之鎮山也曉日初出落翠浮空
晴嵐拂地一名梅龍山

文筆峰

在城西十里尖聳若筆直插雲霄

天馬山

在城南五里正居午位玉屏之對山也

獅子口

在城東北三里尾連峻嶺俯瞰大江有跳擲騰躍之勢口內
方圓約丈餘往來遊人常憩於此

迴龍山

在城西三里我邑之水口山也文昌閣曾建于上登斯境者非獨見今之城郭森森壯列即故邑規模勢亦宛然而在目
前惜丙寅春閣毀於兵

霸王山

在瑤台里之高黑村巉岩陡壁最為險峻

台嶺

在方村里甲良塘三里之內方圓若台我邑與獨山分界之處也山之北草木皆向獨山之南草木皆向荔古今傳為異

事云

筆架山

在城西三里高寨河右側三峯相連宛若筆架

龍山

在城北九十里恒豐界山形蜿蜒矯若游龍玉屏龍氣即由此過也

雲嶺

距城四十里在瑤台水利南七里山體端正凝厚秀色可餐

萬峯環抱森列有鸞翔鳳翥之勢我邑幹龍之火祖山也

半月山

在城西三里之高寨村形如半月與迴龍山相對一陰一陽堪輿家謂之日月捍門者是也

白虎山

在城南三里怪石崢嶸令人可畏荔城諸山環拱獨此山向
外堪輿家謂之離鄉山俗因其形態醜惡故此之白虎名云
大造坡

距城一百二十里在猗慶布祿塘北十里咸豐四年粵西土匪朱亞狗作亂陷思思知縣魏承杭於此建碉卡以為堵禦今已毀之

响水岩

距城七十里在董界孟塘村南十里水從峯頂瀉下捲雪轟雷聲聞數里

外構坳

在董界拉个村後二里同治六年廣西副將宋福慶敗賊於

此
峭樓山

在董界里者邑村對河知縣魏承祝建峭樓於其上以是得

名

擦耳岩

在蒙石里北七里山徑崎嶇路通一線行人必側身而過擦
耳之名其由

甲凡山

在董界里海利村北五里巉岩崎嶇草木紛披甲於諸山此

名

大坳坡

在城東五里古樹陰濃石泉甘冽往來行人多於此息肩

時會坳

在城北五里晉省孔道

撞鐘石

在時會坳前二里峭石壁立遊人以石擊之若鐘磬聲

花坡

距城十五里亦孔道也峯巒層疊道路紆迴往來過此均不免有行路難之歎方之九折之險當不過此

跋送坡

距城四十里相傳有邑宰德政多端紳民不舍當解組之日跋涉相送至此故名

樓梯坡

在玉屏山後數里峰巒紆迴石磴陡峻其形如梯

轟秀峯

在巴乃里棟階村前峭拔如筆端正如圭不與象山聯絡獨秀峯

鐘山

在猺慶里水扛村一峯拔起清溪環之

在拉圭場後二里其形若鐘

覆釜山

在巴灰里寨龍村後形如覆釜故名

玉几山

在廻龍閣山後圖如几

帽盆山

在三洞里

飛鵝山

在巴灰里板樂村前二里形如飛鵝撲地故名

板脊山

在董界里寨馬村後知縣鐘毓材陣亡於此

黃泥坡

在城北二里吳公子江於此陣亡

望城坡

在城南二里視城中如指掌然

拉皓坡

在董界巴乃之交崇山峻嶺奇險異常坡麓有田一區有溪
數丈白石千仞山鳥時鳴幽靜之處也

清虛靈洞

在芭嶺距城二十里俗名仙人洞芭貢士李國材題古風一首
首覃金錫題近體一首

歐官洞

在城西七里

洞峯洞

距城七十里在猺慶里洞峰山麓層巒疊嶂青翠欲滴由山脚至山頂可五里一線鳥道百折千迴至洞口峭壁懸岩陡峻尤甚洞中軒濶宏敞石穴若蜂房者數十自乙卯至庚午

居民避兵其中數百家恃以無恐四圍奇洞甚多而洞之宏敞無踰此者

穿洞

在猺慶里水扛村一山寨路石洞中通路達其中盤旋而出丙寅之亂村民聚族居焉始改路踰山巔而下

蘇仙洞

在龍王洞

風洞

在義蒲里冬末春初有風出焉若萬竅鐘鳴

安平洞

在巴乃里棟階村左同治十年大亂作居民徙居其洞保全
身家者不可以千計知縣鍾毓材曾駐其中砌石為記李肇
同題古風一首

十二洞

在巴乃里拉圭村

甘穩洞

在巴乃里板談村外淇江之流由洞竄入石壁峭立可住數
十家

永安洞

在董界里俗名硝洞其內陰深人跡罕到同治中年難民聚
居保全甚夥

甲洞

在董界里其形如獅

戎江

在城東門處水源一出生苗烏溜地界過巴容里更地河復會東南諸水至水春河是為我江一出從善里之龍場嗣經水角出水錯至水春與大河合流入縣治經東北繞西南至廻龍山環繞若太極而西經巴灰至董界孟塘與淇江合流出粵西南丹界又折而南至撈利江流入粵西還出

碧灘

源出生苗由巴容里經烏溜拉易拉多拉埃地牙水昔在白岩洞前長可二里許深數十丈水深碧色每值月夕風晨擦

舟往還水天一色令人有飄飄欲仙之概

撈村江

在城東南八十里為我江下流其源有二一自黑貓一自爛土司合流而匯至此流出粵西地界

昂溪

在巴灰里脚拱村源出南丹翁昂注于我江

箐口河

距城一百二十里源出三洞里之帽盒山西流古州定旦

帶溪

距城七十里在周覃里平田中清流蕩漾環繞若帶束注於水又河

十里長灘

距城五十里在董界孟塘村左側三里水面空調波光若鏡深不可測羣魚之所歸宿也

清冷泉

在城東北我江地界水自潭底噴出深數丈寒氣逼人有以

銅瓶汲水烹茶而味極甘

清水河

在城東北我江之下其發源於清冷泉深丈餘寬數尺其流澄清不與我江水相混自樟江流入洗布河復入石隙注於官塘莫知所之

淇江

在方村之北僅里許其源出自恒豐里之悶駝山澗經羊安過瑤台流入方村由方村而巴乃而董界經孟塘與我江合

流

水义河

在周寧董拐村之東三里水源發於三洞出由從善里龍場
駟入大河

拉號河

距城四十里在義蒲里水錯塘左一里其源一出於瑤台里
花村之瀑布泉一出於水利村之四方井至水錯與從善里
龍場駟大河相會

孟塘河

自淇江由巴乃入穴伏行十餘里出董界而來與我江合流
而出

响水河

即翁龍之堂拔河也在董界里入洞後出由亂石間奔赴我
江聲聞數里

威母溪

在蒙石里石廠前二里由山洞流出入我江

溶江

距城七十里源出猗慶里毛蘭洞洪山麓繞立化由布陸塘出廣西思恩界江之源頭水活魚甚肥美別饒異味特產也

龍湫洞

距城九十里在董界榜村江上流我江之水至此盡入石隙江內十餘里黑石嵯我滔滔流水層疊而下恍若雷轟自古不通舟楫殆天之所以限黔粵歟

金兌河

在方村里東五里其源自羊奉山澗而來下流注於淇江

官塘河

在城東二里潭波澄清水深魚肥歲時享祭咸取給焉

蘇公井

在月波亭下相傳有善士蘇瓊常茹素恐諸水不潔鑿此注水以自給

楊公井

知縣楊以增所鑿在城西演武廳左側上有蕭門三烈婦盡

節亭以護之

甘泉井

在城西葯局田側俗名藕塘井夜半汲之味甘如醴

新井

在城內西北隅知縣吳德容所鑿由城垣穴地砌以石槽引城外荔泉注之

荔泉井

在城西一里大路側其水清潔大旱不涸

永濟泉

在城東月城內知縣錢堦所鑿穴地數丈泉源滾滾味甘而冽閭城居民終日汲之不竭

麒麟井

距城四十里在瑤台里水利塘董瓦村方圓數尺其清若鏡每日子午二刻自為盈縮不踰晷刻

龍泉井

在龍王洞右側水從石竅噴出令人寒骨竦立相傳內有潛

龍吟吼則大雨將至水出油魚如指大甚鮮美
一盃井

井有二一距城十二里在時來里駝背樹岩畔其圓如盃水
味清香甘冽歲旱不竭一在巴乃里下巴灰路側泉出石隙
形如盃飲者以口就吸亦隆冬不竭

四方井

距城五十里在瑤台水利南八里兩山相紐岩石奇崛泉出
其中形如方壁波光蕩漾下流為拉號河一在三洞汎南二

里

油魚井

在城西三里高寨大河岸側水從岩脚流出其涼沁齒

梨井

在時會均

龍井

在跋送坡下大路側水自岩穴噴出狀若長虹其北注於淇

江

盆撈井

在巴乃里拉圭場後山上一石中空大若盂深二尺許清泉注焉汲者以酒撈挹取數担不竭不取亦不溢奇井也

流香井

在董界里板麥村左泉水清香自砂磧流出匯作長渠入於我江相傳內有寶砂飲之令人多壽

一品泉

在董界里寨馬村後三井相連形如品字左右釀酒最佳中

宜造腐味美勝常

瀑布泉

距城五十里在瑤台里之花村水源來自恒豐至花村一瀉數十尺若匹練倒挂

犀牛塘

在瀑布泉下每日三漲三消相傳有神犀藏焉值早霧空濛不時出見

蓮池

在縣署內產金蓮蓮及鴛鴦蓮一在天后宮後一在荔泉書
右側一在何家園

王公泉

在巴乃里河邊拉強洞內岩泉一勺僅敷一人之用飲之主
壽以百餘歲之王公常棲隱於此得名

小花園

在清虛靈洞左半不滿一里高數丈濶十餘尺中有一石飛
來像觀音體態一尊莊嚴即公翰猶在殊難盡其巧好也

大花園

在小花園左半里許洞前有石若龍皆石乳融結頭角鱗甲
依然有昂首欲飛之勢入其中益幽邃左右石房天然不假
椎鑿石棹石橙石狀石灶石棋盤等件無或不備內有小石
圓如棋子堅潤光澤相傳為仙人所留遺至今取之不竭云

天池

在洞峯頂之極巔外水深藍色圓可十數武每日有雲籠出
現天將晴則色黃天將雨則色藍土人於此卜陰晴百不失

地池一

洞內觀音一尊右有小洞圓數尺可容一人偃偻以入幽晴不能見物扳石梯疊層而下二百餘級天光復朗穴地方圓二十餘丈有水一池晶瑩澄澈纖塵不染游魚陣陣出見相傳內有潛龍人不敢漁漁則雷電至池上有石床石灶石橙石棹石鍋等件右有石像壁立鬚眉蒼古舊傳為仙人遺蜕殆不誣云

朝山塔

在城西迴龍山南二里我邑學宮對岸之文峯也道光二十三年知縣蔣時淳議建塔於平崗之巔以培風水咸豐初年因亂中止其遺址尚存

張中丞營

在周草里東山頂乾隆初年總督張廣泗平定苗疆屯兵於此

關梁

金城關

在城南四十里俗名懶板瓮瑤慶里拉竹村南五里右峭壁左深澗一徑紆迴崎嶇陡絕有一夫當關之勢同治丁卯廣西提督馮子材破賊於此

甲馬關

一在猥慶里距城百里布陸塘南五里一在巴乃里與南丹州交界均崎嶇曲折如鳥道羊腸

黎明關

距城一百一十里在猥慶里板寨村之東黔粵分界之處也

白蜡關

在董界里咸豐初年一知縣魏承祝所建

十二洞卡

距城百里在董界里坡小村之西界黔粵之地咸豐初亦為知縣魏承祝建

瑤鎮關

距城七十里在猥慶里甲乙村北疊石為垣藤薛交固天險

聳輝堂也

在董界里夫聳若筆秀挺雲霄峻峭異常車馬所不能到同治初鄉民避患其麓保全者數十戶

桂子橋

在東城內右側城中溝水由此出焉

升官橋

俗名楊家橋在城東北一里

天生橋

距城七十里在董界孟塘村南七里兩山對峙一水中流石橋橫亘其上勢若長虹不假人力真奇觀也

三升橋

在高寨道光十二年蒙錢等捐修咸豐二年蒙將堯等重修移於渡口

三拱橋

在方村跨淇江入黔之孔道也

七拱橋

在董界里孟塘河連綿七拱氣勢雄濶道光中閩邑紳民捐

修

拉香橋

一在响水河下流一在巴灰里

巴樓橋

在董界里巴樓村下

繼善橋

有二一在巴灰里脚拱村後里許寬平三拱跨昂溪一在蒙
石里石厰前三里跨威母溪蒙光朝始以木造其後蒙講元
等四人於道光初年改修石橋

樂興橋

在時來里福村場後河溝灣寨前道光十二年蒙樣銀捐修

何家橋

在城北二里邑紳何振新捐修

萬古橋

在時來里上福村對河嘉慶十年韋村覃元銀捐修
裕後橋

在巴灰里交朝村後交犇岸上道光五年覃文琳捐修縣署
幕賓羅飛雲題

一心橋

在廻龍山後咸豐十年蒙唐把建

和合橋

在巴乃里石碑下道光十四年莫反斤等捐修

加壽橋

在巴乃里界石下咸豐九年莫把金等捐修

福壽橋

在巴乃里棣階村前嘉慶二年何應先捐修

洪橋

在巴乃里棣階村外道光二十年何文炳等捐修

三多橋

在董界里拉倫村外道光二十九年何把物等捐修今已圮

毀未修

巴蘭橋

在巴灰里覃光榮捐修同治中被賊折毀光緒元年其子候選府經歷繼昌孫景福等重修

婆村橋

在時來里河邊大路聚姓捐修

奈何橋

在巴容里楊姓捐修相傳有契好二人送別至此送者於橋

上大慟曰君去矣可奈何因以奈何名迄今追溯遺踪猶覺
深情若揭

打散橋

在莪蒲里跨我江上流

荷靄橋

在董界里跨小清河

脚拱橋

在巴灰里跨昂溪有碑序為恩恩李國材撰

馬道橋

在董界里撈村大寨前跨廟門河

地鵝橋

在城東三十里邕乃埭

水龍橋

在城東六十里邱賤埭

板莪橋

在獅子口下

魚梁

在董界里撈村江上水勢自高而下漁人砌石為梁以圍之
每值溪流發漲魚入其中取之甚易一在時來里水春上流

李家渡

在城東門外龍王廟下即樟江渡赴粵之孔道也邑人李國
瑾捐田所置每年所收之谷除養船戶外其餘並歸董士經
管船議三年一換新船

新修官渡

在南門外下菜園俗名敗乾渡光緒十七年知縣梁宗禪捐
廉重修

高家渡

在城西三里

海利渡

在城西六十里海利村

拉香渡

在城西三十五里

拉柳渡

在城西九十里拉柳村

拉寨渡

在城北五里

板江渡

在城西九十里板江村

巴樓渡

在城西四十里

廟門渡

在城西九十里撈村大寨

高寨渡官道

前後九百三十九丈自西門外荔泉井上起至稗子坪止道光二十七年增生姜鳳翔居民李國安蒙定元陶仲春梁孝生等倡首捐修

水浪路

舊由董猛之後道光十七年貢生鄧而亨董芝茂等倡首募

捐改至維寨前有碑

方便路

在巴乃里拉皓坡道光二十二年何安猷等捐修

白蜡坳

在董界里邊界咸豐初武董李肇榮捐修

望城坡官道

距南門官渡場數武光緒十七年知縣梁宗輝捐廉重修

蒙石里

首善之區

民俗渾厚

戶誦家絃

斯為樂土

東界時來

西接巴灰

南連猺慶

北通巴乃

門西小寨

門北小寨

平寨

摘遠寨

板結寨

打油寨

高寨 花村

芭望寨

板瑤村

水岩寨

董外村

芭

嶺村

時來里

古名喇軫

西粵連區

民勤耕織

士習詩書

東界從善

西接蒙石

南隣猺慶

北連莪蒲

舊踪

後村

上白岩

上板莪

沙地村

官塘村

上羅家

板旺村

板苟村

甲古村

拉芭村

播婆村

上福村

上灣寨

拉扶村

下結毛

甲棒

更蔥村

拉台村

交城村

弄扛村

下水春

巴灰里

俗尚教麗

土田肥美

糶糶市場

環山抱水

東接蒙石

西連董界

北通巴乃

南抵猺慶

上結毛

板樂村

巴蘭村

寨龍村

拉銀村

腳廟村

脚別村 班苟村 寨笋村 上寨鳩 拱撈村 脚拱村
更料村 下拉香 拉良村 拉浪村 下寨平 板盤村
外播用 交朝村 當老村 田洞村

董界里

地居下流 眾水所集 民安耕鑿 爭端各息
西界南丹 北通巴乃 東接巴灰 南抵翁昂
外板麥 下廟村 寨馬村 拉倫村 拉冉村 拉個村
外孟塘 上翁龍 堂板村 拉蒙村 拉桐村 已定村

者把村 拉曹村 浪詳村 板弄村 納漢村 勝大寨
波所村 板江村 扁鸞村 把拱村 板魯村 板林村
洞肯村 鳩抹村 波小村 海利村 洞甘村 肯相村
董更村 巴樓村 巴樓街 董保村 肯類村 脚村
板並村 寨義村 芭懷村 拉早村 下婆村

巴乃里

襟山帶河 土地饒沃 殷實繁多 村塢連絡
北界獨山 西接董界 南連蒙石 東隣羊奉

更方村	太陽村	巴茶村	甲雷村	漆村	地宛村
甲寸村	納朗村	蠻魚村	地辣村	巴巍村	甲魯村
卜巴竹	播莞村	豆村	瑶岷村	杞固村	甲轉村
拉麻村	董斗村	再索村	上桃村	拉棠村	播花村
打拉村	拉彝村	內冲忙	簡杏村	甲老村	瑤花村
拉令村	拉歐村	浪抹村	板譚村	六林村	拉椰村
地階村	論蓋村	韋寨	拉邑村	論慕村	拉佶村
改村	邑乃村	拉滙村	甘龍村	洞渺村	洞脚村

脚拱村	拉干村	上再票	唐龍村	地麥村	巴脚村
弄邁村	洞去村				
方村里					

花封舊治	孔道必由	勤耕勤讀	不敢火休
北界羊奉	西連巴乃	南隣瑤台	東抵恒豐
拉邑村	棠橋村	板廷村	板尖村
板即村	板毛村	交晋村	羅家村
中寨	甲臉村	巴平村	板站村
			紅泥村
			唐八村
			板麥村
			橋羅村

六黑村 風寨 瑶龍村 拉庚村 瑶蚌村 白家寨 今兌村

瑶台里

水分其流 羣山羅列 地居中紐 左提右挈

東界獨山 南連義蒲 北隣方村 西接蒙石

水大寨 納沃村 抵朵村 岩寨 高寨 朵瓦村

公丁村 洞低村 水笋村 水丙村 洞田村 甲大寨

巴苓村 再慶村 唐馬村 莫萬村 上水蒙 納黑村

周章里

摸哄村 納埃村 董丙村 甲砂村 三甲村 甲左村

者桑村 納外村 董扛村 打鴨村 板卜村 駝為村

高黑村 板埃村 板即村 水拉村 水江村 拉威村

花村 洞覽村 洞禮村 唐介村 唐哀村 弄摸村

則吾村 板揚村 板冒村 摸拉村 拉大村 駝麻村

絃誦有聲 民勤服賈 倉廩充盈 田無荒蕪

東界從善 西接恒豐 北隣三洞 南連義蒲

浪對村 打高村 板盤村 上板立 拉野村 浪地村
拉宰村 波花村 拉近村 上拉愿 打類村 拉迂村
弄洗村 板苗村 板光村 鳩撲村 周崩村 更消村
弄索村 芭軟村 尾卦村 板藕村 上板料 董拐村
義蒲里

一隅狹隘 土瘠民窮 俗從儉樸 里尚巫風
東畧從善 西接時來 北隣瑤台 南抵猩猩慶
水外村 扶桑村 水大寨 佳留村 漫納村 菴所村

水釣村 姑朗村 上水錯 水碓村 水吼村 水開村
水浩村 水令村 水江村 水浦村 水把村 甲本村
瑤栗村 洞陀村 洞田村 雞架村 瑤牌村
羊安里

蕞爾邊隅 戶口稀少 民俗簡樸 椽檣為寶
北界獨山 東連三洞 西隣瑤台 南接恒豐
甲乃村 板惡村 梅弄村 拉外村 高外村 板迺村
板美村 引生村 令到村 棠干村 甲黃村 羊翁村

石月村 高明村 今殘村 菠香村 今蓬村 上羊翁
蠻比村 拉愛村 今昂村 陽朝村 今盤村 板臺村
甲下村 地隆村 芭艾村 芭李村 下地隆 論講村
利苗村 甲學村 務令村 務學村 高遠村 今交村
浪個村 高並村 石昂村 務構村 引訓村
巴容里

崇山峻嶺 容箐青青 奸究匿跡 險阻長征
東界生苗 北通從善 南連猺慶 西接莪蒲

高里村 方田村 乾葛村 水滿村 瑤鮮村 拉朝村
威岩村 拉詳村 拉吾村 拉先村 拉亮村 拉毛村
水維村 坤地村 地鴨村 水排村 水息村 下拉小
姑話村 慕容村 拉邪村 蠻董村 牴牛村 務把村
猺慶里

地面潤遼 有村有寨 鎖鑰東南 邊防要隘
南通西粵 東界巴容 北連蒙石 西夾翁昂
長寨 洞英寨 比鳩寨 瑤埃村 瑤朝村 瑤所村

立卡村

必坡村

洞流村

巴國村

拉岩村

更葉村

更坡村

水扒村

水工村

水慶村

獾六村

水扛村

拉竹村

洞塘村

獾古村

板寨_五墟

洞馬_九墟

十二索

立化村

洞吾村

六龍村

甲_乙村

三洞里

紆迴路地

汛設防兵

征途修阻

岩石森森

東界古州

北抵恒豐

南連從善

西接周覃

打便村

水更村

水韋村

水東村

轎扛村

水又村

媽悶村

地垓村

款牛村

背口村

于篤村

撒拱村

娘村

寨落村

媽妙村

梅山村

的母村

的斜村

姑籠村

河西村

板難村

恒豐里

山形惡劣

路徑盤桓

安良除盜

猛以濟寬

東抵三洞

西接瑤台

北界羊安

南接周覃

唐黨村

務許村

水刁村

羊樓村

忙馬村

打來村

水更村

總母村

梅虎村

雅悶村

悶宅村

子暑村

羊奉里

水舊村 亭挑村 蠻打村 班色村 芭烏村 的鴨村
的空村 上板料 外雄村 干雷村 姑引村 水翁村
塘美村 的兩村 上蠻流 板力村 姑成村 甲庭村
蠻坵村 甲點村 梅丹村 的哀村
山高水深 居民稠集 物產良多 貨財豐殖
北界下司 西連巴乃 南抵方村 東隣漂洞
拉寨 拉卦村 架橋村 水涯村 拉磨村 甲寨村

月令村 月老村 月呆村 板蘭村 拉叟村 板明村
交甲村 打利村 廷邪村 拉飄村 拉芭村 交曹村
拉拐村 平竹村 交郎村 董郎村 把婆村 瑤並村
板募村 拉九村
從善里

梗化頑民 伊于胡底 於變有時 美稱仁里
東界古州 西接莪蒲 南抵巴容 北連三洞
水响村 羊拱村 寨抹村 水龍寨 水迭村 水葉村

姑流村 楊柳村 姑額村 水扒村 榮耀村 則估村

內力村 板卯村 板南村 姑發村 姑其村 毋改村

引抗村 總候村 水達村 水蟬村 水董村 水便村

紀功碑

監城之在城塘乾隆五年閩邑官弁兵民公立紀經畧張公
廣泗之功也

神道碑

有三一朱勇烈公一陳公一劉公

壽碑

在學宮內碑上一大壽字蒼老勁知縣吳名譽筆

官渡場碑

在南門外官渡場光緒十七年士民公立紀知縣梁宗輝德
政有序附後

邱墓

明章虎強墓

在巴反里板樂村前二里秀峯倚排清流帶繞堪與家謂之

飛鵠投江公名虎強世襲荔波上巡檢永曆間其孫朗富大著武功誥授掛印將軍總兵追贈公為武顯將軍其支派遷廣西梧州容縣科第連綿嘉慶中裔孫翰林學士舉人拔萃等來展墓撰文泐石道光中裔孫解元武保知荔波縣解任後親往祭焉

清朱勇烈公祖墓

在城北玉屏山西一里氣勢雄偉規模濶大墓左有古樹二株一高聳若旗一彎如曲柄咸豐同治年邑城陷城外林

木鮮有存者獨此墓前古樹葱蘢如故或謂蓋昔人以為山川靈氣所鍾呵護云

三座坟

在龍井坡頭三座相連蓋古墓也又在城塘側有坟一其碑題曰二旬獨孫墓八十老奶碑高墓後有坟一其碑題曰八公子九公子么姑娘滿姑娘俱無姓名年月可考

荔波縣志

營建志

建城設衛所以布政令而肅綱紀也荔城三面臨江羣峯環繞居中營邑足以控制各里鎮撫邊隅然編氓錯處與烏鼠為鄰文物聲明闕如也咸豐乙卯苗匪煽亂城池公署壇廟寺觀園亭坊表之類多遭焚燬朝廷用師討捕歷十餘年之久始廓清之迄今已修者不無變更未修者尚多廢墜遷徙建立過者有陵谷之感焉夫度地居民必視

土地之宜幽居允荒新豐是作者有明徵爰各著其處俾後之人有所考云志營建

城池

乾隆二年經畧張廣泗題請建設石城於蒙石里週圍五百四十六丈約三里二分高一丈八尺五寸有門四曰東旭曰西成曰南薰曰北拱同治五年燬於兵九年知縣錢壩重修添東門月城週圍約三十餘丈高一丈六尺掘永濟泉於其中居民汲之並以資保障焉

舊縣

萬厯間知縣劉邦徵詳請建設東西門二隸廣西慶遠府

方村縣

順治十六年知縣王家珍詳請建設置南北門二築土城百二十丈仍隸廣西慶遠府乾隆二年撫部院張公廣泗題請移縣治於蒙石里城遂廢

知縣署

署在城東大坪子大江前繞秀巖迴環氣勢雄偉同治五年苗變被燬九年知縣錢壩詳請改移於文廟左側考棚舊址創建上房五間過廳三間對廳三間三堂三間廂房三間

書房一間二堂五間廂房四間大堂五間書辦房六間儀門三間土地祠一間差房一間監獄三間頭門三間轅門二架甬壁一座

學署

署在城西文昌宮右側乾隆五年訓導戎輔建修道光二年訓導張星明補修明倫堂三間同治五年苗變被燬至今未建

捕廳署

舊在東門縣署右側同治五年苗變被燬十二年典史梁秉鈞改建於文廟左側荔泉書院舊址新修上房三間大堂三間儀門三間差房三間廚房二間頭門三間甬壁一座

遊擊署

署在城西大街右側乾隆五年遊擊李勳請帑建修丙寅春苗變被燬至今復建

守備署

署在城南大街右側乾隆五年守備萬安請帑建修苗變被

燬至今未建

千總署

署在武廟左側乾隆五年千總李正吉監修燬於苗至今未修

把總署

署有三一在舊捕廳基址對面一在校廠左側揚公井前斜坎上一在演武廳左側坎上即今縣署轅門甬壁一帶地也乾隆五年把總李正魁張少卿張奇傑等監修燬於苗至今

未建

方村縣丞署

署距縣城五十里順治十六年知縣王家珍創修乾隆六年縣丞方時寶補修同治五年苗變被燬至今已建

分防方村汛把總署

署在縣丞署下首乾隆六年把總吳得瑗監修苗變被燬至今未建

分防三洞汛千總署

距城九十里乾隆六年千總陳照先蓋修道光二十八年千總段兆錫補修苗變被燬未建

演武廳

在城西校場內苗變被燬同治九年署遊擊羅雲陞重修瓦屋三間聊蔽風雨而已

宮廳

在蒙古場內瓦房一間乃文武官鎮場之所同治五年燬於兵燹

接官亭

在城北二里接官坪知縣吳德容建修中泐毀匪辛酉陷城始末詩四首嵌石於壁丙寅春屋瓦被燬四圍牆壁猶存詩載藝文志中

養濟院

在文廟前左側乾隆五年知縣趙世綸請帑建修同治五年燬於苗

棲流所

在城東大坪子右側向條捕廳署外矮屋七八間同治五年燬於兵至今皆作民居焉

火藥局

在城西北炮台下瓦屋三間外有圍牆同治五年燬於兵至今未建

軍裝局

在守備署內同治五年燬於兵至今未建

兵馬司卡房

有五東西南北門四中央十字街一同治五年燬至今未建

四門城樓

乾隆五年造同治五年燬九年重修

四門炮樓

乾隆五年造同治五年燬至今未修

社稷壇

有二一在城北城塘右今祀之一在城東對河五穀廟左係舊縣老社稷方整端好四旁土阜環列若生成焉前人砌以

石脚今猶存

先農壇

在城北二里每歲仲春蒞斯土者率士民敬祀
於此示崇本也 先農躬耕

厲壇

在北門外右手空地俗名祭孤壇祭時迎 城隍行像於壇
上用紙書無祀鬼神等衆牌位列於壇下兩旁

文廟

在城西捕署右側同治十年補修詳學校志

慶祝宮

積年未建每遇慶祝等事悉於文昌宮預備

文昌宮

在城西文廟右側同治五年苗變被燬只存後殿三間至今
未建光緒初年改移於城東建奎星閣於其上

魁星閣

向在荔泉書院內堂樓上後移於文昌宮內桂香樓之上層

同治五年燬

武廟

有三一在城內東北隅乾隆五年遊擊李勳捐廉建修嘉慶十年遊擊慶喜補修咸豐辛酉年燬於兵知縣吳公德容重修增立

天子台四配兩廡泮池巒牆等制與孔廟同始改像設主同治丙寅苗變復燬至今已建一在舊縣舊街明萬厯間知縣劉邦徵捐廉創建今猶存然已有坍塌待葺處矣一在方村縣

署左側順治十六年知縣王家珍捐廉創修燬於同治初年之亂

荔泉書院

舊在文廟左側今改移於城東縣治舊址知縣錢堦建修詳學校志

城隍廟

有三一在城北隅乾隆六十年士民捐修咸豐辛酉燬知縣吳德容葺為課士之處分俸延師時復親臨面試同治五年

燬於兵九年知縣錢 堦重建一在舊縣明萬厯間知縣劉
邦徵創建同治中燬一在方村順治間知縣王家珍捐修燬
於同治初年之亂

龍王廟

有二一在東門外樟江岸上附郭臨江同治五年燬於兵至
今復建一在巴灰里砦龍岸上亦燬於同治初年皆未詳其

建始

五穀廟

有二一在舊縣田垵一在巴乃里棟塔村前

天馬宮

俗名馬王廟今其地改作縣署糧倉

名宦祠

在學宮內知縣楊以增有惠政人思慕之作長生祿位祀於
其中苗燮燬之今未設祭主

鄉賢祠

在學宮內向未設祭主

按荔波之有鄉賢祠由來久矣而未聞詳

題奉祀者豈斯鄉之無賢哉賢不自賢人又不知賢其賢而賢
遂湮沒不彰耳夫前代之不可考者勿論也第以晚近言之
亦自有生平事實膾炙人口而不愧鄉賢之目如孝廉方正
邱君樹桐者非其人歟邑人士心嚮往之然顯揚題達是所
望於上官姑志之以待合詞請命焉

昭忠祠

咸豐八年知縣吳德容始建於城隍廟左側十一年燬同治

二年吳公改建於武廟牆外五年城陷燬於苗

節烈祠

在東北砲台內昭忠祠後數十步祀失城死節婦女一千有
奇同治二年知縣吳德容捐修題聯云節殉危城垂名不朽
烈昭彤管視死如歸又云城市山林一塵不染鬚眉中國萬
古猶香額曰女中文夫五年苗燬燬

蔣公祠

在城隍廟後同治元年知縣吳德容捐修五年城陷被燬

寺觀

西峯閣

在迴龍山上祀文昌帝君同治初年燬

觀音閣

一在城中北門右高聳三丈餘一在董界里下廟村後一在巴乃里棟塔村俱燬於同治初年

壽佛寺

在城東大街同治五年燬即兩湖會館也

萬壽宮

即江西廟祀許真君在城北大街同治五年燬

玉虛宮

在城東大坪子即兩廣會館同治五年燬於兵

天后宮

在城西大街即福建會館軍興以來各廟皆被燬惟此廟及聖宮規模尚存

忠烈宮

在城北大街祀唐將軍南霽雲俗呼為黑神廟同治五年燬

火神廟
在忠烈宮內今燬

三界廟

在遊擊署址箭道中同治十一年邑宰錢 堦創修

蕭曹祠

倉神祠

皆在縣署內

土地祠

城中有五中央一四門各一燬於亂重修永齋

花婆廟

在城隍廟內同治九年邑宰錢 堦建修

園亭

月波亭

在城東門外樟江岸上咸豐九年邑宰吳公德容建修憑欄
四顧萬頃茫然令人有飄飄欲仙之概吳題鞅云月夜花朝

問閭闕可曾歌舞波平浪靜與賓客再作商量同治五年燬
且住亭

一名無不宜亭同治元年吳德容所建在節烈祠後竹深荷
靜淡雅宜人五年燬於兵

宜園

在武廟側方廣十餘丈名花百種曲徑通幽內有石硯蓮池
徵士董芝茂鵬詠處也有詩紀事詳於藝文志中今廢
義陽別墅

距城五里俗名蘿蔔木附生覃德輝讀書於此有詩詳藝文
志中今廢焉

可廳

在城東桂子橋上邑貢生李國材授徒處也有四景詳藝文
志咸豐辛酉燬於兵

明秀樓

在巴乃里再漂村

梯雲山館

在董界里內板麥村

時來館

在舊踪

結茆書屋

在巴灰里以上四處皆李生國材伴讀之所有詩詳藝文

東廬山房

我陽西出三十里有廬焉一帶清溪四圍薄霧松杉萬樹時看仙鶴往還茅屋幾間常有幽人來去乃李生國材棲隱處也其門人白朝貴賦有云論殺賊於遠鄉近土與君同哉將酬勞以尺柄寸珪曰吾老矣結句云先生不出吾又怪此多雲多水鄉也已觀此數語可想見其為人惜全稿不復記憶矣

坊表

張林氏節孝坊

在城北二里接官坪條邑庠生張國華之妻貢生張書銘之
母青年矢志撫孤成名道光二十七年 撫院賀 學院丁

題奏奉

旨建坊旌表丙寅燬於兵

蕭家三烈婦盡節亭

一名清白亭在城西演武廳側楊公井上邑宰吳公德容題
石表之曰清同古井四壁題甚夥有傳贊俱詳藝文志中

荔波縣志

食貨志

上出政以治下下出賦以供上古之制也然以全黔田賦不能當他省一大郡蕞爾荔邑更不足言矣而且闕無權稅以資經費民多胼胝以謀升斗其收成視勻屬諸州縣為尤薄我

朝恩膏普洽無遠弗届正供而外雜徭悉免豈非

聖天子嘉惠遐陬之至意歟况自道光三十年軍興以來倉儲

之度支既竭閭閻之待哺尤殷物產半湮場市非昔商賈罕通貨財難聚養其力而裕其源是在闕心民瘼者之木兩綢繆焉耳志食貨

田賦

糧田總數

糧田分數

俱遵定例茲不贅

地丁銀兩總數

地丁銀兩散數

蒙石里六十四兩七錢四分

時來里一十七兩內無耗銀四兩

董界里六十三兩七錢九分六厘

猗慶里二百零二兩五錢四分

巴乃里二百二十六兩六錢六分六厘內無耗銀七兩一錢

瑤台里一百七十六兩四錢七分內無耗銀九兩九錢

巴容里二十六兩

義蒲里二十一兩

三洞里九十五兩

恒豐里六十一兩

從善里四十二兩五錢
方村里一百二十五兩三錢九分五厘
羊安里三十一兩
周覃里一百一十三兩八錢內無耗銀十兩零八錢
巴灰里七十四兩七錢
羊奉里一百九十四兩五錢九分
縣屬一共十六里

額徵秋糧總數

秋糧散數

蒙石里

時來里

董界里

猺慶里

巴乃里

瑤台里

巴容里
義蒲里
三洞里
恒豐里
從善里
方村里
羊安里
周覃里

巴灰里
羊奉里

俱遵定例茲不贅

義倉

在文昌宮後道光中知縣覃武保建修札委貢生鄧而亭董芝茂邱樹桐倡捐倉穀三千七百餘石後因苗變此穀概充軍糧丙寅倉燬於兵遺址尚存光緒十三年奉文勸捐知縣宋澤春札委邑生覃金錫尹作書董其事計縣屬共捐義穀八千八百九十二批建倉一座穀存各里每年於青黃不接時借貸貧民還時加一分息作為添修倉費

縣屬十六里新捐義穀

猛慶里一千三百零五批

從善里五百九十三批

巴乃里一千零五十二批

羊奉里四百三十六批

巴灰里五百二十二批

董界里六百零四批

方村里四百三十五批

瑤台里六百五十九挑
恒豐里六百三十九挑
周章里四百九十挑
三洞里七百二十七挑
巴容里三百六十一挑
蒙石里四百零九挑
時來里三百五十三挑
義蒲里二百六十八挑
倉一座在城西荔泉書院前

羊安里四百七十五挑

稅課

積年未設

經費

每年請領

春秋祭祀銀

春牛花鞭銀

文武官俸薪養廉

馬步戰守兵糧餉

俱見定例茲不贅

戶口

俱見原額惟自咸豐乙卯苗變日就滅火存之以俟考
場市

蒙石里 蒙石場在城東外蛇猪日趕

巴灰里 巴灰場距城二十里鼠馬日趕

瑤台里 水利場距城三十里虎雞日趕

猛慶里 水扛場距城三十里龍狗日趕

毛蘭場距城五十里鼠馬日趕每逢趕集熙來攘
徑約四五十人

洞塘場距城六十里兔雞日趕

恒豐里 恒豐場距城七十里鼠馬日趕

周章里 周章場距城六十里牛羊日趕

三洞里 三洞場距城九十里龍狗日趕

從善里 猪場距城七十里逢猪日趕

龍場距城九十里逢龍日趕

方村里 甲梁場距城九十里牛猴日趕每逢趕集人烟輻

巴乃里 巴乃場距城六十里虎猴日趕

地莪場距城四十里牛羊日趕

拉歐場距城六十里兔狗日趕

拉圭場距城七十五里虎雞日趕

堯花場距城七十里牛羊日趕

巴容里

龍場距城九十里逢龍日趕

狗場距城九十里逢狗日趕

羊奉里

莫氏場距城七十里虎狹日趕

方村里

甲站場距城六十里兔雞日趕

董界里

河堤場距城村治北三里蛇猪日趕

巴樓場距城五十里牛羊日趕

王蒙場距城七十里龍狗日趕

巴仰場距城九十里龍狗日趕

瑤台里

高黑場距城七十里龍狗日趕

恒豐里

延牌場距城一百一十里虎狹日趕

周學里

板苟場距城七十里兔雞日趕

時來里

舊縣場

今廢

義蒲里
福村場距城十二里
虎猴日趕
水角場距城五十里
牛羊日趕

物產

穀屬

稻有紅白粘糯數種早收者可釀酒晚收者可供食
粳有早粳晚粳香粳白粳等名惟白玉粳實小而堅潔
粳白如玉谷味之中和無踰於此者
麥有大麥小麥香麥數種
高粱實大粟疎宜於山上釀酒味極佳
菽有苦甜二種歲可二三刈
荳有豌豆扁豆黃綠黑紅飯蚕數種

芭穀 結芭而生一株二三芭不等平陸高山皆可植二三
月 下種五六月即收芭色山多田火惟恃此以度荒月
芝麻有黑白鱗色數種惟鱗色者入藥功力最勝

小米有粘糯二種
稗性不畏旱有紅毛二種食之耐飢

薏苡仁

蔬屬

韭 薤 菘 菘 白 蘿 卜 青 菜 蒜 片 菠 菹 葱

甕菜狀如菹菜蔓生茹蒿菜 萬筍 茹其形實圓而嫩味美
以種植於空柔脆可茹五里之外 旗菜味甘微酸莖白朮俗名脚板
則本實俱變亦異事也 刀豆 葉皆如芋味甘滑蔬中真金
牌莢筍 慈菘 芥菜 刀豆 刀故名芋之佳品也

菓屬

梅 桃 李 杏 橘 榛 栗 楊梅 林檎 柿 花

板粟 錐栗 茨菰 救軍糧 甘蔗 胡桃 橙 柑

枇杷 櫻桃 橄欖 木瓜 花紅 石榴 地瓜 黃菓

似橙而小經霜肉甘支 薔 有水晶紫落花生處可榨油

微酸菓中之佳品也 薔 有水晶紫而微尖經山荔枝微酸

長生菓不凋清香芬烈結實有千葉蓮花者有珍珠李

出巴峇冬佛手柑如香芬烈結實有千葉蓮花者有珍珠李

扣樹而色赤味極甘美 桃 每歲立春以李樹接桃則李核

而桃實好事者每 香 緣 實 如 長 生 菓 而 微 大 味 甘 香 食 之 栽 秧

植之以爭美云 香 緣 實 如 長 生 菓 而 微 大 味 甘 香 食 之 栽 秧

李時熱甘脆大可食 牛 心 李 狀 如 牛 心 微 囊 有 大 小 梨 有 青 黃 黑 清 香

勝香水梨遠勝於諸梨 烏 梨 肥 美 食 之 可 除 熱 痢 諸 梨 之 上

品茶泡結實於茶樹生青熟紅其色鮮艷者如碗小蜜臘

也松脆而圓如天經霜冬桃始熟味清甘脆不可多得 白 菓 相 傳

多在於丑寅三時開人罕見之北街忠涼粉菓 頃 刻 有 蘇 木 二 種

其宮庭前有長內粒蓋可餘年物以冷水揉漬之 頃 刻 有 蘇 木 二 種

凝結如冰而微長內粒蓋可餘年物以冷水揉漬之 頃 刻 有 蘇 木 二 種

凝結如冰而微長內粒蓋可餘年物以冷水揉漬之 頃 刻 有 蘇 木 二 種

凝結如冰而微長內粒蓋可餘年物以冷水揉漬之 頃 刻 有 蘇 木 二 種

凝結如冰而微長內粒蓋可餘年物以冷水揉漬之 頃 刻 有 蘇 木 二 種

凝結如冰而微長內粒蓋可餘年物以冷水揉漬之 頃 刻 有 蘇 木 二 種

凝結如冰而微長內粒蓋可餘年物以冷水揉漬之 頃 刻 有 蘇 木 二 種

木屬

食鐵里善裝值檀著側樹松
 之物山里物土四光地有柎屬
 止結龐三不崩騰潤即一柎
 心于 洞 腐 而 竿 而 生 株 黃
 腹如香以之良堅根大楊
 氣龍樟之 以 物 作 倒 可
 痛眼盤枝作之器捲圍黃柎
 千根葉冥作杉而抱檀
 年結圖器用惟有上蒼桐
 矮成如蓋不遠杉杉不翠絲
 木樹葡蓋經朽夏微杉紅不翳梨
 可甚難雲冬馬大杉若亦徐脫柳
 檀長龍不凋松本杉奇絲皮龍
 構形數於五埋油物絲櫟
 皮製百年琥者土白 垂 櫟
 樹為年琥者土白 垂 櫟
 葉樹大可等下千窖二椿惟無
 可高心可數項有百杉種有香門
 飼二光數項出炭年數身卡
 不潤圍出炭年數身卡
 皮文可其從苓偶種紫

漿可作
 可作膠
 物質良
 材可入
 藥也
 水楊柳
 可發瘡
 扁柏可
 醫疾

竹屬

紫竹

白竹

金竹

苦竹

茨竹

樓竹

南竹

水竹

毛竹

慈竹

實心竹

泡竹

竹可作

四方竹

羅漢竹

釣

絲竹

端聳直上枝稍長細下垂故名大可作柱小可作器用筍肥而甘脆可鮮可乾其用宏矣

花屬

牡丹

芍藥

海棠

秋海棠

木筆

蒙花

夾竹桃

薔薇

繡毯

鳳仙

芙蓉

蘭

桂

蓮有紅白金

種玉薔

臘梅

水仙

龍瓜

木梨

山茶

紫薇有紅白者

荊

雙石榴花如單瓣石榴而大不結實其花有邊紅白者

有瑪瑙色者有全紅

不結實其花有邊紅白者

色者花開甚為耐久

醉楊妃

萬年

仙人掌

芭蕉

紅梅

結實而

月月紅

醉楊妃

萬年

松

蔓生葉綠花紅綽灼可愛

黃飯花

滿山紅

草屬

大草 紫草 白茅 黃茅 蕨有苦甜二種可食 麻 芸 香草
巴莽茶 葉菸 接骨草

藥屬

山藥 前胡 小茴 車前 沙參 何首烏 益母 金
銀花 南星 半夏 石菖蒲 茯苓 伏神 琥珀 金
釵石斛 天門冬 仙茅 黃精 厚朴 黃柏 文蛤
牽牛 桔梗 麥冬 牛夕 素朴 靈仙 萬年青 通
草 天花粉 馬鞭草 山漆 土藥 山梔

蔓屬

清風籐

血籐

入藥可治血病

青剛籐

嫩時可茹

葛籐

草屬

香草

有冬春二種
冬者較肥美

凍草

雞肉草

味如雞嫩故名

而

松茅草

茅草

草

木耳

金石屬

鐵出程度
生等處

硝出山
石陰濕處

瓜屬

南瓜
香瓜

東瓜
花木瓜

黃瓜

白瓜

苦瓜

葫蘆

西瓜

出三
里等處

禽屬

鷗

鷺

鷹

隼

雉

杜鵑

鷓鴣

鷓鴣

鷓鴣

鷓鴣

鷓鴣

鷓鴣

燕

金雞

竹雞

秧雞

鴛鴦

鴛鴦

鴛鴦

鴛鴦

鴛鴦

鴛鴦

鴛鴦

鴛鴦

雀

山鷓

話媒

鳩

鴛鴦

鴛鴦

鴛鴦

鴛鴦

鴛鴦

鴛鴦

鴛鴦

鴛鴦

毛每

立必

拳一

足性

拙終

日采

立河

岸候

有飛

鳥啣

食偶

落始

獸屬

熊

狗

人

馬

豹

豺

狼

兔

猴

草狐

牛

馬

羊

犬

豕

豕

貓

箭猪

鬃猪

野猪

鱗介屬

鯽

鱧

鯉

竹鯉

七星魚

螃

蝦

田雞

山鱧

鱉

油魚

青魚

草魚

易上肥人多以池蓄之極

鱸

鱖

魚

於美勝

秋魚

刀鱖

布帛屬

斜紋布

出三洞

青布

花椒布

織絨

棉花

描錦

荔波縣志

學校志

學校興則師道立師道立則善人多善人多則風俗厚自古然矣哉

國家文治光昭比隆三代海嶺山陬頌詔建立學校以廣教化而育人才典至隆也按荔波設學始於乾隆二年第規模草創因陋就簡一切制度典章闕如也迨後賢明府次第蒞任改建

聖宮以培文風創立書院以陶士類一時人文蔚起雖未能振巍科登俊選而經明行修代不乏人夫以荒陬僻壤之區一經薰陶樂育而聲明文物與諸郡比美然則風教之盛衰闕乎學校之興廢不洵然歟志學校

國朝乾隆二年督撫太憲

題請設縣學奉

旨依議令建

學宮檄委知縣呂瑛儒學戎輔度地卜基得城之西街右側
山坤向兼丁亥丁巳分金規模畧備乾隆四十六年顏圮
知縣吳基龍重修札貢生巫璠廩生傅國斌董其事嘉慶
中知縣蔡元陵武占熊相繼培修道光中又圮知縣蔣時
淳重修札貢生董芝茂邱樹桐李國材庠生林春芳覃德

輝高鳳翔等董其事興工於道光二十二年告竣於咸豐
元年規模宏敞頗壯觀瞻同治五年城陷半燬於兵九年
知縣錢壘補修

書院

嘉慶十九年知縣蔡元陵創修題其額曰荔波書院二十四年知縣武占熊繼修道光八年知縣楊以增復增修魁星閣五間講堂五間齋房九間同治五年燬於兵十年知縣錢壇改建於城東縣署舊基新修上房五間廂房十間正中三間前門三間光緒元年知縣蘇志廷為書荔泉書院四字

學額

乾隆二年題設荔波縣學額進八名廩生四名三年一貢令止廩生二名生員四名不知何時裁減姑存之以俟考

典禮

慶賀禮

萬壽節文武大小各官俱遵會典設香案朝服望

闕行三跪九叩禮為俱於文昌宮內行禮

開讀禮

凡遇頒到

詔書地方官員遵照會典具龍亭綵輿儀仗鼓樂出郊迎接至文

昌宮開讀

釋奠祭器

爵

釧

和籩

盛祭器

豆

盛祭器

黍

籩

盛祭器

牒

香爐

燭臺

盤

祝版

霽

酒杓

高燈

提燈

脚

神庭燎

緞洗

中乾隆

二年開學

原置竹版

一竹籩

二百

錫

二十木豆二百二十錫爵一百二十錫燈一錫釧十二錫籩六十鐵燎二盛木櫃藏於學署咸豐十一年髮匪陷城燬於

共

樂器

積年未設

樂舞

積年未設

祭品

牛一

羊八

豕八

太羹

和羹

黍

稷

稻

形鹽

犒魚

芹

蕨

白餅

黑餅

榛

菱

脾析

豚胎

迎春禮

每歲立春日有司遵依會典迎春於東郊出土牛

救護禮

凡遇日月食文武各官遵照會典依部頒欽天監推算時刻於本衙救護

宣講禮

每月朔望日文武教職各官遵照會典咸集公所宣講

聖諭十六條曉諭士民人等

鄉飲酒禮

每歲遵照會典於正月十五日十月初一日於學署行鄉飲酒禮

賓興禮

凡三年鄉試舊例縣官於諸生赴省前期七日延集錄科貢監生員行賓興禮

送學禮

凡督學歲科兩試取進文武新生舊例紅案發到之日縣官送新生入學肄業行送學禮

賓見禮

縣屬各官相見照依頒定儀注行禮

義學

本城

舊設養正義學在西門大街係道光中貢生鄧而亨鄧連萃董芝茂耆民邱榮光唐文光等十八家捐修每年秋收附郭甲乍拉邑田穀約二百餘秤以為修脯延師教讀城中貧家子弟自庚午年復城後學館被燬此穀歸入考費已數年矣

荔波營義學在遊擊署頭門右側每年係在遊擊捐廉延師教
營中兵丁子弟

建設各里義塾田穀章程

新設養正義塾在城中十字北街每年館穀一百挑由瑤台
董界巴容等里分撥運入

新設移風義塾在從善里羊拱村每年館穀一百挑由該里
田穀運入

新設崇儒義塾在義滄里水調村每年館穀一百挑由該里

田穀運入

新設扶文義塾在周覃里周奉村每年館穀一百挑由該里
田穀運入

新設尊經義塾在徭慶里板寨村每年館穀四拾叁挑由該
里田穀運入餘者撥入董界里

以上五里義塾乃光緒元年知縣蘇忠廷建設每處館穀一
百挑每挑重捌拾斤將從善等里呈繳之送產絕業房屋田
畝招佃耕種每年收租穀延師教讀各里子弟案存縣署

謹將各里送產絕業房屋田畝數目附錄於左

周覃里

一 周崩村周朝亮送產一分計孔抹田三坵出穀十挑外當曹姓田三坵出穀三十五挑周朝進具結耕種每年秋收呈繳租穀二十挑每挑重八十斤外有瓦房三間以作義館係保正覃玉寶文珍兆團長周仕達牌長周玉龍等具結承孰是問

一 波花村覃毓金絕產一分計拉后田大小十三坵出穀一百

挑覃錫芳覃阿龍具結耕種每年秋收呈繳租穀三十挑每挑重八十斤餘穀以作祭掃之費牌長陳懷珍承孰是問

一 板盤村覃國榮絕產一分計拉点田五坵出穀五十挑潘阿當具結耕種每年秋收呈繳租穀二十五挑每挑重八十斤

一 拉宰村陳大鵬絕產一分計拉考田五坵出穀六十挑周阿的具結耕種每年秋收呈繳租穀十挑每挑重八十斤餘穀以作祭掃之費團長覃國才牌長陳懷玉承孰是問

一 板光村覃文亮絕產一分計拉^{項早}瑞田四坵出穀五十挑覃福

宣具結耕種每年秋收呈繳租穀十挑每挑重八十斤餘谷以作祭掃之費團長覃國榮牌長覃育才承航是問

一、下拉苑覃把物絕產一分計的看田一坵出穀二十挑覃阿奪具結耕種每年秋收呈繳租穀五挑每挑重八十斤餘谷以作祭掃之費團長覃國榮牌長覃福先承航是問

以上周覃里逸絕產六分共計田三十四坵出穀三百二十五挑每年應收租穀一百挑瓦房一向三間此項田穀運入扶文義塾

菽蒲里

一、毋响村吳阿頭

結吳朝新等絕產一分計的毋田九坵雅

三坵把田七坵共出穀七十九挑吳阿揚具結耕種每年

秋收呈繳租穀三十六挑每挑重八十觔保正吳三吉團長

吳士應牌長吳阿領承航是問

一、班約村吳阿玉絕產一分計雅瀨田三坵丙同田二坵雅

田四坵門樓寨脚田二坵共出穀三十六挑吳阿納具結耕種每年秋收呈繳租穀十四挑每挑重八十觔外瓦房三間

以作義館並着吳邦吉之弟阿乾捐錢二十千文交鄉正吳
三吉培修以期堅固團長吳阿喜牌長吳阿年承就是問
一母响村吳邦吉逆產一分計雅頰梅務田二坵沃恒抵重田三坵雅標雅標
田五坵雅標田三坵共出穀一百零三挑吳阿等具結耕
種每年秋收呈繳租穀五十挑每挑重八十斤團長吳阿想
牌長吳阿承就是問

一水庇村吳阿問絕產一分計抵更田六坵出穀十九挑吳阿
華具結耕種每年秋收呈繳租穀五挑每挑重八十斤餘穀

一以作祭掃之費團長吳平牌長吳阿問吳阿厄承就是問
水退村張子華絕產一分計現耕風瑤樹炒瑤樹田故門田故門

共十八坵出穀一百挑吳阿梅具結耕種每年秋收呈繳租
穀五十挑每挑重八十斤山土二幅免租下餘荒田二十七
坵約出穀八十挑飭令該里鄉正等具結永認招耕限定光
緒元年上半年租谷十挑二年年上二十挑三年上四十挑以後永
定均是每年秋收呈繳每挑重八十斤外有荒田十三坵約
出穀二十挑並山土八幅准給假子陳三耕種以作祭掃之

費俟後如有修絕產總祠仍在該民田土內擇選地基不敢
異言牌長吳登喬吳阿胖承孰是問

一 水錯村段三絕產一分計現耕小路田打共四坵出穀七挑粟
阿崩具結耕種以小路坎下二坵入公每年秋收呈繳租谷
二 挑餘給嫁女吳段氏管業以作祭掃之費外有荒田十五
坵約出谷五十挑飭令該里保正等具結承認招耕限定光
緒元年不上租三年起平半分花園長吳登榜牌長吳阿福
承孰是問

以上義蒲里送絕產六分共計田一百一十三坵出谷四百
七十三挑光緒元年收租谷一百六十七挑二年收租谷一
百七十七挑三年起每年應收租谷二百二十挑外瓦房一
向三間

瑤台里

一 水利高寨吳老貨送產一分計恒邑田二十一坵出谷十二
挑吳阿關具結耕種每年秋收呈繳租谷六挑每挑重八十
斤

一 抵桑村吳元剛逸產一分計古頓田十九畝古楊荒田三畝
共出谷四挑吳國鳳具結耕種每年秋收呈繳租谷二挑每
挑重八十斤保正吳倍德團長吳長受牌長吳興鳳吳廷富
以上瑤台里逸產二分共計田四十三畝出谷十六挑每年
收租谷八挑

瑤慶里

一 珍有山張滿絕產一分計波羅田七畝出谷六挑丁三具結
耕種每年秋收呈繳租谷三挑每挑重八十斤保正姚椿園

長歐光明牌長姚廷鳳等承孰是問

一 板寨姚之屏呈繳伊兄逸產一分計米克田十四畝拉江田十畝保涯田八
坵共出谷四十八挑仍令姚之屏具結耕種每年秋收呈繳

租谷二十四挑每挑重八十斤團長歐光明牌長姚士明

一 板寨姚文兆呈繳伊兄逸產一分計田十一畝出谷三

十二挑仍令文兆具結耕種每年秋收呈繳租谷十六挑每
挑重八十斤外瓦房三間兩廈以作義塾館團長歐光明牌

長姚士明承孰

以上瑤慶里絕送產三分共田四十二坵出谷八十六挑每年應收租谷四十三挑

巴容里

一水棒村蘇喬福繳出伊伯蘇有龍絕產一分計大小榜田五坵出谷十六挑仍令該姪具結耕種每年秋收呈繳租谷四挑每挑重八十斤餘谷以作祭掃之費

一拉先村莫起鳳絕產一分計地比小田九坵出谷五挑潘阿求具結耕種每年繳租谷二挑每挑重八十斤圍長潘長順

地埃村潘阿用繳出吳起鳳絕產一分計地埃田三坵出谷三挑仍令該氏具結耕種每年秋收呈繳租谷一挑半每挑重八十斤圍長潘金仁牌長潘阿洪

以上巴容里絕產三分共田十七坵出谷二十四挑每年應收租谷七挑半

從善里

一水梅村潘新簡送產二分計母容田一坵出谷五十挑潘漢青具結耕種每年秋收呈繳租谷二十挑又的成門田四

坵出谷三十挑潘阿省具結耕種每年秋收呈繳租谷十四挑每挑重八十斤保正潘文龍具結承就

一 果火村潘堂大肚逸產一分計果火田十八坵出谷一百挑潘學弟具結耕種限定光緒元年繳租谷二十挑二三年繳三十挑以後永定每年秋收呈繳租谷四十挑每挑重八十斤外給耕牛一隻保正潘元章

一 水迭村劉老八絕產一分計打恒田二十坵出谷五十挑潘學賢具結耕種每年秋收呈繳租谷二十挑每挑重八十斤

外屋基田共六坵准給假子韋老彪營業以作祭掃之費保正潘文龍圍長潘引包

一 水迭村羅大亦絕產一分計雅用田田九坵出谷三十挑潘學弟具結耕種每年秋收呈繳租谷十五挑每挑重八十斤保正潘元章

一 白章溝王 祥絕產一分計雅用田田四十一坵出谷三十挑楊光前具結耕種每年秋收呈繳租谷十五挑每挑重八十斤外荒田十坵俟開墾後稟請議租保正潘文龍

一水 村田老先絕產一分計老新屋基田二十坵出谷五十挑毛正品具結耕種每年秋收呈繳租谷二十挑每挑重八十斤外山土一幅免租保正楊邦賢

一水 董村罷在德絕產一分計推斷田八坵出谷三十挑潘廷璋具結耕種每年秋收呈繳租谷十五挑每挑重八十斤保正潘元章

此里選絕產十四分共計田一百二十三坵出谷四百五十挑光緒元年收租谷一百七十五挑二三年收谷一百八十

四挑以後每年應收租谷一百九十四挑

以上總計絕田共三百七十二坵出谷一千三百七十三挑光緒元年應收租谷四百九十九挑半二年應收租谷五百一十九挑半三年應收租谷五百六十四挑半以後每年應收租谷五百七十四挑半外新舊瓦房三向九間兩履又早拱村楊邦賢義捐瓦房三間以為該處義館

一三 洞里河東塘馮姓絕產一分計河邊田十五坵出谷三十挑鄉正潘文秀具結承認耕種作為該處都荔交界義渡渡

夫口食並請附於末以備查

一董界里拉冷村何引金絕產一分計拉冷田三十六畝出谷

七十挑何授甌承認耕種每年秋收呈繳租谷三十挑

一巴乃里地栽村吳孔成送產一分計拉成田五畝出谷十三

挑吳士鳳承認耕種每年除上糧外呈繳租谷五挑每挑重

八十斤

增設義捐

一同仁義塾在本城東街荔泉書院左廂係城中老戶捏告地

基府縣定議章程抽收入城新戶覃瑞模等地租錢五百十
文自光緒元年十月初一日為始暫作生息對年可得息錢
柒拾伍十文儘數一館未修之費俟有餘款再置田業以期
久遠而杜爭端知縣 書給匾額名曰同仁義塾

一揚清義塾在巴乃里播遠場係孀婦黎莫氏義捐浪抹用沙
等處田一百三十二畝每年約出谷二百餘挑並捐造瓦房
三間其田畝租息係鄉正莫際和黎士祥武生莫汝霖黎時
雍等承認耕種用作束修知縣 書給匾額名曰揚清

義塾並黎莫氏節義流芳四字

一善成義塾在瑤慶里水扛村條州同蒙玉相義捐塘鴨等處
田一百三十一挑條蒙阿細姚錫光覃引包等經理並捐賑
項錢一百千文交蒙老文承領生息以作修館之費知縣

書給匾額名曰善成義塾

以上三塾俱由知縣

增設其田畝租息細數卷宗存

縣

義塾章程

某處義塾門外懸某處義塾匾額塾中供

至聖先師牌位傍掛義塾條規木榜一塊外貼本縣告示一張以

禁閑雜人等

一設立義學原以課士非以濟貧所以各處館師聽值年紳士
及學中公議務擇品學兼優之人以為塾師方足以振文風
而端士習勿得徇情濫延耽悞子弟

一義學專為作育人才而設使之讀書識字相習為善俊秀者

因是資其振拔愚魯者亦可啟其聰明塾師果能盡心教導善誘循循俾皆化為禮義之鄉有司官當不時獎勵以為善教者勸

一每月朔望各生徒於

至聖先師位前拈香行禮再向塾師行禮

一館中每日經史古文詩文塾師必須勤於訓導量才引掖每日功課彙齊送縣以驗館師之勤惰子弟之優劣

一館中生徒必須謹遵師長功課條規如有不遵約束不知改

過及子弟之父母有過為呵護者即將該生徒逐出

一館師訓課宜勤方有效驗如有出外閑遊曠館不到或在館中呼朋引類飲酒賭博者即時辭去另延名師仍按其在館月分給以脩脯毋許多索

一義學田畝宜舉清直公正紳士協同各里首事經營並酌給薪水以養其廉至館師脩脯按節致送毋得侵蝕違者稟官

究治

一義學田經本縣詳明註冊墓入志書彙存縣署不許當賣違

者照盜典盜賣治以應得之罪

一耕種佃戶皆由管理紳士及各里首事經管勿許拖欠如有
欠租者稟官追究其有所收租谷每年終由管理紳士及各
里首事開列收支清單具呈報銷存案

入生苗與巴容里首尾相接 大憲檄委千勝統兵至荔防
勦知縣錢堦札典史梁秉鈞外委蒙培蘭運糧通道進克烏
溜家牙等寨悉捕餘黨誅之苗民懾服盡繳其鎗弩器械納
欵投誠

二月鄧千勝率師勦麻羊山莫榮熙小名七金南丹土州之
疎族乘亂竊據麻羊山以叛 大憲檄千勝以兵會粵西官
兵勦洗飭典史梁秉鈞外委蒙培蘭運糧札巴乃里夾馬關
以濟官軍黔粵官軍合勦搗其巢穴擒之師旋荔波平



黨固守金城關路險峻賊以大木橫截小徑鑿孔以施火銃防範嚴密我軍攻之進而復却何元鳳躬率前鋒以花筒火炮攻賊賊潰我師入關分勦姚古水扛土匪悉平之進營於縣治之東北等處

夏四月粵軍擊賊於巴灰大破之高九王潘新簡潘老帽吳邦吉翁昂退據巴灰之交曹村樹立寨棚以拒我軍提督馮子材遣降賊汪大便為前鋒官軍繼之戰於平礮賊潰盡委其輜重遁歸九片

同月何元鳳巡瑤台進攻方村皆下之提督馮子材遣副將何元鳳攻勦瑤台方村土匪元鳳至水利擒偽三里王吳三畏吳元剛吳國彩韋國華吳老冬吳老八等磔之於舊縣吳邦吉陷水堡邦吉等敗歸九片糾合潘新簡逆黨燒燬水甫投誠狄夷民居以覘我軍進止候補道吳德容知縣谷應賢率師至荔吳德容谷應賢聞粵兵既至由獨山瑤台星夜至荔會之並營於城之西北提督馮子材率師還粵提督馮子材既破賊斬賊首覃學養覃汝為等於西城外由巴灰董界出

南丹河池歸粵候補道吳德容退屯獨山提督馮子材既西
吳德容亦率楚勇退屯獨山以圖再舉潘新簡吳邦吉復攻
城知縣谷應賢擊却之賊以大軍既退乘夜由北門入城至
文昌宮谷應賢率壯勇百餘人擊之天曉賊復遁歸水堡應
賢以孤軍難立拔營還瑤台

夏五月潘新簡吳邦吉墮荔城賊以我城尚在終為彼患率賊
黨數千人掘掘城垣兵練擊之始退

秋八月督辦獨荔軍務候補道吳德容援荔波次於舊縣荔城

荒廢十里之外皆為賊壘遊擊鄒玉林守備董用威同圍首
壘端模等固守白岩洞以待援軍而賊復四出攻掠吳德容
聞警帶疾由獨山沿勸方村一帶土匪進屯舊縣以圖恢復
九月大兵攻九阡敗績督辦獨荔軍務候補道吳德容卒於軍
德容分遣粵西壯勇各里團勇進攻九阡破其七寨因援師
不繼潰於水郭死亡將士數十人值德容病重遂以憂卒
董成烈曰自干戈雲擾公以一身係吾荔之安危者殆八年
既而滄桑屢變時事日非猶奮然提一旅之師誓欲滅此朝

食其志可謂壯矣雖大功未就而旋即告終然公歿二年而王師至三年而醜虜平是天付公以大任問其先不必待成功而後顯也

冬十月副將何元鳳敗賊於毛蘭副將何元鳳營於瑤慶里之毛蘭扼賊要害賊首潘新簡等率逆黨數萬人攻之元鳳偃旗息鼓閉營不戰俟賊稍懈出奇兵奮擊大破之賊復晝夜攻圍元鳳隨機應敵賊智益窮退走九阡於是瑤六水慶等處皆降

八年己巳夏四月官兵攻水洞平之特巴灰土匪盤據水洞以叛粵兵以火攻之燒殺數百人餘賊悉降

夏六月署縣事高荃遊擊鄒玉林攻水扒破之偽黔粵王姚其登乘亂攻劫各里粵兵復荔退據瑤慶之水扒卡負固不服高荃遣練攻其前其登率眾抵敵鄒玉林出奇兵由小徑焚其寨棚遂破之其登遁走生苗

秋八月粵西總兵孔憲隆副將潘其泰率師討九阡擒賊首潘新簡吳邦吉誅之粵西總兵孔憲隆由周覃攻其北副將潘

其泰由巴容攻其南荔營遊擊鄒玉林由水息攻其東其泰兵至水慶潘新簡糾衆相拒其泰大敗之搗其巢穴居二日而孔兵至遂連營而進破其要隘墮其偽都賊黨擒新簡邦吉以降解送粵省磔之九阡平改九阡里曰從善里

九年庚午春三月苗匪陷瑤台賊自台拱下窳攻獨山之翁奇不克遂由羊奉進據瑤台花村之板揚寨延燒民居攻打碉卡勢熾大張官兵敗績於板揚知縣錢堦聞警檄調各里壯練百餘人擊賊於洞覽敗之賊以我軍精銳設伏偽遁官練

追之賊四面合圍死傷八十餘人賊分路攻恒豐圍練敗之恒豐里據上流恐襲其後率逆黨數千攻之圍練依山結營賊不敢逼復出奇兵截其中後賊敗退歸花村賊分路攻水岩粵兵擊却之賊四出攻掠由瑤台里之水利場進攻蒙石里之水岩寨適粵兵數百至往救之賊乃退粵兵擊賊於板揚破走之粵兵乘勝逐北連日攻之斬獲數百人賊潰走生苗餘黨悉散

十二年冬十月總兵鄧千勝率師剿生苗時黔疆下游餘匪窳

八等作亂燒殺漢民佔田土一時稱王僭號者不可勝紀
自方村至瑤慶百餘里道路不通者累年

冬十一月署縣事王子林與賊戰於甲棒失利而還時方村大
路不通王子林由羊奉巴乃進屯舊縣遣兵攻水扛官兵失
利復因糧盡退歸羊奉

冬十二月吳邦吉攻甲梁圍兵擊敗之邦吉既據瑤台率逆黨
入甲梁以窺猶山圍兵前後截之棄其輜重而逃
同月署縣事鍾毓材督練復荔波遇賊於董界敗績死之鍾毓

材率壯練數百由巴乃出董界欲招號各里以復縣城營於
董界寨馬村之後山遇賊數千圍之我軍遠來疲敵遂潰與
隨行兵勇俱戰死

六年丁卯春三月粵西提督馮子材率師援荔敗賊於金城關
進屯縣治下河賊首高九王潘老帽九什賊首潘新簡吳邦
吉等攻掠廣西南丹之翁昂圍急馮子材自懷遠來援賊退
走巴灰子材分遣副將何元鳳遊擊宋福慶等開通黔粵大
路進攻黎明關破之降賊將汪大變偽輔德王潘新簡調賊

阡林匪及奸棍與之開市所益不貲賊所以坐困不解者寔原於此

五年丙寅三月丁亥日苗匪陷荔城屠其民知縣彭培垣遊擊范定邦訓導趙旭等死之時城中糧盡援絕人皆掘草根摘木葉為食固守不下適有叛卒降於賊賊盡知城中虛實攻圍益急值食盡守陣者困卧不起賊乘夜攻入西城培垣等率殘兵抵敵敗潰遊擊范定邦守備劉學武血戰培垣同其弟投泮池死訓導趙旭帶侄投河自盡賊恨荔人不降悉屠

之荔城生齒萬餘及賊退存者不滿二千荔波受害此為最慘

秋八月瑤慶水扛賊陷荔城城自破後城垣公廳民居毀於賊署縣事胡永春撫輯遺民居之水扛賊乘我軍弱連月陷城居民潰而復聚者三圍首覃端模等率難民入白岩洞據險以守而賊復與巴灰等里土匪連和荔事自此不可為矣
冬十月九阡賊吳邦吉潘成章據瑤台獨荔道梗賊勾引水利方村水岩土匪吳阿東吳國彩吳元剛吳三畏韋國華吳老

冬十月下河賊高九王潘老帽入荔波大掠而還時團務廢弛人無鬪志而奸宄以羊奉諸里殷富勾引高九王等萬餘人下甯羊奉巴乃巴仄瑤慶時來蒙石等里進逼城垣各處居民望風奔潰伏於岩穴山中遇害者不可勝紀什物器械委棄山積賊飽載由方村退歸巢穴

五年丙寅春二月庚子高九王潘老帽復圍城高九王等欲窺粵西以我荔扼其衝要議復大舉糾集逆黨四萬餘人由方村分五路進攻縣治

十四日賊攻城東南隅不克賊盡銳攻城值城中武備空虛兵民惟以磚石擊賊賊退築長圍以困我軍

三月乙卯署都勻府事獨山州知州吳德容遣兵援荔波與賊戰於黃泥坡敗績長子吳江死之德容聞荔城圍急飭長子吳江率壯練千餘人來援一由水岩入北門衛城一由花鉢開通大路至接官坪黃泥坡賊眾圍之數重江潰圍而出手及賊首數人歿於陣賊分路隘廣西賊四面合圍復分兵破瑤慶入思恩擄掠人畜無數往來搬運者不絕於道既而九

二十一日髮匪陷荔城守備曾玉麟千總王化龍等死之時吳德容防堵在外城中虛空子刻賊雲梯火炮攻城陷守備曾玉麟千總王化龍等血戰死閩城官紳兵民婦女遇害者三千餘人

署三洞汛千總蒙玉璉敗賊於甲棒賊據荔城四出攻掠各里莫敢攖其鋒玉璉率壯勇數十人敗之於甲棒卡殺賊首三人軍勢為之一振

春二月知縣事吳德容復荔波縣賊陷縣城知縣吳德容至方

村聞警檄調各里團壯勇及獨屬團練數千令千總莫芝茂統之進屯板瑤賊野無所掠燒官廳民房數百間由周覃三洞下窺古州吳德容至城掩骸骸恤死亡補城垣修公署輯難民嚴武備軍聲復振

同治四年己丑夏四月流賊陳尚傑陷牛場粵西副將楊廷貴拒敵於三洞大破之賊由湖南窺入古州至獨山之牛場勢將下荔粵撫飭廷貴等入荔截之進屯三洞粵兵盡銳與之角賊始遁

夏四月覃大士據羅布木我軍大敗之覃大士等敗歸九什憤甚復糾逆黨數萬進屯羅布木初一交戰我軍不利知縣吳德容飭千總王化龍軍功莫芝茂統領瑤慶恒豐巴乃壯練擊之賊敗走斬獲百餘級追至水春而還賊自是不敢復西矣

冬十月官兵攻九什水太等處降之把總汪逢春歿於陣九什我蒲巴容等處依山傍林碉卡險峻知縣吳德容撤三洞汛千總莫芝茂等勦之把總汪逢春奪幟先登勦兵繼之據其

要隘賊乃降逢春中傷而卒蒙培殺覃大士以降誅之大士與培因小忿不睦復因屢敗賊酋不聽其計培與弟龍生龍福三保遂殺覃大士以降邑宰吳德容誅之於城東

十一年辛酉春正月庚戌髮匪竄荔官兵敗績於巴灰賊遂圍城髮匪余鵬子由定番下竄南丹復由董界竄入我境官兵擊之時賊勢浩大我兵潰走賊道攻西門不克

正月辛亥日東門失月城賊分據附郭波遠寨等處攻破東門月城以悍黨守之

奪幟五桿被伏賊鎗傷頂心而死值天暮賊與我軍對壘
礮如雨化龍以大桿圍河岸燃火繩於側以為疑兵至夜乘
賊不備分途率精銳切其營斬賊首百餘級殺賊衆十餘人
餘賊潰散論者謂自賊攻城此舉為武功第一

冬十二月圍民軍大士蒙培謀叛大士舊縣南塘人蒙培西門
外波遠寨人因隨征蒙阿林黃金亮黃起鳳等有微功遂放
誕自恣復以功大賞薄不滿其欲同弟蒙龍生蒙三保等勾
引奸棍葉保壽鍾老吉等為內應約於十二月二十八夜陷

城天將曉賊已至楊家橋值賊內應鍾老吉等於城內放火
未幾知縣吳德容遊擊范定邦督千總王化龍擊之賊敗走
未幾內應事洩斬奸棍葉保壽等十三人於城東捕大士等
不獲逃遁九什

十年庚申春正月覃大士攻城敗之大士與蒙培勾引九什逆
黨萬餘人乘夜半至楊家橋攻城北我兵堅守不出天曉瑤
慶恒豐壯練擊之賊敗走追至羅布木斬數十級大士復遁
走九什

九年己未春二月黃金亮復攻城官兵擊之金亮敗走生苗金亮奔九阡以計誘苗夷黑苗生苗及九阡狄匪分三路一由瑤慶出蕪縣攻城之東南一由水甫大路攻城之北金亮率左路先至官兵擊之於洗布河斬其驍賊謝金洪金亮退走大坳圍兵邀之於途隘金亮大敗值賊右路失期後至復敗金亮遂遁生苗死於途餘黨皆散

春三月千總莫芝茂外委曹運先攻九阡敗績知縣吳德容檄委千總莫芝茂攻勦九阡沿邊土匪克復水龍水太拉牽等

寨賊糾眾數萬圍之曹運先奮勇奪隘而出銃傷左股鬪死者一十餘人芝茂等復退屯水息

秋九月下河逆苗黃起鳳攻白岩知縣吳德容遊擊汪文鈞督千總王化龍軍功吳阿撒等大敗之阿撒歿於陣起鳳小名拱洪統苗匪數萬由巴容出水瑤直攻大坳知縣吳德容會遊擊汪文鈞率王化龍擊却之次復由羅布木至白岩我軍截之賊銳甚我軍三進三退勝負未分吳阿撒水岩人勇而捷每戰輒請為先鋒見我軍稍却揮雙刀冲陣斬賊首三人

八年戊午春正月上江賊徐多福來降下江苗變陷都江多福乘亂從賊率逆黨盤踞九阡號田火王因與九阡賊苗不睦率所部百餘人來降

夏六月殺徐多福七十三人於城北多福黨久任荔城橫行街市遊擊王敦倫慮其為變悉坑之於城北解徐多福等入省斬於市

秋九月黃金亮據水工我軍攻之不克粵西賊黃金亮軍入巴容里據瑤慶里之水慶進屯水工樹立營寨我軍連日攻之

不利額外黃坤泰等被擒賊嚮之黃金亮攻城官兵擊敗之
金亮以我軍屢敗乘勝攻城知縣吳德容率師擊之於舊縣
金亮敗遁水工

冬十月知縣吳德容遣兵克水工吳德容撤調各里壯練令千總王化龍等統之分路進攻黃金亮於水工焚其寨棚金亮潰據瑤六

冬十二月瑤慶圍擊金亮於瑤六敗之金亮敗據瑤六圍練擊之大小三十戰金亮遁走九阡

百餘人悉歿於陣

董成烈曰先生孝友本於天性文章發於至誠久為衆所推仰因世亂毅然以一介儒生側身戎馬必欲殲滅賊匪而後已乙卯秋先生兵防在外聞我荔林夷倡亂倉皇歸里慷慨從戎一戰而克羊奉再戰而定瑤台三戰而水婁澄清四戰而羊安席捲他如平南丹捍都勻衛獨山靖甕安之功不計馬追乎星落前營馬革裹尸貴志以歿其精忠浩氣足以塞天地而貫金石吾荔沐國家百餘年養士之報斯其人歟斯

其人歟

夏五月官兵擊三洞敗績署千總事當新寔圍首章芝儒軍功蒙慶相死之時三洞尚從賊知縣吳德容撤蒙慶相等統練會營弁署千總雷新寔勦之我軍深入無繼賊以死黨截其後師潰於四方井慶相等圍練數十人皆歿於陣莫之茂率殘兵退屯周章

冬十月莫芝茂攻克三洞水婁既復知縣吳德容飭軍功莫芝茂率壯勇攻三洞連克九寨荔邑自是人心稍定

秋九月圍兵攻九阡敗潰而還知縣趙煦檄調巴乃董界巴仄蒙石時來等里圍練會於周覃分三路進攻九阡軍無統帥號令不一敗績於水調死亡數百人各里練俱潰歸

冬十月邛樹桐復水婆時水婆陷於賊知縣趙煦檄委邑紳邛樹桐督練圍之圍首韋國興擒賊黨以獻水婆平改水婆里曰恒豐里

冬十一月官兵攻九阡水庇把總鄧廷贊死之水庇居萬山之中國隘險峻負固不服我兵攻之屢年勝負相當把總鄧廷

贊與戰於周覃里下拉苑馬蹶賊斬其頭而去後從九段日升千總莫之茂率壯勇乘夜破之墮其碉卡乃降

七年丁巳春二月誥封朝議大夫邛樹桐額外周益發率師擊賊於獨山遇伏死之邛樹桐既復水婆羊奉瑤台羊安等里復於獨山要隘樹立營壘為兼顧計值三脚苗延大股攻獨山樹桐擊走之乘勝直搗濫土賊巢賊設伏以待我軍入其中賊合圍數重兵練被困山谷中三晝夜賊四面冲擊從騎死亡殆盡樹桐手及數賊身被四十餘傷與周益發及兵練

瑤團練蒙慶湘等援至賊敗走屯舊縣次日由瑤慶大路而遁

冬十一月劉山練潰歸南丹自蔣嘉谷劉山陣亡後軍中無主復以糧餉不繼師潰而歸積年軍資器械潰練携掠一空城民奪門而出借之西下者以萬計

冬十二月代理縣事宣德集團民潰練既而城中空虛民皆荷担而立代縣事宣德撤安蒙慶湘設局於平寨糾集蒙石時來巴灰董界巴乃五里團民諭以禍福造旗幟備器械令其

首尾相顧為死守計

六年丙辰春正月瑤慶賊蒙阿林攻城團兵擊却之阿林因罪監於獄越獄逃遁捕之不獲乘亂竊據水瑤水工等處復率逆黨進攻縣城至舊縣團兵邀之於隘斬首百餘級賊遁

夏四月團兵克瑤慶擒賊首蒙阿林誅之阿林既敗知縣趙照檄調五里團兵分三路進勦一由水瑤大路搗其中一由水春繞其後一由拉黨擊其背斬之於水工及從賊數百人瑤慶大路始通

山等合營弁由水堡大路進勦敗其前鋒劉山手斬驍賊以
罵於陣賊懼甚於是圍會下河三脚苗匪及水吼水泰水崗
水錯各匪數萬合圍十餘里我軍分五營三路以待賊用火
銃藥矢銃甚前鋒劉山奮力抵敵自辰至午我軍勢力不支
劉山潰走北嘉谷潰走南而水吼水泰賊復渡河堵截我軍
歸路嘉谷率勇士鄧元高及外委吳邦瑞冲突賊衆我募皆
死之嘉谷身受三十餘傷力竭歿於陣

董成烈曰自烽烟告警居民震動公蒞任三月帶疾視事撫

凋敝之民提新集之衆外抗強虜背城血戰屢挫其鋒即古
之儒將何以過焉雖徵兵調餉籌畫多艱此應彼攻進退失
據此亦時勢之無可如何者也及乎風霜矢節戎馬殒身輝
輝乎與日月爭光矣

賊復攻城劉山死之蔣嘉谷敗沒後劉山率殘兵退守城垣賊
從後追至圍城三匝矢礮如雨進屯北門小寨與我軍只一
牆之隔劉山同馬兵朱元龍登城擊賊被賊銃傷頂心及股
死之我軍捍衛益力賊退據舊縣賊攻圍三晝夜不克適板

五年己卯春三月邱樹桐援都勻時都勻苗變知府鹿丕宗檄調樹桐統荔屬豹勇數百赴勻勸之

秋七月九阡賊覃朝綱反知縣蔣嘉谷進兵討之時黔疆各處苗變羅添明既陷三洞復與上江賊首號火王者甯入九阡勾引上夷覃朝綱等作亂蔓延我蒲水婆巴容等里勢熾大張居民紛紛逃竄嘉谷招集南丹劉山等合營奔進屯水堡水息討之

秋九月賊攻城西北隅知縣蔣嘉谷擊敗之時覃朝綱等畏懼

兵威納款投誠既而復叛與下河苗賊首潘阿六上江賊首徐多福攻掠水江水浦等卡我兵截堵瑤排大路賊由羅卜木小路進攻城垣嘉谷遣軍功劉山等敗之賊復攻城大敗之賊自攻城敗衄其衆憤甚復率逆苗悍黨數千進攻城北砲台知縣蔣嘉谷率軍功劉山義勇盧成龍迎擊於楊家橋義勇盧成龍登先臨陣炮傷左股猶奮勇大呼賊稍却劉山率精兵乘之賊潰我兵追至瑤排而還

冬十月大兵攻九阡師潰署縣事蔣嘉谷死之嘉谷乘勝統劉

所恃警報至承祝傳集士民令安堵無恐造攻戰之具萬餘
件募敢死士三千檄邑紳邱樹桐李國材劉起鳳等練團民
進屯大哨坡建碉卡墻垣扼其要路躬率前鋒獲曹大敬於
羅降敗朱亞狗於思思全師而還

四年甲寅春三月獨山賊楊元寶余光玉陷羊奉官兵擊却之
元寶等起獨屬蠻蕙攻巴乃不克轉陷羊奉知縣李珍檄邑
紳邱育泉鄧霖軍功雷新建王龍劍統練擊之始退

夏四月邱樹桐援獨山敗楊元寶圍解楊元寶退歸復同余光

玉糾合南丹土匪顧老岩顧長保等攻獨山知縣李珍檄委
邑紳邱樹桐統練會貴東道 齡委員韓起遊擊楊廷柱等
擊敗之

秋七月三脚堂教匪羅添明作亂陷三洞遊擊馬清潔擊之先
是粵西教匪游雲川以蘭花會惑眾事洩正法其黨羅添明
復糾教匪數千窜通清江台拱上匪破都江攻入三洞清潔
統兵會方村縣丞何銓勸之值三洞土匪復變清潔遂退守

捕逆黨鮮省磔之傳首邊庭人心始安

道光三十年庚戌官兵駐防大造坡粵西大頭羊倡亂逼近荔
北司馬孫撫將故委貴東道周作楫等督兵至荔防勦並飭
知縣嚴錄銀檄委邑紳邱濟桐於各要隘創建礮卡期年而
工竣以圍民迭更守之賊不敢逼

咸豐元年辛亥巴容土匪吳三亡謀叛邱樹桐擊擒之粵西梁

上 作亂三亡與之通謀勢將上窺樹桐奉

憲撤擒之解赴貴東道正法四境乃安

二年癸丑春二月官兵駐防白腊坳等處南丹土匪張其學作
亂逼近荔波西界知縣畢楚珍分遣俊秀邱育泉防堵白腊
坳訓導高鳳翔防堵夾馬關孝廉邱樹桐督練會南丹州土
司莫樹棠勦之斬其渠魁事乃平

秋九月撫標古州鎮官兵駐荔粵西賊首朱亞狗作亂侵擾邊
境上江協哈 古吉拉都勻府鹿丕宗等率師援思恩擊賊
首朱亞狗敗之亞狗擾亂粵西數載臨思恩土匪覃大敬與
之通將欲圖荔瑤慶以西居民震動時武備空虛守禦一無

洞九阡邊隅震動總督張廣泗檄調粵西慶柳官兵防範屯於三洞九阡義蒲等里境賴以安

乾隆元年總督張廣泗以苗民叛服不常惟恃古州各處苗疆平定檄委知府孫紹武都司林煥奎至荔宣揚威德苗民懾服各繳弓弩槍械萬餘件四境藉以承平者百餘年

嘉慶十七年己酉添弟會謀逆誅之林庖頸粵東人以豪俠聞游食至荔邀結無賴子弟燒香拜會於城東之粵東會館登壇設座為不法等事名曰添弟會知縣蔡元陵偵知擒逆首

林庖頸解省正法事乃平

道光二十二年癸卯荔波營戰兵教習范友奎作亂守備宋位元擊擒之友奎奸險凶悍邑人皆畏之新任曲史易嘉言蒞任遇友奎黨於途奎黨傲不為禮易簿責之次日易行香於壽佛寺遂糾眾毆傷毀其儀仗復以遊擊盧達於六月操無律揭竿而起外委藍士英止之不可揮戈刺中其腹立斃遂同送黨鳴鼓聚眾橫行街市勢將為變守備宋位元山東人也素以材武著聞變率親兵數人擊擒之適各大憲兵至悉

毛蘭塘至中索塘二十里額兵二名

中索塘至坡洞塘三十里額兵二名出廣西恩恩

在城西至巴灰塘二十里額兵二名

巴灰塘至白蜡坳塘四十里額兵二名出廣西南丹

師旅

清朝順治十三年九阡土司雷天堡叛攻破縣城屠殺官民過半知縣王家珍詳請粵西漢土官兵進剿搗其巢穴誅之餘

黨平

康熙二年蒙石里水岩苗吳盡美殺署理縣事胡蒼齋於偏岩時苗民凶悍胡蒼齋由慶捧撤入荔道經水岩日暮止宿不許而蒼齋遂宿於偏岩苗民恐其騷擾乘夜半糾逞黨殺之雍正十三年粵西官兵駐荔先是古州八羽等處苗變軍入三

花鉢塘至水利塘十五里額兵四名

水利塘東至方村汎塘二十里方村汎塘至扁家梁塘二十里

水利塘北至瑤蚌塘十五里額兵四名

瑤蚌塘至甲站塘二十里額兵二名

甲站塘至高黑塘二十里額兵二名出獨山

在城塘東至瑤排塘二十里額兵四名

瑤排塘至水堡塘十五里額兵四名馬兵一名

水堡塘至水錯塘二十里額兵四名

水錯塘至拉苑塘十五里額兵四名馬兵一名

拉苑塘至水入塘十五里額兵四名

水入塘至三洞汎塘十五里額兵四名

三洞汎塘至坎牛塘二十里額兵四名

坎牛塘至河東塘二十里額兵四名

河東塘至小河塘二十里額兵四名出上江

在城南至水瑤塘二十里額兵二名

水瑤塘至毛蘭塘三十里額兵二名

武備

兵制

在城遊擊一員

守備一員

千總一員

把總三員

外委五員

額外三員

分防三洞汛千總一員

外委一員

兵丁一百二十名

分防方村汛把總一員

兵丁六十六名

原額兵馬步戰守兵共捌百名其後遞有增減
塘汛程途

在城塘北至花鉢塘二十里額兵四名

荔波縣志

武備志

荔波自元迄明為土司所據自相雄長嘉靖間雖入版圖實同化外蒞斯土者猶藉南丹土兵防衛以行無所謂武備也清朝以武功定天下遐馭異域靡不臣服乾隆初年王師底定黔疆總督張廣泗以荔邑屬苗疆要隘幅員遼濶詳請額設重兵防駐在城營坐鎮其中方村汛環衛於北三洞汛扼險於東塘汛軍房星羅碁布與古州上江路

聲勢相援可謂有備無患也咸豐乙卯苗匪煽亂堅守者二十載血戰者一百餘其間忠義之臣智謀之士勇悍之夫僭逆之衆與夫捍衛之勤勞戰征之始末備書於冊亦即古人法戒之意云志武備

荔波縣志

秩官志

荔波舊為蒙皮雷三土司所據明正統間改土歸流而規模狹隘未能畫一我

朝設官分職重牧守之權慎邊闡之寄而於苗疆要害尤為鄭重二百年來官斯土者名賢迭出或以惠政顯或以武功著或以清操見或以文學名或殺身以成仁或臨危而赴義古云有德則祀之有功則紀之所以崇其功而報其德也但代

遠年湮不無脫簡謹舉所知以俟後之知者補之志秩官分三類

一名宦

一職官

一土司

明

名宦

劉邦徵籍貫未詳萬曆中知縣事時隸廣西慶遠府各里苗民互相為患凡蒞斯土者皆借寓府城不敢身歷其地習以為常號曰化外官邦徵至檄諸苗於前推誠導諭凡有規畫悉聽命因詳請置縣治於喇軫村歷任數載威惠甚著至今父老相傳猶能道其德政云

國朝

王家珍江南人進士順治中到任時九阡諸苗不法臨縣城家珍蒞任調請官兵勦洗躬臨前敵削平巨寇以蕩城殘廢復請改縣治於方村之袂村在任二十餘載開闢文教尊養耆老民皆頌之

楊以增字致堂山東人道光初到任下車之始增修荔泉書院培植人才居官數年有惠政去後邑人思之立位祀於文廟之名宦祠歷官至河工總督

蔣時溥湖南人道光中兩任縣事首重學校見學宮凋敝捐廉

倡首董率邑紳捐貲萬餘金重修學宮文昌宮規模宏敞足為一邑壯觀明禮讓勸農桑恤荒獨省徭役諸善政至今士咸頌賢牧云

職官 元明無考

胡蒼齋籍貫未詳康熙二年到任至蒙石里之水岩村止宿於野是夜羣苗糾眾劫之與隨行俱遇害後經官兵剿洗附近俱族誅

呂 璞昆明人監生公正廉明為民所頌雍正末年到任以舊

署狹隘倡始改建縣城於蒙石里一切經畫井井有條

陳于中籍貫未詳乾隆四年權知縣事日夕督工建修城垣頗著勤勞

金明基籍貫未詳乾隆三年到任繼事修城未竣能任事

趙世綸籍貫未詳乾隆四年七月到任辦理城工善後各事宜措置裕如曾至巴乃六林一帶與清江通判卽自勵都勻協右營守備王焯荔波營遊擊李勛河池州知州孫造南丹土州莫我謙慶遠協右營守備劉有梅等會勘各處分界處所

勒石為記區畫得宜士民懷之

蔡元陵字經武籍貫未詳嘉慶十七年到任重修 聖宮文昌

宮書院學署才識明達辦事敏捷時教匪林疤頸等謀叛經
武密捕其渠置之法事旋平

武占熊籍貫未詳嘉慶二十二年到任二十四年復任禮士愛

民安良除暴人心戴之率紳耆補修嘉泉書院親主講席每
月親詣院中為諸生講解歷久不倦荔邑文風振興由此

李懷春籍貫未詳乾隆中任縣吏治勤慎愛民如子公暇即微

行郊野常與農夫野老談詢民間疾苦事見田疇易者獎之
蕪者飭之又或親入街市塾中面試諸童功課必隨在獎勸
汲引隨身只一小僕未識面者不知為官長云

吳名馨籍貫未詳博學能文工大小書學宮壽字大碑其遺蹟
也

魯壽松字念我才識優長案無積牘兼工隸草等書

楊 約籍貫未詳愛民重士政簡刑清

于成保浙江人道光初年到任太醫院吏目出身精岐黃之術

常施樂濟民全活者甚衆

馮紹彭字子齡籍貫未詳道光初年到任尊崇學校值歲饑發廩賑民邑賴以安素性慤直凡有建言不避權貴以卓異任貴筑首縣

覃武保廣西梧州府潯縣人道光中到任崇儒重道廉慎自持所置多善政至今民不能忘

稀松齡道光中到任

周虞道光中到任

舒文旗人道光中到任

何珽道光十九年到任

謝人龍四川人道光末到任節已愛民有古循吏之風

潘渭春福建人工文韋道光末到任

葉華春福建人道光末到任

嚴鈇字伯牙浙江人工詩能書有幹濟才道光三十年到任

值粵匪亂建議防堵閩邑人心賴以鎮定後因公被議辭組而歸輿論惜之令佐郡江南以守城功擢郡守加道銜花翎

吉爾通阿旗人

畢楚珍 江南人咸豐元年到任

魏承祝 字將侯湖南衡州府衡陽縣人咸豐三年到任值粵匪朱亞狗逼近邊境四野震動建議立軍需局修礮卡造軍器編保甲全境恃以無恐思思失守躬親督練越境赴援號令嚴明有取民間一盆斬以狗亞狗敗遁乃還惜在任未久奉湖南江中丞奏調回籍從軍旋陣歿至於精書法工詩文乃其餘事耳

李 珍 直隸人咸豐四年到任

蔣嘉穀 字曉雲咸豐五年到任恂恂有儒者氣象而膽畧過人蒞任初九阡苗叛攻城屢擊却之親率兵勇討賊師潰陣歿邑人建祠之吳德容題其額曰重於泰山

吳德容 字迺庵湖南宜章縣人咸豐七年到任強幹精明工書法吟咏而尤嫻於戎事在任八年合官民為一體內守孤城外當巨寇興學校建考棚以培人才修昭忠節烈等祠以維風化延聘名儒尊養耆老頒婚喪禮蠲田賦稅公餘之暇與

諸生雅歌投壺有古名士之風惜其帶疾從戎實志以歿迄
今士民思其德輒為之流涕云

彭培垣字嘯臯湖南人同治四年到任修城上竹棚春三月苗
匪窳至三洞與粵西副將楊廷柱黃仲慶等退之十月苗匪
攻城招練保全五年春二月賊復圍城四十五晝夜力竭投
洋也殉難可謂勇矣惜其重優輕士玩寇折糧致城中有羅
雀掘鼠之慘而城因之以陷不無遺憾云

胡永春字垠山同治五年到任時城新復餓殍盈道瘡痍滿目

董率邑紳設團練總局於書院移縣署於考棚救散扶哀稍
有起色是年八月瑤慶等里從賊屢次攻城值城垣毀壞勢
不能守不得已去之

王子林字槐堂雲南人同治五年十月著縣事統練由羊奉進
屯舊縣恢復縣城糧盡引還

鐘毓材字小江廣西人同治六年著縣事統練由巴乃直抵董
界營於寨馬村後山賊衆圍之戰死

谷應賢同治六年到任率楚勇三百至縣城擊敗賊黨因勢孤

糧盡引還

高 荃字佩庵雲南人同治五年任方村縣丞旋署縣事與遊擊鄒玉林勦偽黔粵王姚其登大破之後任八寨司馬

錢 壘字伯雅雲南昆明縣人同治八年到任補城垣輯難民辛未春苗匪據瑤台民將奔潰遣兵擊退在任數年建公署修書院添設月城鑿永濟泉民咸賴之

蘇忠廷字福臣四川納溪縣人咸豐辛酉科選拔以軍功歷保花翎知府留黔儘先補用同知直隸州知州歷署威寧州事

同治十三年六月到任

訓導建設未詳其始

戎輔乾隆二年到任始立學規

李同楷

封建福

洪

馮

黃 銳

胡

張星銘字春堂遵義舉人道光末到任學識優長性情瀟灑至

今士林思之後以卓異陞任江西臨江府

梅汝舟字瀛舫 科經魁工詩文慎廉隅勤課士咸豐初年

到任

鄭 珍字子尹遵義舉人咸豐五年到任品純學粹詞令優長

至今黔中學者多宗之

白 珩字楚臣咸豐末年署訓導事

劉絮矩咸豐末年署訓導事

趙旭字曉峯遵義桐梓縣人優貢生氣度雍容學問淵博工篆隸精卜易循循善誘與門下士談終日不倦五年三月城陷投泮池殉難在荔著述甚富亂後無存惟憶其弔貢生李國材死難詩有死於忠義鬼猶雄之句聊見一斑耳

張友卜同治九年署訓導事

陳培垣字曉珊貴陽府副榜同治十年到任

李學延字希平貴陽府開州歲貢同治十二年十一月到任

典史

國朝

魯志儀乾隆五年到任

高其壩

王淇

王覲光

莊文光

易嘉言

萬

劉錫紳字笏亭湖南人道光末年到任為人勤謹和平嘉慶中

玉屏鎮山崩日久缺裂尤甚協同知縣謝人龍邑紳邱樹桐

等倡捐補修用有不敷竭力捐助親督各工不避暑雨閱三

月而工竣至今人猶念其辛勤云

婁奎道光末年到任

王堯章四川人咸豐初年到任才識明敏

宣德直隸人咸豐初年時九阡彝夷叛亂知縣蔣嘉谷歿

全城奔潰，擢獲縣事，捐廉四百餘金，以助軍餉，備歷

城

林正春

趙文惠

王仲仁

俞成懌

齊蔭曾同治五年殉難

壽其仁同治五年殉難

許鈞鴻同治七年到任

李安瀾同治九年十一月到任

覃炳文同治十年十一月到任

梁秉鈞同治十二年七月到任

荔波營遊擊

李勛乾隆四年到任至巴乃鹿林一帶會勘分界泐銜於石
今尚存焉

慶喜

張銳

保

夏

陸奎

彭壽

興瑞咸豐三年到任同知縣魏承祝督兵援思恩敗朱亞狗
後調任定旦遊擊旋陣亡

馬清傑山東人咸豐五年到任

王敦倫咸豐七年到任

汪文鈞咸豐八年到任善用兵好謀能斷賊攻大坳白岩等處
率營兵出屯舊縣兵勢連絡調度有方賊不敢逼夜以火箭
擊賊營勁兵繼之大破賊衆追擊俘馘而還

范定邦字協堂水城廳武舉咸豐九年到任同治五年城陷殉
難

鄒玉林字昆山同治五年到任剿辦各里土匪頗有勤勞

羅雲陞字星橋廣東人同治十年到任

徐占光同治十一年到任

張椿同治十二年到任

尚步瀛字傑洲四川崇寧縣人同治十三年九月到任

荔波營守備

萬安乾隆五年到任

唐卓湖南人嘉慶中到任

雷毓英安順人道光中到任

高

史

徐

元元山東武進士精射法膂力絕人道光二十一年到任明

年營兵范友奎作亂諸將無敢前者位元直前擒若縛雄然
人服其勇

張福震

曾玉麟貴陽人咸豐十年到任十一年春城陷殉難

劉學武字偃之本城人由行伍保任存城千總署守備二次代

理遊擊一次同治五年春城陷殉難

許占標同治九年署篆

王邦學同治十二年到任

陳化熊同治十三年到任

荔波營存城千總

李正吉乾隆五年到任

王遇春咸豐初年到任

王化龍咸豐七年到任有勇知方而尤長於謀畧蒞任數載推

鋒陷陣未嘗敗北辛酉春城陷巷戰力竭自刎

許占標同治九年到任

范鳳山同治四年署事五年城陷殉難

荔波營把總

吳奇傑

二人俱乾隆五年到任未詳品職

吳得瑗

張玉德

謝經武

吳廷儒

黃德明

邱永吉

張文選

楊萬春

李定邦

高玉升

璩加潤

蒙錫芳

宋廷福

張友林

荔波營外委

陳照先

李正魁

張少卿

三人俱乾隆五年到任未詳其職

李正邦

吳邦瑞

蕭必清

康世富

劉勝先

唐友發

徐順

黃應相

藍士英

巫廷襄

鄭士芳

謝文品
李瓊林
彭發貴

荔波營額外
周益發
黃坤泰
官紹基
宣學孔

荔波土司

蒙土司建自元季今蒙石里中蒙姓極繁間有用石為姓者

皮土司建自元季今其族湮矣父老相傳謂今之白姓即皮姓

後裔益以土音相沿積久而差也

雷土司建自元季今邑中間有雷姓未知即土司後裔不可考

矣此三家建立原起分域世次改革緣由皆無確據聊附

職之末存夏五郭公之例而已

荔波縣志

人物志

十步之澤必有芳草千室之邑必無錚錚者哉荔波舊無
志明以前其湮沒不彰者不知凡幾自我

朝深仁厚澤作育裁成二百年來濟濟多士或掇巍科或膺華
選或正直著一邦之望或循良揚四國之聲或才華富而
馳騁於詞章或蘊釀深而精勤於德業或潔身不辱遇難
全忠或好善樂施輕財重義或勵冰霜於歲暮或敦孝友

於家庭或慷慨以捐生或從容而就義或作昇平人瑞而
齒達三尊或挹磊落奇才而名成一藝或遊雲所至追陪
羽客之林或踏雪而來足動都人之慕者指不勝屈焉爰
叙其實事實俾嘉名之永彰抑亦可為後來者勸志人物

選舉

孝廉方正

邱樹桐字乙峯歲貢生成豐元年舉孝廉方正有傳載入藝文類

李肇同曰乙峯老伯同先君莫逆交也同自髫齡齟齬得待教言嘗憶其自題堂聯云愛惜精神留此身擔當宇宙擴充見識高著眼看透古今迄今思之猶忽忽如昨日事而公已千古昔范文正為秀才時便以天下為己任公之志其庶乎

事固未可以成敗論也

舉人

陳克謙邑人少負材器聰敏過人童試屢列前茅學憲按臨勾郡奇之令其肄業南臯書院益肆充擴遂中乾隆庚子科舉人由是為人日向學者日眾此所謂豪傑之士也

選拔

黎仲山嘉慶十八年貢考取八旗覺羅教習官授山東知縣初入境未知土性半渡為潮汐所掩其嗣君庠生黎復淳匍匐奔喪扶柩歸里先是荔波拔貢額設已久皆為別屬冒去至仲山始實選為拔貢第一

劉起鳳字丹山道光五年貢官授大定府教

羅新楷字式堂道光十七年貢

王錦字蜀江道光二十九年貢官廣西蒙州知州維容修仁

縣知縣

鄧瑞麟字楫五咸豐十一年貢

曹之翰字次屏同治十二年貢

恩貢

巫璠嘉慶初年貢弱冠以文學名一時才俊如黎仲山覃奎相等皆執經請業焉惜壯年即世著作無存後進難言梗概耳

曹正秀嘉慶中貢

岑大鵬嘉慶中貢

黃佑儒嘉慶中貢精堪輿司鐸養正義塾五六年從學子弟極多享年七十有三壽終之日弔者在門而選缺之報適至不

得生見數也

董芝茂字香圃道光辛巳貢工詩性瀟灑築宜園於城之東北隅種名花百種有流觴曲水之勝日與諸名士遊詠其中著有宜園詩鈔八卷訓子規箴二卷家塾文鈔十卷名花考四卷廿一史考辯二十卷義江紀畧二卷醫宗辯要八卷本草摘元十二卷道光中奉憲委倡捐義設三千七百餘石復奉知縣蔣時淳委修文廟捐項萬餘全有成效矣旋以病卒惜哉

蒙錫林字東海道光中貢書法秀麗

李國材道光十五年貢其子李肇同紀有殉難行畧附錄於左

李肇同恭紀 先嚴似村府君行畧

先君字似村號晴舟道光中恩貢士也幼失怙事 祖母陳以孝聞家道清貧入泮後即以授徒為業硯食鄉村城署先後三十餘年邑中仰山斗焉時命限人屢科不第乃於館課之暇窮愁著書成荔波縣志引二十卷易錄十二卷學庸便已錄八卷兵鑑若干卷可廳隨筆若干卷晴舟詩錄若干卷

讀離騷經一卷通鑑論畧二卷自經兵燹惟通鑑論畧獨存惜哉道光年間邑侯蔣公委修 聖廟及文昌宮並書院學署工竣贈一邦之望扁額咸豐初年鄰封不靖邑侯魏公創立總局委辦軍需贈好是正直扁額繼又隨魏公督練越勦思恩股匪草檄一篇未遂得檄引去魏公贈詩有吾愛李夫子元爽才不羈韜鈴富淵海學問無津涯上馬能殺賊下馬露布馳翩然一紙書聊城為之推等句皆實事也無何魏公調任李公下車先君不善阿逢旋誣以侵蝕軍器革名下獄

成訓子詞十首箴一首以訓同時同方七歲而我邑揭竿者
起矣既而蔣公接事始得申雪復名爰歸卧於巴乃里之東
廬山房稍蘇殘喘迨至邑侯吳公於干戈擾攘之中振興文
教再三函聘主講荔泉書院先君於是復出庚申夏獨山
失守荔邑震動加以境中伏莽屢寇城壕先君左右吳公
籌防籌勦半年罔懈辛酉正月大股髮匪自南來眾寡相懸
如山壓卵時值吳公防勦在外守備單弱官僚士庶倉皇無
措痛哭登陴先君從容言曰盡人事可以聽天蓋有死之

心矣次宵五鼓賊眾乘城先君為賊所擒罵不絕聲遂遇害
城復後面目如生同收骨塋於城西感傷不已及同治丙寅
二月苗匪復來攻圍四十餘日城陷先母謝亡妹玉娥均
投河盡節骸骨無存哀哉嗚呼小烏巢林尚借一枝之寄枯
魚銜索長懷終古之悲乃賦質愚頑不足以闡揚先烈恐
或湮沒為罪滋大謹書崖畧如此前辛酉之難同族中死者
有伯興兄廣山二伯母游姊適胡妹小娥等丙寅之難
有叔林兄喬姪振先金順大伯母羅三伯母劉二嫂

吳妹玉芝等計一門殉難死節者合之凡十有七人因備錄之以俟採風者

鄧南鏡字荆三道光中貢為人忠厚誠實有長者之風

羅彬字儀廷咸豐初貢

胡之粹字純庵咸豐初貢工文章屢試棘圍不售數奇也

曹之杰字卓卿咸豐初貢

鄧懋修字梅生咸豐初貢書法整飭

曹達字儀吉咸豐末貢

梁占魁字梅村同治三年貢

鄧懋官字湯臣同治元年貢殉同治五年之難

韋廷珍字聘三同治中貢

潘文彬字子儒同治中貢

周育才字德庵同治中貢

歲貢

巫 瑞嘉慶初貢書法精工

蒙天錫

鄧而亨字天衢書法古勁

鄧蓮峯

曾日省

覃登相嘉慶末貢

宣學成字裕堂為人疏宕有奇氣精詩賦每於酒酣耳熱後批

腕時艱必痛哭流涕云先作送五窮鬼文後作迎五窮鬼文

悲歌慷慨令人擊碎唾壺令佚之惜哉

邱樹桐見前

何之純字肇修道光中貢

張書銘字西軒幼孤母林氏青年守節銘既長為請旌表奉
旨建坊咸豐辛酉春髮匪陷城銘以身庇母黨賊殉難

李肇同曰同先君乃西軒先生之太封翁開下士也有世誼
相知最深咸豐十年先君王講荔泉書院西軒先生司鐸養

正義塾來往亦最密同捧巾侍側每聞讜論竊心誌之先生嘗言曰讀聖賢書以端木正則為第一苟家庭稍留缺憾雖豐功偉烈不足言也先生宿學不仕功烈未彰然即端木一言可徵素履矣又况庇母篤賊節殉危城忠孝兩全乎

王燮字理堂道光二十九年貢

董成烈字少文咸豐七年貢就職候選訓導

李肇同字小村咸豐十一年辛酉貢

玉瓊林字 同治中貢

覃兆清字鏡心同治中貢

何長達字遠九光緒初貢

孫熙揚字心藿光緒六年貢

楊鵬字叔香光緒十一年貢

胡大章字乘軒光緒十六年貢

武舉

朱光斗官平遠營千總

附行伍出身

朱射斗官四川北總兵陣亡

賜謚勇烈

劉永福官都司後陞廣西副將

陳官都司

宣勛官九門都司

莫芝茂字春圃官古州右營遊擊

劉學武官本營守備

黃金貴世襲忠騎尉官八寨千總陣亡

雷新霆官本營三洞汛千總

鄧廷贊官本營方村汛把總

李正揚官獨山巴開汛把總

覃開明官獨山巴開汛把總

巫廷襄官上江外委陣亡

宣 明官雞場外委

唐有發官上江外委陣亡

資龍位官獨山外委

鄭士芳官下思把總

保舉

何振新附生廣西候補州同在籍辦團有功請援兵募義勇破
九阡賊巢擒偽王潘新簡歷保花翎知州

覃端模字範堂附生在籍辦團有功歷保知州銜候選知縣
董成杰字子萬同治中從征越南寧匪以軍功保從九選用
曹之杰字卓卿以恩貢在籍辦團有功保五品銜以直隸州州

判選用

全其心字靈犀以軍功保舉府經歷指分湖南補用

張步雲字夏峯附生以軍功保舉候選訓導
高鳳翔字儀軒附生以軍功保舉候選訓導
孫培蘭字香畹廩生以軍功保舉候選訓導
覃建勳字少杜附生以軍功保舉候選訓導
張書紳字月秋附生以軍功保舉候選訓導
蒙卿榮字錦堂附生在籍辦團有功保以知縣分發廣東補用
鄧瑞麟字緝五辛酉拔貢在古州鎮張軍營幫辦文案有功保
以訓導選用

李肇同字小村辛酉歲貢從廣西提督馮子材征越南國軍匪
委襄文案有功保以訓導選用加中書銜
潘元琳字次球附生歷年辦團有功保從九職銜

宦蹟

巫 瑞官普安廳教諭開荔波教職仕路

覃登相官石阡府訓導

鄧而亨官松濤貴陽訓導

劉起鳳官大定府教授普安廳教諭

姜鳳翔字竹溪增生開荔波外職仕路官廣西宜山馬平典史

思隴駟丞柳州慶遠經歷南丹州州同那地州州判卒於任

其為人天真爛漫瀟灑自如

王 錦字蜀江拔貢官廣西象州知州維容修仁知縣有政聲

莫逢春字華圃軍功官廣西馬江司巡檢卒於任

白朝貴字豈堂號德卿軍功官廣西東蘭典史鳳山那地州同

河池州知州所至多政績在南丹軍營積勞病故經撫阮蘇

題奏部議給減半葬銀五十兩祭銀四兩奉

旨允准通行在案

蒙玉相字輔堂官廣西西隆州州同

邱育泉字壽田一字廉士附生世襲雲騎尉官湖南安化知縣

楊自明字鏡心號秋澹貢生官廣西奉議州掌印州判著懷遠
縣知縣

蕭承勳字克齋附生官廣西平南縣典史作登司巡檢南丹州
漢堂天莪分縣泗城府經歷卒於任

何振新字銘三附生廣西候補州同嗣丁憂回籍辦團有功保
花翎知州其在粵也撫軍張征南寧考各官策問勦撫新近
筆疾書數千言爛漫瀟灑洞悉機宜撫軍喜拔第一委充隨
員主文檄其回籍也光緒五年苗陷城土匪蹂躪傷時憂世

毅然以平盜賊衛地方為己任時廣西協戎孔平階駐防牛
洞繞道求援添募義勇心力俱瘁帶瘡從戎光緒八年破九
阡賊巢擒偽王潘新簡維時瘡痍滿地無餉無糧咄嗟而解
邑賴以平厥功尤為不朽矣

文學

李國材道光中貢年十六試冠童軍力學清操兼通羣籍隨叩
輒應如數家珍詩古文詞皆龍自出心裁標新領異不拾前
人餘唾著作甚多兵燹之餘十不存一良可惜也嘗自題堂
聯云獨立千載與誰友自成一家方徧真

宣學成詩才敏捷每有所感輒形於詠歌其袖裏帽中信步所
之不離詩稿嘗作九日登玉屏山賦上下古今一唱三歎朗
誦一通覺騷選遺音猶在人間雖至暮年每於燈前酒後以

昭明之書叩之即背誦琅琅不差一字

孫培蘭有實學博通經史凡一切詩古文詞直造先民之域而
虛懷若谷渾厚和平有長者遺風焉

張書銘學有心得吐屬不凡工書能詩性敦孝友所謂先器識
而後文藝者也生平謙抑不立崖岸以驕人學養兼到之士
也乎

王廷英字雲帆邑附生才氣沉雄天姿敏銳下筆有春夏氣乃
屢邀房薦未上公車求文章憎命歟

鄧懋官學力天姿俱臻絕頂而筆極敏捷運典如鑄嘗謂天下
無難題亦無易題知言哉

何振新心細情厚宏濟艱難待人謙而志少願悟益自淬厲經
史子集詩古文詞了然尤究心時務為有用之學辦團時軍
需旁午手未釋卷邑肅清後復授徒從學者戶外屢滿教有
妙術引伸之譬喻之如僧公說法致頑石點頭其子金齡得
其緒餘便具巍科遊庠食餼者多出其門文清峭不落時徑
著吾文稿吾詩稿所知志畧軍旅志畧惜年五十五卒邑人

敬之愛之至今稱

鄉賢

忠義



軍興以來荔邑之瘡痍者幾二十年荔城之失守者凡二次官紳兵民之陣亡殉難者不下萬餘人其忠肝義胆炳如日星安可聽其淹沒無聞哉咸豐中知縣吳德容始建昭忠祠於城隍廟前入祀一十有奇同治元年再建昭忠祠於武廟左側入祀三千餘衆自吳德容解任後又大亂十餘年統計城鄉各里士庶之家有全行絕滅者有僅騰孤嫠者有死亡過半者求其苟完無損蓋百不得一焉今日者冊籍無存傳

聞互異雖經採訪或挂一而漏萬得毋有吞聲飲恨面壁高
隅者乎姑誌其畧以俟後補

官紳

知縣蔣嘉穀咸豐五年陣亡

知縣彭培垣同治五年殉難

知縣鐘毓材同治五年陣亡

訓導趙旭同治五年殉難

典史壽其仁同治五年殉難

卸任典史齊蔭曾同治五年殉難

前任典史婁奎咸豐十一年殉難

六品藍翎留黔補用從九品劉山咸豐五年守城傷亡

候選同知直隸州邱樹桐咸豐七年陣亡

候選直隸州州判李國材咸豐十一年殉難

候選直隸州州判羅新楷同治五年殉難

候選直隸州州判鄧懋官同治五年春二月遇賊於瑤慶里董

玄山被擒不屈借次子世桐罵賊殉難

候選訓導張書銘咸豐十一年殉難

候選訓導高鳳翔咸豐十一年殉難

候選訓導張步雲咸豐十一年殉難

分發湖南候補府經歷全其心同治五年殉難

九品職員鄧履中咸豐十一年殉難

吏員李華林咸豐十一年殉難

遊擊范定邦同治五年殉難

守備曾玉麟咸豐十一年殉難

守備劉學武同治五年殉難

千總王化龍咸豐十一年殉難

千總范鳳山同治五年殉難

六品軍功候選從九品蒙慶湘咸豐八年陣亡

三洞汎千總雷新建咸豐八年陣亡

方村汎把總鄧廷贊咸豐六年陣亡

把總汪逢春咸豐十年陣亡

把總蒙錫芬同治五年殉難

把總覃文福咸豐八年陣亡

外委吳邦瑞咸豐五年陣亡

額外周益發咸豐七年陣亡

額外黃坤泰咸豐八年陣亡

外委覃錫忠同治五年殉難

前任把總張文選咸豐十一年殉難

前任把總李定邦咸豐十一年殉難

前任外委康世富咸豐十一年殉難

前任外委蕭必清咸豐十一年殉難

前任外委李正邦咸豐十一年殉難

前任外委官紹基咸豐十一年殉難

儘先外委李琼林同治五年殉難

前任獨山巴開汛把總覃開明同治五年殉難

前任獨山巴開汛把總資龍位同治五年殉難

前署三洞汛千總蒙玉連沉毅剛勇同治五年賊攻水扛率練

抵敵賊眾圍之玉連手及賊三人中火銃死

儘先把總蒙玉榮同治五年賊攻水扛率練抵敵陣亡

世襲恩騎尉潘起鳳咸豐十一年殉難

廩生張 損同治五年殉難
增生胡元凱同治五年殉難
附生宣學賢同治五年殉難
附生劉家駢同治五年殉難
附生楊自誠同治五年殉難
附生覃衍犀同治五年殉難
附生覃德昌同治五年殉難
武生節 勳同治五年殉難

監生陳憲章同治五年殉難

附生任明善咸豐十一年殉難

武生陳綬章咸豐十一年殉難

武生鄭過奎咸豐十一年殉難

監生黃理泰咸豐十一年殉難

武生潘開榜從善之富室也。乙卯之亂，里人皆附賊，開榜不顧家資，潔身去亂避難三洞而死。

俊秀潘成美從善人。乙卯之亂，里人皆順賊，成美誓不附，棄家

遠去備歷艱險志愈堅後於水昔卡破被執罵賊賊怒斷其
頭剖其腹而碎其屍焉

俊秀王錫元拔貢王國駿之伯父同治五年殉難
圍首韋之儒咸豐八年陣亡

兵民

鄧廷貴方村把總鄧廷贊之弟咸豐六年隨兄出戰陣亡
馬兵朱元標咸豐五年拒賊於城北砲樓中鎗死

韋朝颺咸豐七年殉難

吳邦雪外委吳邦瑞之弟咸豐五年隨兄出征陣亡

黃力池黃錦春咸豐五年陣亡

璩守忠咸豐五年殉難

璩玉林咸豐六年殉難

璩老杏咸豐十一年殉難

唐道喜 劉福慶 劉有光

覃容先 覃玉光 楊二

黃先鋒 楊大順 欽文品

俱於咸豐七年陣亡

雷光禧三洞千總雷新建之子咸豐八年隨父出戰陣亡

覃廷魁咸豐十一年陣亡

王世流咸豐十一年陣亡

李瑋前任廣西南丹州州同姜鳳翔之父因娶姜姓之女其

家絕嗣故使其子鳳翔姓姜每代分支項姓三代後歸姓李

黎老光庠生黎大仁之子

官紹徽外委官紹基之兄

李國興歲貢李肇同之伯父

李廣山歲貢李肇同之兄

劉洪模庠生劉玉書之父

巫恩慶 蕭 雲 范二喜 文 發 劉成妹 王家祥

王家璧 黃老松 邱永壽 王老引 鄭士賢 楊二

袁安 鄭老長 鄧南邦 楊禮房 黃應基 黃應奎
黃應書 覃物講 羅福東 李永福 劉秉鳳 巫精靈
夏秉章 謝老孝 曹之喜 俱於咸豐十一年殉難

宣老長庠生宣學賢之子

胡元泰忠貢胡之粹之叔

李國林貢生李肇同之叔

璩 璠 鄧元興 李 孝

徐五七

錢應五

錢應彰

黃保壽 何照發 覃應宗

覃水線

覃文藻

覃文炳

楊愈材 秦猷瑛 秦猷璧 周老照 陳漢章 蒙雨化

楊發貴 王繼丙 范大喜 鄧廷芬 楊萬章 滕永發

王老官 曾光華 鄧懋杰 何扳林 黃發泰 覃國興

潘成車 賴天才 賴福生 賴蔭生 覃文安 楊玉升

覃阿紅 覃金保 覃品德 覃龍弟 覃付高 覃金貴

覃生貴 胡元亨 胡之惠 楊舒鳳 楊鳴鳳 楊自強

鄧元昌 童永祥 陳德光 張老亥 劉麻子 楊再奉

羅成二 蘇 四 蘇 二 姚雲保 唐 三 陳德輝

吳老岩 鄭老開 鄭老元 唐新富 陳新發 田正興
陳永安 胡老岩 胡阿勤 楊松保 江新有 江五
吳士均 唐保林 葉海清 葉海真 韋登雲 陳大榮
鄭開科 歐老元 黎大 黎二 黎三 李老喬
李振先 李金順 謝老冬 謝玉山 邱長齡 黃華成
李長茂 老老松 官紹封

均同治五年殉難

以上陣亡殉難諸人所記者不及百分之一而其死事情狀亦

各不同有奮勇當先而死者有守城受傷而死者有窮追逼過伏
而死者有城陷巷戰而死者有被擒不屈而死者有厲聲罵賊
而死者有投河投池投井赴火服毒自刎而死者吁皆忠也忠
則義矣外有一節可嘉亦附錄焉以為好義者勸

附好義

何壽思好善樂施董界里內板麥人每年於青黃不能接之時嘗於寨戎場以錢數十千施濟貧者

何顯明董界里外板麥人輕財重義

何家美董界里人為人慷慨喜修橋路

覃光榮巴灰里結毛村人捐貲

義學修巴爛之石橋一鄉

之善士也

李國瑾字伯瑜城內人有木山在羅家寨後嘗作棺數十具施

與貧者後以此山入公助修武廟並捐田數十畝為樟江渡船即東門外李家渡也渡田原價三百餘金

董芝盛字小汀城內人嘗於大飢時施飯數十日隆冬時施棉衣數百件

節孝

張林氏庠生張國華之妻歲貢張書銘之母廩生張楨之祖母也青年喪偶守節撫孤經撫院賀學院丁題奏奉

旨旌表建坊在案咸豐辛酉髮匪陷城至其家偕子書銘罵賊同日遇害薑桂之性愈老愈辣殊可欽尤良可哀也

巫朱氏少失所天撫孤養老數十年如一日業經大憲題請旌表並給予節孝可風四字

李陳氏恩貢李國材之母歲貢李肇同之祖母增生陳堯典之

姑母也青年守節矢志撫孤家貧甚藉女紅謀升斗嘗不飽自以米汁充飢而留飯飼兒使勤攻苦讀書中年後目漸失明迨國材入泮時不能視矣以手摩衣頂而哭曰我廿年茹飢不料得有今日逾數年抱孫而沒知縣劉樹棠有詩記其事詳載藝文志中

董熊氏太學生董芝盛之妻候選從九董成杰之養母歲貢董成烈之叔母也青年失配無子矢守冰霜不出戶庭者十餘年辛酉春髮匪陷城帶傷投河而死

張鄧氏處士鄧昌熾次女拔貢鄧瑞麟之姑母也家甚貧守節廿年惟日事針黹以奉姑撫孤後姑逝子天農農獨立苗匪陷城引刀自刎

林陳氏年十八失所天有子重蛟剛數月耳氏撫孤養老心如金石百折不回鄉黨欽之

黃陳氏外委黃坤泰之妻也其夫陣亡遺一子一女氏青年守節撫子女成立今抱孫矣

何和氏庠生何長盛廩生何長達之伯母也年二十餘失偶無

子矢志靡他撫侄為兒今年將六十矣

曹邱氏孝廉方正邱樹桐之女恩貢曹之杰之嫂俊秀曹之指之妻年二十四而夫歿氏立志苦守節孝事翁姑撫侄興為己子鄉黨稱之

巫李氏恩貢李國材之侄女上江外委巫廷勳之妻也其夫在任殉難無子息矢志柏舟守節歸母家後十餘年死於亂

李梁氏青年喪偶自矢堅貞上有翁姑下無子息氏送終養老之死靡他

劉宣氏營兵劉應祥之妻庠生宣學賢之妹十九夫亡無出茹苦守節二十餘年無他志

林李氏庠生林大農之妻年二十餘夫亡以針黹自給足跡不出戶庭者三十年閭里賢之

羅周氏邑拔貢羅新楷之媳後秀羅琪玉之妻處士周良桂之女也十七于歸十九夫歿立志守節事翁姑惟謹翁姑歿經理喪奠居然孝子已無所出踽踽農農迎孀母周劉氏同居母女二人俱矢清操相依為命節之苦者也光緒十年學院楊贈台

築懷清扁額十一年撫院潘 學院楊 題奏奉

旨旌表建坊

邱樹桐在憂服之中未葬不茹葷三年不高坐每食必面壁事死如此事生可知矣

孝為百行之原至難言也即求之往古曾不多覩况近今乎然而邱君所為成亦人子所難能謹記其畧以俟後之採風者梁李氏文生梁自成之母夫早逝苦操針黹撫子成名光緒十

三年學院楊 贈給松筠晚翠匾額

石蒙氏俊秀石炳芳

夫改時二十一歲青年守節白首完

貞代夫盡職孝事翁姑教子成家勤操耕讀光緒十年學院楊

題贈匾額經內閣中書李錫齡呈報禮部題奏十三年十二

月十九日奉

旨旌表坊待建

李國瑾父病百藥不效割股以進其墓聯云割股奉親今之孝

子嘔心創業古之勤民知縣吳德容所製也

周老發母病臨危割股和藥

蔡老安割股為羹以療母病

劉鄧氏夫疾久不愈割股肉以醫之

割股非孝也先儒論之詳矣幸而子身無恙無補於病不幸而
至於傷生將以死誰懟乎且即子身無恙仍不可以為訓何也
以父母之遺體不能全受全歸罪一也親竟溘逝而已之創痛
未痊殞葬均難致慎罪二也親幸獲安聞子為己虧體倍傷其
心罪三也不使親知累親有食子之咎己陰博孝親之名罪四
也然則割股之事孝者所不為也今奚取於是而書之夫亦曰

可以為難矣孝則吾不知也乃至夫婦之間且猶有率是以行者其區區之誠亦足堪憫惻云

貞烈

荔波兩次失守婦女之盡節者不一而足或投河或赴井或溺廁或沉池或懸樑或服毒或攜孫抱子或以媳隨姑或撲火自焚或引刀自刎或罵賊被殺或跳城受傷或閉門自盡或絕粒以亡要之其死雖異而所以死義則同也迄今年湮歲久傳聞異辭難以周知茲謹將死狀備列於前以所悉姓名臚列於後具有見聞所未及者姑留以俟採訪云

張林氏歲貢張書銘之母咸豐十一年髮匪陷城罵賊殉節事

見節孝

王唐氏王祥之妻咸豐十一年罵賊殉節

邱李氏湖南安化知縣邱育泉之母咸豐十一年攜幼孫承歡

女孫秀鳳僕秀祥婢桂香投官署蓮池殉節事見藝文

邱黃氏安化知縣邱育泉之妻咸豐十一年隨姑投官署蓮池

殉節

陳邱氏安化知縣邱育泉之妹咸豐十一年隨母投官署蓮池

殉節

鄧巫氏拔貢鄧瑞麟之母咸豐十一年攜孫女複香婢女老妹

赴後園大池殉節

鄧李氏拔貢鄧瑞麟之妻咸豐十一年隨姑投入後園大池殉

節

官王氏外委官紹基之妻咸豐十一年自刎殉節

璩周氏咸豐十一年攜孫貞臣女小妹使女荷香投水殉節

璩周氏守瑞之妻咸豐五年賊殺殉節

璩陳氏守瓊之妻咸豐五年賊殺殉節

璩彭氏文魁之妻咸豐十一年賊殺殉節

黃鄧氏武生黃富成之母咸豐十一年抱幼子投河殉節

璩范氏從九璩守先之妻同治五年投洋池殉節

王鄧氏庠生王肇修之妻咸豐十一年投洋池殉節

李黎氏庠生李錦受之妻

黎徐氏庠生黎復瀉之妻

闕余氏監生闕振新之妻

以上三人俱於咸豐十一年投厠殉節

蕭王氏分發廣西縣丞蕭承勳之母

蕭潘氏分發廣西縣丞蕭承勳之叔母

蕭鄧氏分發廣西縣丞蕭承勳之妻

以上三人俱於咸豐十一年投揚公井殉節知縣吳德容題

石曰清同古井廣西象州主事鄭獻甫為之傳

張梁氏廩生張楨之妻咸豐十一年開門自縊殉節

高鄧氏訓導高鳳翔之妻同治五年投泮池殉節

雷陳氏馬兵雷光禧之妻隨姑劉氏咸豐十一年投西門新井

殉節

雷劉氏千總雷新霆之妻咸豐十一年投西門新井殉節

王趙氏千總王化龍之妻同治五年投井殉節

董雷氏歲貢董成烈之妻咸豐十一年投井殉節

黃黎氏黃元泰之妻咸豐十一年同女領袖自刎殉節

胡李氏恩貢胡之粹之妻咸豐十一年自刎殉節

范王氏范二喜之妻咸豐十一年服毒殉節

李宣氏吏員李華林之妻咸豐十一年赴池殉節

蔡張氏咸豐十一年投井殉節

董熊氏監生董芝盛之妻咸豐十一年投河殉節

滕劉氏庠生滕永蘭之妻

滕陳氏通事滕永芝之孀

滕王氏通事滕永芝之妻

滕秦氏通事滕遠俾之妻

以上四人俱於咸豐十一年城陷赴火殉節

鄧姜氏把總鄧廷贊之妻咸豐十一年城陷攜女定柱赴井殉節

鄧彭氏守節撫孤咸豐十一年開門自縊殉節

蕭張氏蕭雲之妻咸豐十一年服毒殉節

劉謝氏武生劉紹圻之妻賊殺

王周氏王之音之母守節二十餘年自殺

陳張氏陳鳳祥之母守節二十餘年投廁

夏黃氏戰兵夏秉章之妻

楊謝氏楊禮房之妻赴火
李陳氏戰兵李老福之妻

俱於咸豐十一年投井殉節

黃王氏黃瑞香之母

文陶氏文發妻投溷

宣陳氏宣學斌妻投井

范璩氏范大喜之妻

鄧趙氏庠生鄧炳之母

李唐氏李福之妻投河

劉高氏書辦劉福海之妻自縊

梁楊氏梁朝賡之母投火

曹陳氏庠生曹之選之母罵賊殉節

劉厲氏劉春之母火焚死

黃巫氏庠生黃學灝之母罵賊殉節

鄧連英自幼瞽雙目不適人賊至自縊死

巫劉氏巫承恩之祖母殺

巫史氏巫承恩之母殺

巫黎氏巫廷英之妻殺

黃謝氏監生黃理泰之妻

黃王氏街民黃觀泰之妻

黃蔡氏庠生黃學灝之妻賊殺

李黃氏街民李長春之妻及女小鳳俱於同治五年罵賊殉節

李謝氏候選教諭李國材之妻歲貢李肇同之母同治五年攜

女玉娥投河殉節

張鄧氏街民張有桂之妻處士鄧昌熾之次女也同治五年自

刎殉節事見節孝

李王氏街民李廷璋之妻

李范氏街民李廷梅之妻

李黃氏街民李廷槐之妻

均於同治五年自刎殉節

李楊氏監生李廷材之妻

李周氏街民李廷春之妻

李鄧氏街民李益茂之妻

李游氏街民李瓊英之妻

鄧高氏街民鄧廷玉之妻賊殺

黃李氏街民黃元昌之妻

譚李氏街民譚致謀之妻

楊李氏揚少師母 田氏少師妻

俱於同治五年投水殉節

黎劉氏黎勛如母 梁氏勛如妻 蕭氏勛如嫂

鄧劉氏從九鄧履中之妻

陳田氏陳紹基之妻

鄧劉氏街民鄧南英之妻

林黃氏庠生林春芳之妻

黎蕭氏街民黎老先之妻

曾羅氏街民曾光華之妻

黎藍氏街民黎茂山之妻

黃王氏街民黃觀佑之妻

劉宣氏街民劉勝章之婦

覃陳氏圍民覃海壽之妻

黃王氏黃越之母

覃陳氏圍民覃河金之妻

羅覃氏武生羅增齡之妻

張黃氏張謂先之妻

辜王氏辜得貴之妻

鄧楊氏戰兵鄧廷芬之妻

徐鄧氏街民徐玉清之妻

楊胡氏 李鄧氏 黃鄧氏 何鄧氏 李楊氏 李王氏

何和氏貢生何長達之母破壘死

何霍氏何唐先之妻破洞死

涂馬氏涂天瑞妻殺 媳羅氏殺

宣傅氏庠生宣學賢之妻

楊曾氏楊玉貴之妻殺

宣黃氏宣老長之妻

鄭何氏鄭開科之妻殺

羅劉氏羅登之妻

姜尹氏姜繼昌之母殺

賴彭氏

穆韋氏穆得六之妻

覃蒙氏文生覃金錫之母

吳陳氏吳云之之母殺

覃何氏文生覃金錫之庶母

陳郎氏陳盛國之母殺

錢李氏錢興祥之妻投天后宮池

劉巫氏劉石安之母投井

黃錢氏黃能之妻投井

胡張氏 楊羊氏 邱孫氏 黃宣氏

楊陳氏楊玉升之妻投縣池

邱楊氏街民邱永發之妻年二十餘夫亡志矢柏舟已三十年

賊至開門自縊

張米氏歲貢張書銘之繼室賊殺

羅唐氏街民羅阿央之妻

陳卽氏街民陳永安之母

周李氏周廷華之母守節四十餘年自刎

周巫氏周廷華之妻賊殺

巫汪氏街民巫福保之母

周李氏周廷桂之妻賊殺

張胡氏兵吏張燦之妻

李羅氏年二十夫亡守節同治五年自刎殉節

官胡氏營兵官紹封之妻

官周氏營兵官紹薇之妻

劉陳氏劉紹杰之妻賊殺

董林氏街民董芝秀之妻

王吳氏王開元之妻賊殺

王傅氏王潤元之妻賊殺

王陳氏團民王開勳之叔祖母咸豐五年殉節

吳淑人陳氏咸豐十一年春正月城陷慨然曰婦人之義不出閨中守正死分也遂攜女香瑛投蓮池殉節邑貢生梁占魁覽以詩有滿城節義為先導惹得羣花不愛春之句贊曰吳宜人者知縣吳德容之如夫人也聰明慈惠為邑女宗在荔數載值干戈紛起糧餉不繼嘗脫簪珥以助軍費織戰袍以賞勇士吾邑多事之秋所以能保障數年者淑人與有力焉及乎全城奔潰慨然守正以死蓋其死生之義明而利害之念泯固能節烈若斯也噫共姪而後舍淑人其誰與歸

范淑人王氏同治五年投井殉節

齊孺人汪氏被焚死

劉安人徐氏投天后宮池

趙孺人氏投泮池

林孺人氏被焚死

壽考

王公都勻人乾隆四年生現年一百三十四歲道光初來荔之地栽場住有子二以渡船為業二子俱四五十歲病故王氣憤不為生計居山洞中時往來於巴灰羊奉各村乞食村人常給錢米馬前嘗帶王興貴欲迎養之以病辭前知縣唐則遂嘗召至署厚賜之不受現居拉強洞中自云每日出外乞食精神倍爽若飽食安居數日則病立至亦奇矣哉
韋阿杰恒豐里農民也年壹百零四歲精神猶健嗽飯食肉

步履如常每值東作嘗曳杖與諸孫操作不倦云

仙釋
明

黃和尚逸其名雲南大理府人鬚髮如戟骨格奇偉少隨劉大將軍綆征番有功偶至黃平飛雲岩頓悟前因遂削髮出世天啟中至荔邑巴嶺之仙人洞愛其幽僻因住錫焉土人歲時瘟疫旱潦咸延之以禱屢有奇驗於洞內地池旁面壁二十餘年蜕化而去遺像印於石壁相相欲活右側有朱書三十二字非篆非隸人不能識今洞門清虛靈洞四字其筆

跡也

方技

國朝

涂兆清邑人其教傳至湖南之尹真人以祈禱世其家至兆清而教益宏曾遇異人傳度每登壇施食能運鏡眼見人生魂攫食以令牌擊之退則其人生不退則其人必死嘗考驗之百不失一又能以雞子照水碗即知其家休咎復工戲術嘗以帶化為蛇吞人樹梨殆盡人懇之頃刻還於故處始知古人吐烽非虛語也

秦廷壽邑人精醫術而不立崖岸其為醫不拘貧富即雪夜延之必往數十年來全活甚眾令壽登八旬猶矍鑠不衰云

流寓

國朝

方憲修廣西思恩人字滌山別號清溪居士以門前有清流如帶也工詩文精書法喜交遊敦古誼咸豐初年粵匪朱亞狗作亂避難荔城結交皆一時名士年餘歸里猶惓惓於荔邑焉丙寅之亂荔邑人民避難思恩凡相知者皆量力拯濟俾得其所可謂厚矣曾官永從知縣古州司馬解組歸以疾卒在荔著作甚夥惜皆散軼不傳只記其贈貢生李國材送

子上學七絕一首畧見一班耳詩載藝文志中

黃飛雲廣西慶遠府人遊學至荔其為人個黨不羣工書法好吟咏善化風雨竹下筆疑有神助在荔友教數載及門成材者甚衆後年老還鄉築釣台於北郭江岸名曰飛雲釣台終日把釣臨江以娛晚景慶陽之高士也

荔波縣志

風土志

王者觀風問俗辨其異同考其得失驗其美惡而引導之
所以使民同歸於善也風俗所係顧不重哉荔邑遠居荒
服元明以前氣象渾噩耕田鑿井有太古風然質樸有餘
而文明殊不足也自我

朝仁恩叠沛禮教頻頒百餘年來民敦禮讓士習詩書喪祭冠
婚悉遵典禮飲食衣冠率崇儉樸即一鄉一里間莫不各

安耕織漸臻孝友守法奉公睦鄰篤族煥然有熙熙皞皞
之盛孰非

國家雅化薰陶作育之所致哉志風土

土俗

正月元旦清晨以茶葉香燭恭祀竈神名曰接竈次復焚香秉燭陳設年糕米花清供等物於堂中拜叩

天地皇王及祖先畢啟門出行謂之開財門以次叩禮尊長親

友彼此慶賀名曰拜年

立春之日五省會館各裝春戲抬春牛芒神隨地方官迎

春米郊

正月初九日名曰上九五更陳設素齋祭品慶祝

昊天上帝以祝平安自初十日至十五日晝則舞獅子演百戲

夜則舞龍燈燃花燈及山禽水族諸盆景

十五日紳耆庶民各設茶品燃燈於祖墓前謂之上燈

元宵鼓樂喧闐花爆繽紛極終夕遊觀之樂

二月雨水節前後三日植花木接菜樹易活

春社日採野蒿和糯米為飯以祀新塋謂之攤社

是日城廂村寨皆刑牲灑酒恭祀土地神以祈年豐

清明日各除草砌石修振祖塋不擇日俗云是日土王不

用事故也

清明日折柳插門或髻於兒童髻上俗傳可以延壽命
清明前後拜掃先塋標紙錢於其上具牲醴宴親友此往
彼來半月或一月乃止

四月初八日為佛浴日各家書佛生四月八家家嫁毛辣
毛辣一去不回殺以避辣蟲是日也以楓葉揉碎漬水染
糯米為飯名曰黑飯古名青精飯土人以飯和肉飼牛俗
謂報牛之力使得脫化埋或然歟

五月五日端午節各插蒲艾於門以角黍互相餽送泛蒲
觴繫長命索飲雄黃酒逗百草浴蘭湯

十三日為闕帝勝會前後數日或有大雨為之磨刀水
二十八日為城隍會士民焚香慶賀備旗傘恭奉城隍神
像出府遊四門以除惡癘

六月六日祀土地神晒詩書衣服不蠹農夫以酒飯祀田
祖挿紙錢於田中以除螟螣

七月自初十日至十五日名曰中元會每日焚香設饌烹

婚喪禮

荔邑各里婚喪喪時各隨其俗以為禮而已自知縣吳德容
頒婚喪禮各處漸次遵行易澆薄之俗為禮樂之區厥功鉅
矣謹將婚喪禮節錄於左

荔波為黔疆東南邊邑泉潔山深風俗最樸人耕戶織時還
讀書余攝篆於茲軍政之餘纂樂與士民相朝夕惟僻遠鄉
村與生苗接壤之地慮其習俗沿移或遂莫返因出示嚴誠
之外復撮婚喪禮之要典編以俚言用通雅俗編給閭閻為

余親行家喻戶曉之意至於士為四民之首自當倡率表行
廣為教導使樵夫牧豎村嫗家僮一齊都曉欣欣向化閭邑
蔚然為秉禮之邦焉是則余之所厚望也

婚禮

議婚

擇配議婚先避同姓只訪求家聲清白女子賢淑不在貧富
知有良家好女子宜請親友中正直老成人為媒妁以通兩
姓之意俟女家許婚斯行納采問名禮

式

照欸式恭整指寫如下凡祝文俱

焚香炳燭贊禮者

唱主祭者就位

以掌家之人主祭陪祭者

亦就位

求婿之男子陪祭立跪叩首再叩首三叩首起

此為

禮三叩

跪讀祝文上香獻爵獻饌獻帛

此為獻叩首再叩首六

叩首起

焚文帛揖禮畢退位

合前一跪三叩至此共為二跪

照樣乃納

采問名於女家禮用兩紅帖一以納采一以問名

采納

台命

敬求

帖式

泰姻眷弟

端肅頓首拜

以紅紙摺作五篇計十頁內分四開名為金帖凡寫帖皆

為長主之為泰敬帖外面書一正字當中畧近上寫外用紅封套貼紅箋一條書全福二字

乾造 年 月 日 時大吉

問名帖

款式

坤造 年 月 日 時大吉

帖外書天作之合四字

帖內坤造下留空俟
女家填寫女子生年

外用紅封套貼紅箋一條書鸞書二字

納采禮物用雞酒鴨猪肉四色

或雞酒或酒肉量力
而行惟紅箋不可少

問名禮帖以男名生年問女名生年遣媒氏同禮物至女家

女家收下紅帖禮物掌家之人沐浴更衣

女子在房
內不必出

告以女許字某婿也設祭席於堂上

祭品
如前祝文一道

女 維

某年歲次 干支 月建 干支 朔日 干支 祭日 干支 嗣孫某某為

受 某女許配某姓茲行受采許字之禮謹以肴酒香楮之

采 儀致告於

祖宗神主位前曰惟我

許 祖宗神主位前曰惟我 祖清芬載育蘭薰金貞玉潔上托名門茲受采禮許字為

字 婚肅尊上告

祭 靈其鑒欣謹

祖

祝告

焚香炳燭贊禮唱主祭者行一跪三叩禮許字之女子不必出房跪讀
祝獻祭品亦如男家禮樣行六叩禮焚文帛揖禮畢即將女子生年
填寫於男家問名帖內坤造不行中並報男家以紅帖

敬遵

台命

泰姻愚弟

端肅頓首拜

帖外面書一正字

式性未納家男報

外用紅封套貼紅箋一條書全福二字
將完要即行的徵請期禮

納徵請期

納徵幣聘所以重之也請期告親迎之期也須在親迎前數
月行之先辦女家得兩禮用紅帖並禮物

謹定 年 月 日 時親迎

大吉

請期帖式

姻愚弟

端肅頓首拜

徵納家男

帖外面書一正字

外用紅封套貼紅箋一條書全福二字

禮物以雞酒茶菓首飾衣服為率男家不必過儉有力者再
家不可奢求即得雞酒亦足成禮以禮物原條稱家之好無
既屬威誼若力有不足則彼此相愛不令浮用以惜財用蓋
在禮也禮物備具男掌家之人及將娶之男子沐浴更衣祭
祖先告將婚娶也設祭席於堂上祝文一道

維

某年歲次

月建

朔日

祭日

嗣孫某人茲為

請期祭祖祝文款式

某男 納徵請期謹以肴酒香楮之儀致告於

祖宗神主位前曰於男成立爰將授室重聘名媛卜云其吉

迎親定期合卺有日潔虔上告薦茲芬苾謹

告

掌家人及將婚男子行二跪六叩禮禮畢遣媒氏同禮物至
女家女家收下禮物女家掌家人沐浴更衣祭先祖告將婚
嫁也設祭席於堂上祝文一道

維

某年歲次

月建

朔日

祭日

嗣孫某人茲為

某女受聘定期謹以肴酒香楮之儀致告於

祖宗神主位前曰撫茲弱息幼勤內則受聘高明及笄溫然

逝將于歸勉符四德告安

先靈肅虔翼翼謹

告

掌家人行二跪六叩禮

將嫁女子
不必出房

男報

敬迓

綵輿

姻愚弟

端肅頓首拜

敬侍

花燭

姻愚弟

端肅頓首拜

帖外面書一正字

外用紅封套貼紅箋一條書全福二字

家請明帖式 家男台帖式

此時女家擇請宗族或親戚中老成有德知禮內眷一人為
傅姆以為女子之師教以幽閑貞靜之德和順卑遜之辭端
凝柔婉之容絲麻中饋之事以教成為婦之道也又須預備
為新婦謁見翁姑贊儀菓點心茶食諸品及女子自用花
冠禮衣禮裙奩具等物亦須量力豐儉當禮可也

親迎

至將親迎之前數日男家擇宗族或親戚之中老成知禮有
才具一二人為執事料理一切備辦花轎一乘為新婦紅絲

轎一乘為新即乘坐或乘馬亦可小轎二乘為贊禮媒氏乘坐或俱擇親
族中老成知禮者二人一為贊禮一為知賓陪禮送客擇內
眷有福德者二人為花燭主盟合巹又內眷一人為伴婦以
助導新婦一切鼓吹四人綠旗四面或用六或紅棹圍燭台香爐香
燭楮帛燈綵全紅帖二一為男掌家用一為男子用

拜親迎

姻惠弟

端肅頓首拜

帖款式

子婿

端肅頓首拜

帖外面俱寫一正字

女家亦於于歸前數日預備花紅長短各一段長披婿肩短遮女面擇親族知禮者一人為陪贊擇老年伯叔母或老年兄嫂或親戚老年知禮內眷一人為女送親斷不可用少年婦人亦不必又擇胞兄弟或伯叔輩一二人為男送親若路途遠只用男送親一

人亦可男送親均各備紅拜帖長輩稱姻侍生平輩稱姻慈弟下輩稱姻慈侄孫輩稱姻再又覓老實老婦人一人為侍婦以隨侍女子或有老婢為侍婦

亦可

至迎親日張燈結綵貼聯榜門執事者安排轎馬夫役鼓樂綵旗綵燈畢設席爵於祖宗神前男子盛冠服率子升堂父醮贊禮在旁代唱醮文曰

某年五春夏仲秋冬之月上中下旬幾日之吉嗣孫某人為某男完娶謹

醮家男

迎子親文式

奉清酒恭奠於

祖宗神位前而醮之曰茲當親迎爰爵而命既求內賢敬位
外正仰承世德福爾子孫汝邁往哉翼繁家慶 其敬

聽之

父於神座席前躬親舉爵命子迎婦子跪受於席前禮畢而
下告辭諸長輩於是親友送於門男子上綵轎鼓吹旗綵導
行於前媒氏贊禮先行綵轎帶雁或雞鴉他牲並二拜帖起
行花轎繼行至女家岳翁迎於門媒氏贊禮先入婿隨之每

門揖而後入立於堂外贊禮升堂請婦翁升堂上坐乃命婿
登堂再拜奠雁四拜成禮女家陪贊者為婿贊花披紅乃請
婿及媒氏男贊禮序坐侍茶女家於婿至時即為女子櫛沐
戴花冠穿禮衣禮裙於待婿茶時即扶女出房升堂拜祖先
拜父母女俯伏陪贊在旁代唱誡文文曰

維

某年孟春夏仲秋冬之月中旬幾日之吉嗣孫某人為某女子歸謹

女家辭堂

陳奠儀於

祖宗位前而告誡之曰禮儀既定肅阿虔聽曰辭曰歸孝順
恭敬宜其室家門楣光勝厚重溫和勗哉勉旃 汝往

敬之

女聽畢再拜起立父教之以孝順翁姑母誡之以敬重丈夫
傅姆乃為新婦加紅巾蓋頭遮面此時婿已茶罷男贊禮命
花轎升堂唱請新人升轎鼓樂隨侍婦扶新婦進轎坐垂
簾出門婿起辭行婿親至花轎前封閉轎門料理一番即三
周婿即先歸鼓吹旗綵導花轎隨行女家男女送親並器具

齊行

合巹

花轎到大門外即於堂中焚燭焚香又於洞房內燃花燭設
席置酒畢婿揖轎入花轎乃升堂贊禮唱請新郎登堂即樂
作三奏新即乃升堂立於堂之左贊禮又唱請新人出轎又
作樂三奏侍婦揭簾扶新人出轎立於堂之右贊禮唱新郎
新婦行拜堂禮此拜天地神靈也樂作細吹贊禮行唱一跪
三叩禮跪讀祝文用紅紙預先寫就

男

維

家

某年幾月幾日之吉下民姓名某聘某氏為妻敢昭告於

拜

皇天厚土神祇位前曰肅意精虔上告

堂

穹蒼晉證

大地

結

百靈通元氤氳交泰乾坤旋三才位育福壽綿延

文

二跪六叩三跪九叩禮畢贊禮唱請新郎新婦入洞房新郎

式

立席左新婦立席右花燭主代去新婦蓋頭罩面把酒與夫

然 婦夫婦交拜四拜成禮坐床片刻禮畢新郎出房新婦在房
不得言笑凡有欲言皆遣侍婦代達其意此後三日之內皆

祭先祖拜翁姑

合巹之明日雞鳴時新夫婦並起洗櫛俱盛禮冠禮服黎明
掌家人設祭席於祖宗神位前祭品如前宜從豐祝文一道用紅紙寫

男家台

某年孟春夏之月中旬幾日之吉嗣孫某人為某男合巹婚

謹禱於

祖宗位前曰於戲

祖德子孫世祿新婦來歸式奉蘋藻合卺永偕以成家道

降鑒於茲富貴壽考

燃香燭贊唱主祭者行三叩禮讀祝獻祭品行九叩全體焚
文帛禮畢退位贊唱新夫婦升堂行九叩禮禮畢請翁姑升
堂上坐新婦獻菜品於翁姑贊禮侍婦代執而退夫婦在下九拜全體
有祖父母者先拜祖父母乃拜翁姑次拜媒氏徧拜內外尊

長輩俱四拜成禮平輩者彼此一拜成禮卑幼輩來拜見新
夫婦禮畢夫婦告退於是請宗族親戚開宴作樂以歡樂焉

翁姑饗新夫婦新婦下厨修婦道

三日翁姑設席於堂上召新夫婦進賜酒食於新夫婦夫婦
拜受禮畢翁姑由右降新夫婦由左降新婦入厨房修中饋
禮焉新婦到家一月之內不得輕易言笑不得至門外此後
凡有所事無問大小皆稟請於姑得姑命而始行不得擅專
凡進食於翁姑恭敬捧盤而進侍立食畢撤下乃退凡家庭

內卒見翁與伯叔父及夫長兄須起迴避見姑與伯叔母及夫之嫂須起立侍卑幼須慈惠待之凡桑麻結織蓄蔬洗級翁姑丈夫衣履料理食用器物須整齊潔淨尤宜勤謹忍讓勿多言語一家之中和氣一團方是載福氣象

廟見

廟謂祖祠宗廟即家廟也見以新婦見也古者三

月廟見後用一月令用三日或有家寒或有事故也即於二日廟見亦可權宜若無家廟者存其禮可
拜見翁姑之明日設席於祖廟新夫婦難鳴浣櫛盛禮冠禮服詣翁姑黎明翁姑率新夫婦於廟堂上夫隨翁婦隨姑亦

分左右立翁姑先拜祖先以新夫告見於祖也祭品如前從
豐祝文一道

雜

某年歲次

月建

朔日

祭日嗣孫某人謹備有

婦

酒香楮之儀率某男新夫婦拜見於

廟

祖宗神主位前曰

堂構崇隆惟孝惟忠開基厚德啟佑彌豐樂和具奏酒清
味同肴品既潔芬馥鬱葱新成夫婦來薦

祝見

式文

宗公瞻拜追享裡忱上通穆穆我

祖降蒞昭融樂康欣顧丕承在中錫爾遐福奕禩無窮

焚香炳燭贊禮唱主祭者就位翁姑上跪叩首再叩首三叩

首起跪讀祝文上香獻爵獻饌獻帛叩首再叩首六叩首起

跪叩首再叩首九叩首起復位翁姑在上新夫婦就位跪叩

首再叩首三叩首起跪叩首再叩首六叩首起跪叩首再叩

首九叩首起焚文帛復位新夫婦分左禮畢告退

歸寧古者歸寧在一年內外今用一月所以體女父世恩愛之情若數日歸寧則斷不可

一月後翁姑擇吉日為新夫婦備贊儀豐儉命新夫婦俱乘

盛冠服同乘轎至婦父母家男或乘馬亦可婦須侍婦之兄

弟迎於大門外婦之父迎於大門內婿皆一揖隨入升堂侍

立於左婦母與伯叔母迎女於大門內女俱隨手揖入侍立

於堂之右請岳父母上坐新夫婦獻羹脯茶食四拜成禮依

序拜見長幼女隨母入房岳家設席於堂上夫婦隨岳父母

分東西序坐飲畢岳家回送土產以為新夫婦拜見禮次日

夫婦同歸此後岳家有慶吊大事婦當回外家一行者必稟

喪禮

請翁姑丈夫命候得許可家長遣轎送去或丈夫偕行亦可

預備後事

父母年高為子孫者當極力孝養之外更須預備百年身後之事從容辦就免致臨時草草遺恨無窮在人子之心何如夜衾棺槨附近於身之件宜時常檢視如有安葬之地若不預卜吉地致停親柩覓地經年最為不可凡擇地以土厚平穩不受水浸風衝難收踐踏久淹冥宮人子受恩罔極既不能報及親身復以父母遺骸暴露彌年以妄冀必之富

貴於心何忍且富貴福澤皆從積德而來能積德者好地不求而自至況積德之家亦不須所謂發福之地而世澤所庇亦含笑求壤矣

侍疾終養

親有疾病人子悉心調治藥食必親身前嘗不可片刻暫離左在家中人亦必分班隨侍俱不可脫衣解帶俟疾瘳為幸萬一病篤莫療必須知會宗族至戚一以侍親長別漸至彌留子孫骨肉環侍所屬之際不可紛紛問苦坦化之時精氣散亂心神孤蕩不自持天崩地烈奈何奈何那堪頓擗須忍痛將之可也

小歛

一日沐浴靈身具冠服衣履設版床為靈床扶上正寢以衾覆歛哭泣痛哀奠以香茗朝夕上食以家常飲食供陳不忍死親之意

大歛

三日之內可以大歛成服

宗族中酌議一二人主辨喪事并棺木於堂中子孫奠於寢祭文一道

維

大歛

某某年歲次

月建

朔日

祭日

祭文款式

不孝男某某等致奠於

顯考

府君

之靈位前曰不孝

等孽不自殞禍延我

親修忽棄兒百端莫挽從此入棺之後永無見面之期萬古

長終昊天罔極尚

饗

寢祭畢奉靈入棺棺中先用紫灰潔淨者細篩過鋪指掌一單一大幅長七尺寬五尺鋪棺內幅四起先將上下兩頭之四旁乃扶靈入棺端正將幅單四垂攪起先將上下兩頭之四於棺內靈胸及足股間先將左股間倚棺牆下支穩用灰或綢帛卷子於靈肩項際反腰股間倚棺牆下支穩

葉實頤兩邊對稱方無偏側左右之虞支託將幅單打開用
線齊直於棺上較定端正訖將幅單四方各向外卷至
棺內四旁牆處响指交界際下訖子孫各審視器決蓋棺
復線較端正訖欲以食覆胸齊足
口元好設靈座於堂上子孫宗族內外各以尊卑遠近之親
按制製成服

本宗九族五服正服之制

斬衰服至粗麻布為之新衰用三年父母之喪服此有

祖父不在高祖父母之喪曾祖祖父俱不在者亦皆承重服

此

齊衰服用稍粗麻杖期喪無力須杖而庶母之喪服此妻

之喪亦服此杖期庶母之喪服此妻

父母之喪姑之喪杖期庶母之喪服此妻

外家亦降一等未已之同父親兄弟姊妹室之喪皆服此已

嫁時與人子同已之同父親兄弟姊妹室之喪皆服此已

之子與親姪及長子婦與嫡孫之喪亦服此正妻所生之長

為子者嫡子稱為庶母

齊衰五月曾祖父母之喪服此齊衰三月高祖父母之喪服

此

齊衰服

之喪亦服此

父母之喪姑之喪

外家亦降一等未已之同父親兄弟姊妹室之喪皆服此已

嫁時與人子同已之同父親兄弟姊妹室之喪皆服此已

之子與親姪及長子婦與嫡孫之喪亦服此

為子者嫡子稱為庶母

齊衰五月曾祖父母之喪服此齊衰三月高祖父母之喪服

此以上皆服齊衰

大功服布為之粗熟係九月與已同祖之堂兄弟姊妹之喪服此

已之象子婦已之象孫及親姪婦之喪亦服此

小功服布為之粗熟係五月與已同曾祖之伯叔祖父母祖姑堂

伯叔父母堂姑再從兄弟姊妹之喪服此以上皆共曾祖者堂姪

親姪孫婦已之嫡孫婦之喪亦服此

總麻服用稍粗熟布為之與已同高祖之曾伯叔祖父母曾祖姑族

伯叔祖父母族祖姑族伯叔父母族姑族兄弟妻堂姪婦

親姪孫婦之喪亦服此

服成依位次而哭奠以饌祭文一道

維

某年歲次 月建 朔日 祭日 不孝男 等

致奠於

顯妣妣考 顯府君之靈位前曰父用考母用妣 用顯人痛維我

母竟從此辭以鞠育之劬勞致精神之減耗心疲力憊促

景彫年兒罪通天徒生何地粉身碎骨贖報無從尚冀

歸來長依

膝下尚

饗

祭畢各依位次而哭此後朝夕上食皆哭喪事哀哭出於
蓋以吾親一去萬古不回子孫從此不聞營效之音莫親
笑語之容到心肝天搶地即欲從之而去不肯自生
矣至親有臨喪而歌者打銅鼓歌木槽男女混雜高歌其
理乃俗習氣喪而極改以至於復爾孝弟之風一造神主
經指不備即相約極改以至於復爾孝弟之風一造神主
望者題之備造奠具如石灰此最不可火雄黃蛇蟲硃砂

此不過借其鎮重以奠幽靈若無亦可即有亦不必多
起親視凡在近身近棺之物若屬可寶者極須檢點古
尊親自能用心深處矣墓碑高字宜大書而深刻墓誌
愛親自能用心深處矣墓碑高字宜大書而深刻墓誌
世系里居生卒年月並其德行功高字宜大書而深刻墓誌
業以倫後來開鑿之虞不求美譽輒車登杆繩紼之類最
為要務他如冥器及各儀飾量力如分而已

殯奠

奠具未備或卜宅未就則暫且出殯總以量力為禮子得
地過餘或因擇選拘忌遠近零落因殯為奠具已備宗
良可哀也至客櫬更宜入土異日啟遷可也奠具已備宗
族親友遠近俱至即可安奠古禮奠隨賤等次為日月

引發祖辭棺以祭堂

忍親棺入土然久停不奠體魄未安卜得奠日至期而堂
奠而盛墓如生如存心而已矣
祭設祭席祭用力者祭文一道

維

某年歲次

月建

朔日

祭日

不孝

致奠於

顯考

顯妣

府君之靈位前曰我

母

父

孝思義訓

啟後光前

備事畜以成家

當無力以就養而

不孝形骸徒負

几杖虛將未盡菽水之歡頓隔幽冥之

引

發

祖辭棺以祭堂

祭文款式

告尚

饗

路茲將窆穿痛何忍分慘極傷心用申虔

祭畢之後即以柩辭於祖而始發引哭泣扶柩至奠所開壙

告祭窆棺先有外擲者審視端正訖以石灰錐黃硃砂拌土和

勻築之大約土七灰三以土之燥濕為灰之增減隨拌隨勻

於棺之四周以力夫六七八各執杆環繞走築須堅實有聲

乃從下上如前築平棺後壘土封棺中畧高力夫立兩旁交

形亦須堅實

置墓誌宜以石片預鑿為於壙口下唇外以灰土築成墳頭
底墓誌亦傳築而成蓋埋奠築實可禦雨水充致浸棺且百
十年後棺木即成朽腐則壙中空空如椽撐柱不致塌陷庶
無覆壓之虞

樹墓碑奠畢即行祀后土家堂設祭於靈座以妥親心朝夕
上食如生時

守制

寢苦枕塊啜粥飲水苟生以慰親靈終禮制而已不嫁娶不
宴樂凡有期功以上不得嫁娶凡有喪方哀之不暇而為喜
樂之事於禮不順於心不忍且嫁娶所以廣嗣續期借

老也昧心逆天亦何取乎甚有村塾無識之家以家道單寒
於親方缺時即倉卒速娶過門以為尚未成服掩耳盜鈴更
屬謬妄凡有服不飲酒作樂
及赴他人宴會忌辰亦然
小祥祭於靈座閏十二月除閏不計設祭饌祭文一道

某年歲次 月建 朔日 祭日 不孝

小祥 致奠於

顯考

顯妣

孺人之靈位前曰痛哉我

文 顯考 顯妣 孺人 之靈位前曰痛哉我
母 父 去一期嗟節序之重來何吾

款式

親之不返心香虔柱奠達

幽冥尚

饗

大祥祭於靈座

小祥後又一周年為大祥凡二十五個月設祭饌祭文一道

維

某年歲次

月建

朔日

祭日

不孝

大祥祭

顯妣

致奠於

府君

之靈位前曰夙興夜寐追想

文款式

庭幃空望雲飛彌年易載曾日月之幾何痛盤匝之終冷

酒食具陳用申藻薦冀望

靈爽式歆式嘗尚

享

服闋

禫祭

大祥復又禫祭二月為禫服除請主入祠有力者祭設祭席祭文一道

維

某年歲次

月建

朔日

祭日

不孝

致祭於

顯

姓考

府君

之靈位前曰

靈馭長辭瞻依莫遂自我不見於今三年恨禮制之有終

思

音容其曷極今茲升

祔恪薦虔思伏冀

鑒臨來恪來享尚

饗

以後每年值忌辰俱齋戒家祭生辰亦然

荔波縣志

藝文志

文也者必其洞悉治道有闢風化而後可以垂諸永久者也荔邑自元迄明草昧初開藝文一體無徵焉我

朝文教昌明無逮弗屈自乾隆初年建城以來文風士氣為之一變迨後人才輩出數十年間其傳訛論贊諸作煥然可觀即偶爾浩譎興懷流連覽勝皆不失乎敦厚之旨而有見聞之實固不徒一觴一咏已也惜其卷冊亡於兵火茲

勉搜羅散軼得若干卷登諸史乘不啻吉光片羽矣若夫宏其篇幅補其缺畧是所望於後之君子云志文藝



在城塘紀事碑

知縣趙世綸

荔波古百粵溪洞之地苗蠻六種聚族而居各分頭目為峯總計有十六峯即今之十六里也漢唐以前無乘誌可考宋時曾置荔波土州元季明初為皮蒙雷三土司割據至正統間改流嘉靖間設縣屬粵西之慶遠府萬厯初知縣劉邦徵始詳請建城於時來里之喇軫村即今俗所稱舊縣地也明末知縣王君蒞任以諸苗不法詳請勦洗而喇軫之縣治廢矣本朝順治十六年知縣王君家珍請改建縣治於方村之禩村招異省漢民

數家以充役使編緝錢糧羈縻各里然而規模草率因陋就簡雖稱縣治寔同村落此厯來建置廢興因革之大畧也其風俗習尚類皆家藏槍械恣意仇殺貌玩王章輕視官宰如知縣胡君蒼庵於康熙二年奉檄蒞任路經水岩苗民恐其止宿騷擾糾集兇黨屢行不法官吏糧役俱遭慘毒此其兇暴之尤者也雖旋經官兵勦洗然自茲以後受任斯邑莫不心懷畏縮裹足不前咸借寓於慶遠府城間有親至者皆請南丹土兵防護人視荔波為化外官目荔波為畏途所以改土已逾二百餘年而

風不能遽易習不能遽改云雍正十年因荔波接近貴州新聞苗疆改歸黔省隸都勻府屬十三年苗疆多事蒙總督部院張題請粵西官兵駐荔防範四境藉以寧謐又以苗民兇悍恃槍械乾隆元年復蒙督憲檄委都勻太守孫諱紹武協同都司林君煥奎宣揚威德諭繳兵械苗民投獻恐後閏二月而事竣鎗刀鏢弩各收至萬餘乾隆二年又蒙撫部院憲張於苗疆善後事宜案內題設荔波營駐兵八百以遊守二員千總把總六員統轄之復以方村縣治偏在一隅難以控制委員相度形勢

得古喇軫舊縣對河之蒙石里地既適中形復寬敞而縣治基址定焉基內田畝房屋悉給價值遷居之費共給帑銀柒百玖拾餘兩三年八月起建城工至五年三月告成周圍五百二十六丈約三里二分共費帑銀貳萬壹千兩又建立祠壇廟宇衙署營房設學勸課演武宣威制度既已宏遠地勢又後平曠向之草率簡陋者規模為之一變從此化行俗美政簡刑清碑遠僻苗方漸臻於變時雍之治實於是焉基之其可無紀以誌厥顛末歟是役也創始則邑宰呂諱瑛繼事則邑宰金諱明基督

理則八寨司馬陳于中協辦則遊戎李諱勛守戎萬諱安縣佐方諱時寶儒學戎諱輔縣尉魯諱志儀部司李諱正吾陳諱照先李諱正魁張諱少卿張諱奇傑吳諱得瑗暨外部司等均著勞績余於乾隆四年秋七月奉檄委署縣篆爾時城工尚缺迨半然典章具在率循非難因得勉從諸君子畧為措置以終厥事焉荔邑偏居一隅素無志乘故當落成之日為之備始末立詞於石以俟後之君子備考云乾隆五年四月日記

重修荔波學宮記

知縣吳基龍

荔波之有學宮也始自

今上登極之二年時因新建城於荔江之南以苗民薰陶

聖化者久漸知詩書習文墨准督撫奏奉 旨令建學宮定學

額誠千載一時之盛事也距今不過四十餘年

聖天子壽考作人振興文教有加無已乃學宮竟頽圯特甚此何以故蓋由建學之初苗民能與考試者尚少每學使歲科按臨半為別屬童生冒入生徒散處學師董率維艱而

縣宰之來蒞斯土者率多署事不久任是以日致蹉跎不暇為修葺計惟陽曲李君在任二年曾糾集生童勸輸助修立有樂輸簿未幾以運鉛去不果余捧檄署篆未幾目擊心慚刻不能安因就李君之勸修簿生童寫有樂助者隨其多寡而催收之並合文武同寅各捐薄俸共襄厥成即命鳩工庀材整舊更新而以貢生巫璠廩生傅國斌董其事各生童等皆以為此舉是培植地方先其所當先也亦踴躍從事焉爰卜吉興工於乾隆四十六年冬月告竣於乾隆四十七年五月雖不敢言規模宏

大廟貌輝煌而垣墻完固殿廡齊全頗足以妥

先聖先賢之靈亦聊以成李君未竟之事云爾是為記

募修荔泉書院小引

知縣楊以增

夫事莫難於創始而物尤貴於成終荔邑向無書院自前任蔡君倡議興修至武君乃庀材鳩工而書院之規模畧備第講堂

魁星閣尚未畢工而齋房更屬闕如若不急為添葺不惟後致難收抑且前功盡棄為可惜也爰與諸同人商榷赴各里募化凡我荔邑之人皆當量力施助庶幾眾擎易舉不致半途而廢觀乎人文以成化亦將蒸蒸日上矣

堅壁清野疏

邱樹桐

天下之大勢在民心之有所恃與無所恃而已無所恃則不特處危地者立見逃亡即處安地者亦多震怖有所恃則不特處安地者共安職業即處危地者亦免播遷請即堅壁清野之說而申言之曷言乎堅壁謂邊關要地固於金湯防賊之或越境而入曷言乎清野謂野外糧食不留顆粒為賊之不裹糧而來賊無可飛渡之險又無可生食之糧民心自有所恃而無恐也若不務此第沾沾焉出師廝殺賊乃亡命之徒戰亦死不戰亦

死宜其悍勇非常也師乃遠戍之人顧身家又顧性命且其抵敵易潰也行伍之兵尚且如此耕鑿之民何以能為故此也聞驚而走彼也望風而逃以致金銀米粟賊播散之子女玉帛賊安享之被擄者為賊供役偷生者為賊前驅賊氣益張賊缺益熾賊勢益不可制然則對壘交鋒何如築堡建碇有備無患遣戍募勇何如編甲團練寓兵於農且徵辛一戰以圖功何如堅守持一守以無害賊之所利在於擄我遷編氓於堡中令其無可擄賊之所利在於掠我焚糧草於野外令其無可掠無事則

士農工賈各安其業有事則士運籌農制梃工披堅賈執銳各有所司我寡賊寡我逸賊勞我有險可據賊無隙可乘我有累可居賊無地自處賊不能與我持久相抗我能與賊歷久不衰是在乎先事豫而為之防當事而密為之布此即堅壁清野之說也或有議其迂濶而難行者不知民無所恃自難行民有所恃自不難行試問蚩蚩之氓各有身家性命廬墓田園誰肯輕去其鄉里而讓賊入境者誠有能任事之人敬將

聖諭聯保甲以弭盜賊一條為之厯却莊而口講指畫又將

上憲仿堅壁清野一議再為之按戶口而面命耳提民即至愚
未有不樂從者間有不率教及不諳文義者更以方言俚語反
覆詰誡斷不至冥然罔覺也誠使共為遵行將要隘之區有卡
可守總會之處有關可防凡僻壤偏隅類皆團練而防堵賊無
路可入無處可容中外自釐然肅清矣行見鑄劍戟為農器樂
鞏固於苞桑書上和親康樂世欣正直蕩平豈不懿甚

合題墓道碑記

李肇同

合葬非古也同為此豈得已哉 咸豐辛酉春正月二十有一
日荔波被匪攻陷 先君篤賊殉難城復後面目如生謹收骨
安葬於此 同治丙寅春三月二十有五 日苗匪又攻陷荔波
先母及亡妹玉娥均投河盡節比及復城而招魂無路矣嗚
呼痛哉同自是年避亂出疆遍遊西粵聞柳州失守二次殉難
盡節者多不得骸訪之都人士曰全不得者奉主而已遺父則
合題於母遺母則合題於父 同深躉焉雖出自創聞亦或在可

以義起之例俗有書生長載水篋別為一塚者究嫌精神不屬
故舍此從彼若謂亡於禮者之禮也其動也中則同豈敢抑亦
倍傷同心云

培補玉屏山序

知縣謝人龍

嘗讀詩至公劉景廼岡相陰陽觀流泉未嘗不嘆地邑民居必
度形勝以培人傑也乙巳之春受篆斯邑觀環署秀峯清流旋
繞知地靈之所鍾猶未識風脈之所自也公事之暇溯原主玉
屏見山如屏之端巖如玉之朗潤竊謂名斯山之不苟也惜山
半雨水裂痕兩道寬深五六丈長者三十餘丈短者亦十餘丈
零星溝渠甚夥猶羨玉之不無瑕深恐為斯山累即為斯邑之
風脈累因與少尉劉君字笏亭湖北漢陽人商培土脈之法遂

為補山之愚第積篋誠難捐貲不易先泐函於省垣朱制軍制軍祖堊亦斯山之發服慨然助貲三百餘貫又復募得紳民三百餘貫少尉不避暑雨監督工匠日三四百人兩閱月而工甫竣余樂玉屏之無瑕也與少尉環步山麓至玉山上行見夫山陰之山如甕玉几過峽之山如界玉尺山陽之山亭亭玉立山陽之水曲曲玉環山間之外似瓊林如玉樹山中之人疑多璞玉堪待玉人之雕琢爾士子負玉姿抱玉質謹凜玉潔之節磨礱玉光之潤而比德於玉將登玉堂列玉笋佩玉魚庶不負余

與少尉補玉屏培嘉脈以玉汝於成之心也夫

培補玉屏山記

邱樹桐

捧莪皆山也。挺然特出一玉屏。方正濶大。前朝天馬。後峽石龍。左列將軍右環武庫。巖巖氣象令人肅然。起敬焉。溯自乾隆初年。經畧張公未定此邦。因喜此山之毓秀鍾靈。包孕萬有。旋請設治於其間。相其陰陽。則一河玉帶。劈分新舊兩城。渾如太極圖也。觀其形勝。則萬頃良田。鎖住龍獅二口。宛似轂函闕也。其他兒孫羅列。波水滌洄。成形成文。固不待言。以故合境人民。享太平無事之福者。數十載未幾。玉屏崩裂。山嶽不靈。是以有嘉

慶十七年之一變。善埏輿者不曰文廟宜修。即曰玉屏宜補。慨然有補玉屏之願者。道光十三年。邑侯長沙魯公惜事未舉。以解組去。若重修文廟。嘉慶末年。則有若邑侯蔡武二公。道光初年。則有若楊蔣二公。且添建文昌。創書院。立義學。宜乎人文蔚起。禍亂不生。何以道光二十三年。合城又為之一變。此皆未培補玉屏之故也。天心仁愛。復啟巖疆。特簡漢陽劉公來。募義山。縣尉下車。伊始覽山川。高富教汲汲以辦。考費補玉屏為急務。適逢漕帥朱公省墓游止。更值邑宰謝公捧檄來。茲情深桑梓。

望切箚義爰捐廉俸出告示以為一邑倡俾縣尉公得成已志以成魯公志歷巡四境化功德不惜齒牙勸諭四民捐貲財以運土壤躬督挑雲擔月出入披星手數玉粒青蚨單寒沾露子來濟濟公至紛紛約費四百餘金補完千古缺陷是舉也起於端午成於中秋僉曰非縣尉之力不至此縣尉公不肯居歸之邑侯謝公謝公不受歸之漕帥朱公屢來函不自任山既傾於數十年前以前山忽成於數十年以後殆有天意存乎其中則亦歸之天而已矣桐不敏贊襄厥事爰記其顛末於左以俟

後之應運興起者知所由來歟是為記

創建試院叙

知縣吳德容

粵稽一方文物之盛衰有氣數焉其盛也每由人開其衰也可由人挽要皆守土責也都勻舊為黔中名郡人文耆彥翹然與各郡爭衡逮丙辰苗教各匪跳梁郡治暨東北各屬類皆陷為賊窟惟南面獨山荔波兩屬僅存然亦土寇蜂屯都非完壁歲丁巳余承乏荔邑蒞任之頃即以安輯良善殄誅頑梗為急務募練編團心力俱殫全疆始靖辛酉捧檄署理勻守仍攝荔篆值獨荔遭苗匪之變迨馳堵剿轉危為安嗣

大憲命督辦軍務節次克復郡境各要隘賊鋒稍斂壬戌六月以導署伏師旋荔蓋茲七八年間日夜枕戈磨盾幾若為馬上治都人士從余履戎行建虜功者殊不乏人惟是地經風鶴絃歌久廢方欲趁軍施餘暇興學敷教為移易風俗漸摩仁義之地非敢謂以文章飾吏治也適是秋

奉提督催考之檄實我心所欲為亟轉行獨山並示荔邑生童爰於今春彙試兩屬童場歲科六屆兼行選其秀者俾業學院廷師訓課士氣條場彬彬乎有由衰而盛之勢但學使按臨例

憑府治而荔邑向無試棚即擬創建擇基維艱荔營范忝戎協堂為余言營有廢地介學宮書院之左勢頗寬敞因偕余相度左右文峯特聳前朝岡阜環繞舒秀余欣賞久之范君慨然捐出即日鳩工庀材口授指畫昕夕併督幾百日而聿觀厥成暨大堂內堂各三間甯從廳廊巡捕公廳咸備悉全捐廉為之其號舍頭儀轅門暨鼓房牆壁為荔人紳耆等捐貲勸造計為屋數十間拓地縱橫百餘步其規模之宏且壯工程之浩且繁而余不敢辭厥勞費者亦念此邦向日文物之盛冀於今日起其

衰竭余守土之責已耳工甫竣學使澹吾陸公按試於茲得文武生百二十人選拔及序貢成均者十有餘人十年中磨厲以須而濡滯不振者一旦得脫穎而出泮壁生輝風雲壯采可不謂極一時之盛矣乎雖邇者郡治猶未克復東北各屬尚隔聲教以此先導格苗民而歸雅化不難操券焉是舉也范忝戎協力經營勤勞稱最署尉俞丞魯斯亦時相助為理以致雲蒸霞蔚輪奐速成而斯地又據荔城山水之盛為靈秀所鍾闡置市廛間如豐城劍氣今始煥發行見菁莪輩茁榜花疊開文彥

之興廢日盛則余今日創造謂為盡守土之責也可即謂為
氣數之將轉也亦可荔人士庶有以慰予望乎余拭目俟之矣
至於有基勿壞計垂遠久以補余所未逮則於繼踵高賢深有
仰賴焉爰泐其事於石以誌余之惓惓云

邱贈知府銜候選同知直隸州邱君諱樹桐暨德配李恭
人闔門殉難合傳崇平實塆

咸豐丁巳春二月黔中逆苗犯獨山州援師候選同知直隸州
邱君樹桐解其圍窮追遇伏死之越三載庚申正月髮逆陷荔
波邱君之妻李恭人率媳黃氏女適陳幼孫承歡女孫秀鳳闔
門殉難僕秀祥婢女桂香與馬吁可傳矣按君行一諱樹桐原
諱敬嵩字一峯亦字嶧封先世為閩上杭人厥考崇光公始遷
於黔之荔波縣家焉宿學未仕生二子長即君也幼喜讀書性

純學敦孝友及長為邑諸生食廩餼以明經就廣文咸豐辛亥
舉孝廉方正先曾肄業貴山書院

撫軍賀公常嘉賞之謂其文鬱勃有奇氣應鄉試十餘次皆薦
而不售亦數奇也居父喪廬墓三年不飲酒不茹葷其他可知
矣喜與人排難解紛有葉姓饋千金拒而不受以故鄉人皆敬
而重之雖夷苗無所問道光庚戌歲粵西髮逆滋事毗連荔境
奉文舉辦圍練邑人士皆諉避君獨毅然曰執干戈衛社稷
儒者事也使人人存畏死倖生心則桑梓之地誰與守哉遂捧

檄身任總辦團練事首先輸賞以為鄉人倡建碉卡聯戍勢符
守望之助境內恃以帖然是時

胡文忠公方權貴東道羨調君帶練隨征外剿內防枕戈未
遑者三載癸丑黔中甕安柳匪滋事君帶練剿辦不數月擒
其渠魁餘黨皆平

撫軍蔣

奏保以知縣選用甲寅粵西南丹逆匪勾結黔匪楊元保等猖
亂奉胡公檄調帶練剿辦事竣復保賞戴藍翎值

胡公升任楚北徵 君隨往 君以老母在不敢遠離固辭
卯春都勻分駐之台拱逆苗蠢動蔓延各州邑衆至數十餘萬
以大股逕撲勻郡城中鼎沸勢岌岌乎不可終日是時 鹿觀
察攝郡篆飛檄調 君率約勇千餘人入保危城 君設疑置
伏智應機先賊百計圍攻往往失利死者相枕藉以故攻稍緩
守至丙辰秋城中糧盡薪絕至易子析骸者賊終莫測其虛實
遂解圍而去

撫軍復保以同知直隸州選用方 君之守勻城也荔邑夷苗

乘間竊發漸肆猖獗知縣事蔣君陣歿接任趙君為賊阻四郊
之內均賊巢人心皇皇莫知所措至是聞勻城圍解急調 君
歸保荔城未半月而勻城陷矣先是

胡公至楚北屢遣使徵君 君皆不就復以檄調 君君俱以
桑梓有事力辭不往歸荔後孑然一身獨力支持數月之中剿
撫兼至值獨山屢次告急求援 君遂於獨荔適中之地樹營
壘為兼顧計越丁巳正月三脚地逆苗大股攻獨山 君擊走
之解其圍遂乘勝逐北身入賊巢遇賊伏被困山谷中三晝夜

從騎傷亡殆盡 君復手及數賊力竭歿於陣中其嗣君為邑
諸生方辦城防聞耗奮率練往求其屍不得 李恭人手札
諭之曰汝若無力取父屍歸葬我必不再為人嗣君遂糾集團
練奮力與賊戰攻破賊巢殺賊無算百計求父屍歷四十餘晝
夜始得竝生擒送首十餘人以歸闕 君屍受四十餘鎗面如
生勝猶流血寗安事畢 李恭人諭嗣君曰自今而後汝以剿
賊復仇為事家事汝勿與聞 撫軍以其事
上聞卹贈知府銜給予雲騎尉世職襲次完時仍給恩騎尉罔

替賜祭葬如律嗣君遂墨經從軍轉戰獨荔都江台拱間幾三
載庚申六月髮逆陷獨山荔波糧盡無援危在旦夕 李恭人
變釵環助餉以此人心感奮爭先輸貲皆效死弗去荔城危復
安者皆 恭人之教也十二月嗣君率練克復獨山賊眾大潰
乘勝追殺百餘里出粵西界擒逆首七名奪旗幟器械無算自
赴省獻俘 節帥田嘉其勇委赴銅仁軍營差辦遺嗣君遂不
遑歸里捧檄以行不逾月髮匪復至圍荔城五日遂陷 李恭
人集闔門長幼於園池上謂之曰今日得見先夫於地下矣媳

黃氏女適陳請先之恭人曰尊卑有序家之率老身先之矣遂投水死其媳與女及兩孫婢僕二人以次投池死越兩旬荔波克復其長女適曹孀居者距城九十餘里奔入城收葬成禮焉後張制軍督師入滇嗣君適統領鎮南後軍隨征道出渝城時埒主東川講席謁

制軍因得晤嗣君始悉其顛末嗟呼邱君以文人而當攘攘之秋縱橫戎馬親冒矢石身繫地方安危者將十載非胸有甲兵矢志報國者豈能若是使天假之年身當大任安見澄清

之局不可定而韓范之功名不出於儒生乃未竟其功而中道綏絕遂使膏志以歿豈不深可惜哉其德配李恭人持家有道鄉里以賢稱其姑李恭人謝世正邱君守勻城吃緊之際恭人一身以當大事喪葬皆經營如禮育一子三女長適曹青年而寡守節廿餘載矢志不移次適陳又次適羅皆以淑德聞其平日之婦德閨教已可概見矣至變警環助餉勉其子以殺賊復仇更為常情所難及至城陷之日率闔門從容就義則又大義凜然大節昭著殆所謂巾幗中之完人者耶誠不愧

為邱君之配矣其嗣君名育泉號壽田以積功累保知縣現
統領鎮南後軍為人精明沉毅個儻不羣知其能讀父書繼父
志者邱君其不死也夫

勅封孺人蕭母王氏暨孀潘氏媳鄧氏三烈傳

廣西賜進士出身
浙江刑部主事 鄭獻甫

隋大業之亂裴倫之妻曰柳夫人與其女其媳同死井中余嘗
覽其事而愴然至明崇禎之季劉文炳之母曰杜夫人與其女
其媳死樓上余聞其事益慘然曰嗟呼忠義出於末世貞烈聚
於一門人生所謂不幸之幸乃如是哉今年復得荔波蕭氏婦
死事狀蕭孺人曰王者處士蕭公正和之配有子二曰丞勛培
勛其弟孀潘者叔氏正高之配也有子二曰雲飛鵬飛妯娌雍

睦姑婦慈孝號為鄉里女宗咸豐初年兵戈紛起荔波舊屬吾鄉之慶遠也卯以來苦於攻戰者屢年辛酉正月盜復圍城適大雨城為所陷烈婦知不免與其弟孀潘訣曰蕭氏一脈惟寄兩子吾夫體重恐不能逃兒輩既長當求自脫我等女流舍一死無可謀者盜方入城二婦已離舍相攜於所謂楊公井者癡立以待其夫適至欲挈家並奔潘謂王曰可麾手令兄公亟自去賊已偪徒相累死耳遂無言各抱一孫投井死鄧後至見二姑與二子俱投井亦跳而入三姑媳相枕死惟三父子幸逃脫

所遺兩女猶未知死所也烈婦王之弟蜀江已酉拔貢為吾州之牧其甥隨侍訴其家死狀都為一函速寄千里囑為之傳余本州民時居羊城故敬書其畧以俟後之采風者

鄭獻甫曰自干戈蠲起士女蟻潰其不幸而僇辱者庸可問哉然有不敢不死者又有不得不死者三烈婦當城破之時紛紛藉藉非指名之家倘以智自全塗面易衣隨眾而出未必不幸免而卒不肯苟免者何哉當死而不決恐有求死而不得者烈婦殆忠之審矣嘗讀陳同甫所書陳氏女遇賊事

謂其姊引頸受及其妹畏死受辱事後人論之曰若獨不能為姊之所為耶連聲答曰難難如三烈婦者夫何難哉嗚呼此其所以為難也

哭蕭氏姊哀詞

王錦

四郊之賊哮如虎一城之人竄如鼠揚公井畔鬼相語水底應
眠三烈女涕隨姒去婦隨姑中有一人吾女嬃先呼兩子令逃
避次揮夫子無踟躕癡立井邊何所望黃泉在下白日上孫男
孫女各在懷次第投入同穴奕有弟有弟方宦遊遠逾粟時
領州阿甥麻衣告阿舅慟倒空自張雙眸回憶時會坳間別申
申而嘗殷殷說兩年妄意得同居數語誰知成永訣吁嗟呼彥
達分祿皆空言英公煮藥兼無緣曹娥碑與恣氏誅辛附鄭子

雲台篇年來對案時振觸欲以哀歌寫賢淑一字一淚不成書
三踊三號聊代哭姊本知書再三讀悲聲應滿射鮒谷

詠楊公井殉難三烈婦詩行

訓導陳培垣

天地清貞氣問世產賢良匪特忠臣義士流女子坤柔萬乾剛
我陽山水多奇崛婦道守貞堅不屈我為千載植綱常遂惜一
身就幽鬱迺今苗逆軍捧我蕭室一門貞烈多王氏潘氏同鄧
氏相隨入井井不波余因司鐸來此境道旁忽睹楊公井井上
碑文觸目傷堪嗟汲古無修綆幽魂湫湫歸何地生存大節死
為神死者長已矣聲名震閭里人間父老稱斯人天上孀星照
此水吁嗟呼當時城陷各呼號千門萬戶眾奔逃豈無東鄰西

鄰婦垢衣塗面出城濼總之人生百年耳與其偷生不如死偷
生死後有誰知死難終當載書史為此感嘆作歌行中憫長留
不朽名珠沉玉碎雖物化英風凜凜氣如生杞婦之城湘君竹
馬能儼此窮途哭惟留清白在人間鬚眉男子亦驚服閨中君
子古所稱烈女傳中堪追逐

八景詩

東郭曉煙

知縣蘇忠廷

荔泉城畔乍晴天無限炊煙接曉煙
匹練橫斜高處起遙峯隱約半空懸
策耒紫氣冲牛斗北望流雲逐馬鞭
風景依稀隨變換一輪紅日翠微巔

南堰奔濤

一派我江江水寒迴環百里似龍蟠
西經高寨煙迷渡南湧官塘雲作圍
介石磷磷成砥柱銀濤滾滾壯文瀾
詩囊畫稿知多少

少筆底灘聲欲繪難

西峯齋雪

西峯疊疊玉玲瓏却為閭闔預兆豐瑞霽蝶鬢新月白詩吟驢
背夕陽紅尋梅峻嶺逢樵子荷笠寒江有釣翁那似高僧清夢
穩不妨遊宦印泥鴻

北郊落照

我陽城北小橋東翠黛蒼茫補化工短笛橫吹芳草地畫帘高
揭杏花中遙山晚景無遺綠反照斜陽分外紅愛惜分陰勤教

稼紀行恰好繪幽風

沙市圍魚

平沙浩浩隱烟霞共說生涯在水涯幾舸輕舟衝荻港三椽矮
屋傍蘆花攔河結網遯鄰叟破浪停橈問酒家捕得尺鱗堪買
醉高歌競唱夕陽斜

洞天消暑

溪光雲影共澄鮮清境超然斷俗緣避暑客來修竹岸納涼人
放採蓮船山臨水國宜消暑地隔塵寰別有天只惜漁郎尋不

到問津空悵武陵煙

樟江夜月

一輪明月一扁舟載酒高歌好唱酬翠岫分明懸玉鏡銀濤澄
徹滾金毬放開眼界黔州小感慨眉山赤壁遊到此纖埃都不
奈何須海上問瀛洲

梨井春光

梨花井上門芬芳遊士爭流曲水觴勝地誰遺棠樹愛甘泉應
帶荔枝香三春燦爛逢寒食一勺清涼洗熱腸重見吾民熙皞

象先天化日正舒長

東郭曉煙

李國材

東風弱不動春烟橫亘峯腰匹練牽綠樹有情依處見青山無
脚半空懸鳥尋暗壘時迷路人上高樓欲化仙朝旭偶銜葱嶺
出閭閻都傍紫雲邊

南堰奔濤

我江之水東北來平流至此多石臺臺石阻水水怒石水石激
聲何壯哉夾岸風停山色靜萬團雪滾浪花堆熱腸熱耳偶然

洗笑口為逢君始開

西峯霽雪

一峯黯淡一峯明天角微陽送晚晴松柏滿山開冷翠雲烟落地化空清高僧夢鶴門常閉有客騎驢酒共行最是寒樵寒已慣單衣短布動歌聲

北郊落照

未落秋陽返照紅豐碑寂寞古亭空溪流溪去寒光送山外山多冷艷烘此地草深埋白骨何人酒醉笑春風松杉晚景分明

好莫記年華唱慳公

沙市圍魚

鄉村有網號攔河水淺沙明信手拖觸網紅鱗奔浪誤紛拏赤體有人多山林氣肅清霜動蘆葦陰深夕照過夜火誰稱叉手妙滿江星點喚哥哥

洞天消暑

紅塵隔斷水悠悠熱處人來盪小舟洞裏有天仍是地山中無夏不疑秋巉巖門日濃陰落老樹呼風瘴氣收一曲浩歌歸去

也滿船明月渡滄洲

槿江夜月

良宵浩月滾金毬寫出江天一色秋眼界分明同白晝人生難
得泛孤舟寺寒霜落疎鐘外林靜烟凝古渡頭洗去紅塵三萬
斛先民何處訪巢由

梨井春光

膩膩風光漱漱春梨開金井動遊人山林厚福多香火士女輕
衫拜土神流水小橋清照影凌雲高閣淨無塵登樓不敢拈花

笑儂是華嚴法界身

留別荔波士民

魏承杙



豈必全無去後思終慚小惠未能施
嗷鴻徧野鷺初定害馮環
郊蔓恣滋幸有豐年遺父老仍將大木付工師
春風細雨江南路回首黔黎送我時

難負平生一片心殷勤學製度金針
民為邦本千秋鑑政在人
和函字箴闕塞總須嚴鎖鑰羽書遮莫付浮沉
郊原已徧桑麻種猶有烽烟動遠岑

八仙山下壞雲屯十萬貔貅猛氣吞
狡兔免搜殘三窟盡喘牛推

敗五花奔本知好殺非天意幸有涓埃答
聖明敢謂禽莽吞
益益掃平昏霧湧朝暾

寄別荔泉士民

吳德容

荔泉三載嘆無功負咎時形寤寐中
政績敢稱賢父母癡聾空
號阿家翁宦遊久已如流寓士氣於今見古風
多感諸君留我意此心早似欲歸鴻

蜚語無端遠近傳黃堂猶仗鏡高懸
青蠅止棘能交亂蒼狗為
衣豈信然事變竟成難了局心違怎策急歸鞭
會垣不遠聊陳

訴大府心情或未偏

一聲去也倍心驚
數載相依忍遠行
芳草漸迷前日路
落花更愴別時情
甚多累真無奈
囊橐無餘笑太輕
料得城鄉諸父老
定應憶我計歸程

碑亭紀事詩有序

吳德容

余自咸豐七年來宰斯邑時鄰封均失四面皆賊城懸一隅被圍四次雖無餉無援猶能背城力戰旋圍旋解居民安堵如常十年春瓜期已屆眾紳民遮道攀留作借寇之舉夏四

月余仍復任每念孤城零落萬家性命繫於一人心竊憂焉秋七月獨山失守賊燄四炎又奉撤署都勻府羨痛瘡痍一郡無從撫綏故擲風沐雨與眾兵民內防外剿辛苦萬狀皆不顧也十二月收復獨山方謂烽烟漸遠我兵民可以休息不料十一年正月十八日粵賊數萬由南丹突入我境寡不敵眾二十一日城陷紳民婦女多赴義全節以殉於難余與范遊戎統兵在外攻剽聞信之下憤恨難名幸與各紳等徵兵調練均皆踴躍即於二月十二日城復臨尸痛哭情難識

認兼無親人收殮情更慘然遂合瘞於此分男婦女五塚即
立墓碑但恐日久壘圯墳平削生草蔓不可復識爰含淚濡
皂誌其顛末俾垂永久不致湮沒作詩六絕用寫悲懷

怪來連日雨絲絲天為人愁亦淚垂烈女奇男同赴難義山荔
水總含悲

幾番羣寇肆披猖重與紳耆力剴防劫換紅羊天意定頻年爭
戰付滄浪

無知婦女豈貪名視寇如仇視命輕冰雪一身歸九土馨香千

古死猶生

孤城一片盡摧殘瓦礫成堆白骨寒昔日人民今日塚豈碑一
字一辛酸

人民城郭忽滄桑往事真如夢渺茫我是遼陽丁令鶴歸來不
覺淚沾裳

書將碑版記前因多恐沉埋為細陳對此茫茫增百感封培遠
望後來人

吊似村李明經殉節即步吊蔣明府原韻

蘇忠廷

懷慄常山舌怍怍詈賊營不降頭可斷雖死面如生奉命來邊
瘴招魂趁晚晴遺編徵訓子合振舊家聲

乙卯仲冬弔蔣明府殉難

李國材

蠻雲肆潰亂星落九阡營得所君能死無功我愧生山川黷失
色天地陰難晴驅馬陟高嶺猿啼哀慘聲

乙未陪覃玉山諸友遊白巖洞

李國材

仙府結詩壇詩腸此地寬酒呼雙槳急酒不足使人雲坐一堆
寒洞如雲石齒泉通脉波心月弄丸歸舟須緩緩客有釣魚

竿

己丑七月西園遊覽并序

李國材

縣署內西園嘉慶初邑侯吳藕船闢也侯任荔十餘年性孝
奉太封翁在任翁喜風景好吟詩因闢西園建暈紅亭一面
依牆三兩半壁蓮池抱之池上甃甃弱柳從柳下架之字水
橋渡入亭中又造望月樓築雨花臺起四時佳興亭種名花
香草時宴賓客以怡親顏製有西園亭八景今祇傳柳橋新
月四字乙丑秋余受邑侯覃心海先生聘入署內課諸公子

因遊覽之暈紅亭梁柱欹斜綠苔滿地斷橋橋朽支水上雨
花臺餘峭崿石半堆望月樓改為小祠奉 闕聖帝君畫像
惟四時佳興亭留客半畝荷花笑人也感而賦詩

我聞在昔署有西園一亭紅暈一畝香繁花雨飛臺柳橋月來
四時佳興洵可樂哉藕船明府志在榮椿我宴我友我嘉我賓
酌酒敲詩歌風話月情陶庶幾頭忘霜雪一時勝景素予望之
今日我來胡不訪之踏散疎烟風景凄然橋化虹去亭有苔錢
雨不飛花楊徒垂岸我思古人愜我寤嘆荷放一池慰予來遲

粉還未墜香還滿技抱我瑤琴上佳興亭高歌一曲日暮山古

清虛靈洞

俗名仙人洞

李國材

萬峯聯絡一峯孤萬峯古峭一峯離玲瓏透別中空虛仰覆雨
朶青芙蓉飛來石佛貌清臞倒生古木半榮枯巖泉落地飛明
珠承泉石盤冷相於石几石席天然鋪四圍綠翠搖風疏人問
此地真蓬壺無怪仙人擇所居我來不見燒丹爐仙花仙菜半
荒蕪夕陽在山酒醉餘閒情倚檻一長吁村翁向我笑邪掄促
歸聲口但狂呼高歌一曲臨草廬東燭遠觀仙子書

丙寅三月二十六日紀事

何振新

丙寅三月二十六天未明時雞亂哭雨猛風烈迅雷轟走石揚
沙飛瓦屋月無魄兮星無光毒霧重重迷眾目昏黑之中賊登
城守陣饑民久僵伏有誰出力敵兇苗木皮草根不充腹當頭
閃閃舞刀光四面戈矛攢簇簇吼聲殺聲號啼聲山崖下崩水
下瀑咆哮颯颯冷風來鋸牙萬虎鳴深谷百家千家火騰騰那
既無完巢盡覆血流肝肺滾頭顱街巷縱橫滿人肉掘翻雉堞
毀宮衙燐火東西夜相逐從此劫灰長蒿萊將軍堂上遊糜鹿

宦遊粵西留別荔波父老

白朝貴

力掃妖氛萬丈塵依然書劍十年身出山應惹林泉笑我無
如父老親此去誰為青眼容再來都是白頭人江干祖德心何
切握別殷殷淚滿巾

超然無累起長征千里行囊一葉輕好唱驪歌同賦別敢云戎
馬是書生憑將肝膽酬民望那得涓埃答 聖明自笑身如新
嫁女但逢姑舅總低聲

暫辭泉石蕩莓苔蒙郡迢迢走一回山水名傳臨桂好帆檣影

背荔波來家如蓮舫隨風合人似梅花帶雪開
揆自今應不負根株端向五雲栽

清虛靈洞

俗名仙人洞

董成烈

兀立孤峯秀天開古洞幽
磬聲聞激石松韻聽鳴秋
老木緣山鼠洞口老柏枝梢常寒潭吼夜虬
仙人今已去猶有遺蹤留

瀑布泉

在瑤台里花村

萬仞危巖瀉急湍飛流如練
水光寒濤聲響徹林壑
浪影橫遮路百盤停磴行人朝冒霧
瀑布下有重屏每值早霧空濛時時出現
撥簾漁父夜

加餐瀑布下有壩介泉中地高燥淹沒不及漁人嘗撥水廉以
出垂釣得魚以泉烹之味鮮美有攜酒裏橙避泳數日不
者我從王事頻來往也為清幽把釣竿

可廳四景

李國材

夜景

書聲響琅琅倚石醉花香清風送爽月流光
茶半盃滌詩腸夢不到黃梁

朝景

東窓日上紅幽人睡醒濃披衣斡面學匆匆
大弱冠小成童講

解一堂中

午景

飯餘課猶多書童席面羅鎔經鑄史入文科稍閒處睡來魔偷
懶學頭陀

夕景

日夕雨風收藏修此息遊門前散步快勾留言相洽意相投情
致最綢繆

訓子詞

李國材

寸 在家當孝父母學堂堂敬先生我教我總深恩報答難忘方

象 讀書總須講究舉動切莫輕狂心明外貌復端莊方是男兒氣

放 莫把文章在意但將經史研窮果然經史爛胸中筆花自然開

代 寫字最須腕力要從足底凝來掌虛指實細安排書法自追前

几席務須光潔書籍猶須整齊花香鳥語月窗虛總助讀書樂趣

富貴身外事物有時逼人自來莫思爵祿莫思財心常向著書

內古事莫非今事令人即是古人古今事業總精神宜把肩頭承

出則賢良名世處則孝弟力田順時安命且由天一生無尤無怨

種花先培根本造樓先築根基小兒若狂蕩不羈將來斷難成器

講書心有明處即以身體而行日積月累純粹精聖域賢關直進

訓子箴

李國材

靜爾身莫與世紛奔默爾口莫言世好醜爾身不靜將生凶悔
吞爾口不默將招禍不測我曾風雨許馳驅人間彼此各一時
慎慎慎思思思

荔波縣志

雜記

宇宙之怪怪奇奇甚衆而俗儒諱言之不知商羊萍實紀於邱明牛鬼蛇神咏於騷賦天下事之不可以常理測者豈盡虛語哉是故天道有陰陽人事有奇正得其正者尚矣得其奇者或智周乎萬物而獨全其天或靈鍾於一身而獨標其異於人有之於物亦然况乎兵燹頻仍人情變幻洵有目所未經耳所未聞者苟非廣為搜羅何以表前

此之行而為後此之戒哉易曰一陰一陽之謂道固不可以怪誕而概攢之也志雜記

瑤慶里水扛村董力深山中樹木陰翳山麓有塘一水碧綠色廣十餘畝深數丈或一年一涸或二三年一涸涸時水為靈物所吸頃刻盡入岩畔石隙池魚奮躍如雨土人過其涸也或舉筐取魚動以千斤計取魚畢而水復盈矣附近村寨以一涸為一年次第取給不索不爭亦異事也

元季明初荔邑分為十六棒即今之十六里也時諸苗未歸王

化日以爭鬪為事有瑤慶里板夾村吳大者短小精悍鐵額銅頭身披犀甲矢礮不能入所執鐵戟重百餘斤上陣如飛諸里咸畏之

舊縣後村覃氏祖忘其名長身高鬚有勇力揚威將軍哈元生南征至羊拱仗劍謁馬哈異之令試其技覃以石臼為盛以牛皮為甲大木為桿運動風生哈大悅厚賜之歸

道光二十七年有道士身披破襖肩擔漆藤神骨蒼古憩於城東之龍王廟不飲不食善以符咒治病沉疴立起人學餽之

畫傾以施貧乏常吟口號云壺裏春秋多歲月胸中經史大文章自從悟徹菩提樹看盡人間萬古忙居數月不知所之蘇瓊不知何許人夫婦寄居荔城不如量酒每以米粒為團實糖於內外加紅米裹之名曰喜團把蒸熟鬻於市以自給夫婦八十餘歲同日尸解所居茅屋數椽忽生異草香透一室人以精誠所感云

距城西南十五里甲乍村山凹中有石高聳丈餘頑石耳感豐初年粵西李活佛託夢於其村人言將付靈於石一時傳播

有叩即應往來祈禱者不絕於道不數年而宮殿巍峩牆壁輝煌宴會甲一時之盛丙寅燬於兵

丙寅之役城中糧盡人皆採草木為食甚有食老糠糞蛆者每日數十餓練潛入人戶翻牆倒壁尋覓食物即醃醢之類亦奪之餓死者數百人甚矣無糧之害至於如此

瑤慶里有黃姓婦借一子方七歲耕於山有虎穴至撲婦於地將噬之其兒不知為虎以小木擊虎虎舍婦而遁或以為虎有不忍之心或以為天鑒其兒之孝是二說也並存之以俟

考

丙寅春三月城陷四月賊退有人於縣署舊基糧倉下獲犛猪子十餘枚識者以為城池將空之兆後米各里燹亂居民逃竄豺虎晝行荆榛塞道人跡不至者數年

巴容等里有巫師能以法术役使鬼神與山洞精靈較勝負每值大旱居民卜某洞神為殃以重價延之至則設神像於中堂跳舞三晝夜以雞子百枚咒以符水令數人於石臼內極力奮之不破不損舂畢復以其徒披五色衣執叢木劍作法

搖曳者久之忽躍起奔走餘衆鳴鼓角相隨山林川澤皆超越而過至洞以竹簾鋪於水上不沉其徒三四人於簾上盤旋跳舞頃刻潭水陡漲大雨立至亦奇矣哉

奏控者九什等里土俗之喪祭也里中有富家者不論男女至三四歲每年重陽釀酒將以大甕埋土窖中謂之老酒壽終日其子孫擇吉會集親友陳稿魚腊脯老酒等物於庭延大巫祝之三次畢豎打於地以大繩穿牛鼻於打脚或百十隻或數十隻不等每牛以一人持長刀立於牛側視巫指揮次

第立斷牛頸流血若泉觀者莫不股悚其肉喪家不食盡以散諸親友此贈彼投相習成風有至鬻產破家而不悔云

巴容里奈柯橋南十餘里有洞曰響水洞相傳內有潛蛟二每值久晴則吟吼震動百里次日大雨即至久雨亦然

九什等里有大巫能以邪術制人謂之放鬼彼此有深仇者則以重價延之邀同心五六人偕巫乘夜至深山無人處陳列金銀器皿獨眼干魚古劍黃茅白雞白鵝等物大巫唸咒者久之頃刻獨眼干魚躍入盆水中游泳如生又以白鵝白鴉

生血洒於黃茅之上茅即飛起刺於仇家之門所放之鬼即至其家作祟有獨戕仇之身者有害其全家者又有大巫能退之其鬼反至放鬼之家為殃各視其術之低昂以為勝負相傳其書名為陸壓釘頭七箭書皆怪誕不經之詞然余嘗見其書亦文綠字類於鳥跡未易測識或亦不盡誣云

丙寅等歲兵燹後繼以饑饉棄賁如珠遺民皆鳩形鵠面流離於田野溝壑間有食馬糞甚而填死者有抱山藟等物力乏而死者甚至有割人肉以為食次日死而其肉又為他人所

食轉相搏食近於禽獸此所謂亂世之民不如雞犬者也

補遺

地理

三峽山在周覃里播拐村南二里每值峯頂黑雲倏起三日內必有大雨

三峽洞在三峽山之麓高深約十餘丈內有石神一凡有祈禱皆應或稱為感應洞

白巖脚在周覃里東山之東高約數丈色白如雪前有古井小溪環之每值魚躍必有大雨

師旅

咸豐辛酉春二月髮匪余勝子尚為城兵練擊之下竄古州過周覃有板光寨團民八十餘人截其去路鎗斃饒賊三百餘人賊全隊繼至四面圍重圍練八十餘人悉殲焉

同治丁卯冬十一月下河苗竄入荔境周覃等里俱為賊脅從惟二洞恒豐尚據險固守賊憤之率送黨數萬攻入三洞連燒數寨團民奮死拒敵賊潰追至水又河殺賊家三千餘人賊自是不敢入其境

同治丁卯歲各里變亂互相攻劫有土匪李龍者勾引苗匪竄入周覃攻破弄索寨燒殺漢區四十餘人